



濟南府志卷四十九

人物五

明 歷城



李思迪濟南人登元進士第爲國子助教洪武元年以故官入京授起居注四年謫瓊山知縣以廉謹聞時芳草創凡所規畫皆中度革姦貪毀淫祠祛宿弊芟繁冗政聲大著公餘輒歌詠自號海濱子因以名集六遷至山西行省叅政以事降丹徒知縣坐失入人罪安置閩中十二年正月帝勅中書曰思迪爲縣無貪墨其守可嘉偶爲姦吏所欺致失入人罪又竄居炎方已數年矣可特詔還俾訓國子後爲晉王傅宋濂有送其之官序

按宋濂序云李君名吉其字曰思迪濟南人據此則思迪名

濟南府志

卷四十九

人物五  
明 歷城

一

吉而實錄及諸書俱作李思迪其以字行耶

潘原英歷城人洪武初任太原縣知縣改築城垣重葺廟學雅善課士當兵戈凋殘之際興賢育才絃歌不輟

秦居敬歷城人洪武二十六年領鄉薦累官刑部侍郎以才行譽重一時

周郁濟南人洪武三十一年任襄陵縣知縣爲政寬宏均賦役平獄訟民爭德之祀名宦永樂閒擢渾源知州時旱蝗郁齋沐虔禱蝗飛出境川南有虎傷人郁牒於神是夜虎果入籠中後陞

荊州知府

張思信歷城人有勇畧建文二年靖難師圍濟南築隄壅水灌城  
中思信應叅政鐵鉉募闖隧道潰其隄水泄城賴以全孫鸞正

德六年舉人授長沙通判多異政民爲立生祠鸞子錦大學生  
德府引禮舍人錦子潭

張潭字德深錦之子有學行著聲諸生閒操行端謹平居無戲論  
惰容教人隨材誘掖務收其放心絕意科舉之學日與門人究  
古禮冠婚喪祭飲射諸儀士大夫家皆質之而後行故濟南漸  
習禮俗提學道陳鎬修闕里志擇諸生博雅者分纂首屬潭四  
方從游者先後七百餘人殷士儋李攀龍最知名嘉靖三十年  
卒攀龍爲文以祭士儋表其墓學者稱三山先生

趙時中歷城人永樂間知南安府爲政廉勤勞於撫字名聞鄰境  
趙紳歷城人永樂九年舉人初授監察御史激揚有聲劾尙書金  
連出爲揚州府同知後陞山西叅議轉江西皆卓然有政績以

### 濟南府志

#### 卷四十九

人物五  
明 歷城

二

老致仕朝廷念其廉介賜半俸養老

歷城縣志按明史金濂傳濂數爲御史所劾紳與同時所劾  
蓋濂也七卿表無所謂尙書金連者應是傳寫之誤而山西  
通志載此事亦誤作連

薛理歷城人永樂二十二年進士授行在戶科給事中宣德初中  
官驕橫理論劾剴切尋授衡州府知府嘗捐俸資給士之貧乏  
者在郡數年以疾乞歸

劉純歷城人正統十年任嵐縣令剛直不阿人皆稱頌

尹宏字克寬世爲歷城人貢生宣德二年任温州府同知先是軍  
衛縱橫民罹其虐宏一以禮法制之期月帖然亢旱竭誠致禱  
隨應歲轉大孰以艱去正統中任泉州知府廉公愛民留心教

養撫字益勤旱禱輒雨歲因不荒卒於官寮人肖像祠之仍葬其衣冠郡城東立碑頌德歲時致祭家下

歷城縣志按舊志尹宏無傳但載其爲永樂甲午舉人泉州府知府而閩書謂由貢生蓋明初太學最重宏以舉人肄業國子監故不稱舉人而稱貢生非誤也其温州同知不知卽初任否洛陽劉健作其子文神道碑有云公之先考贈太保公同知余郡是宏又嘗爲河南府同知亦不知其於温州孰爲先後也

尹同仁宏之子也正統丁卯舉鄉試第一明年捷進士改翰林院庶吉士授刑科給事中景帝時國事危疑每建白多傅正議天順初遷左給事中嘗奉事殿廷英宗見其儀觀瓌瑋欲大用之

### 濟南府志

#### 卷四十九

人物五  
明 歷城

三

累遷通政司左叅議冊封安南國王至廣東聞黎琮弑立乃奉聞還京五年督餉陝西言邊騎芻秣不敷宜開中鹽或卽塞下募民輸納緣事官吏及雜犯皆得入芻贖罪請勅部議又言西邊輸輓動經數百里外平涼之人旱疫相繼又遭徵發漸以逃亡轉而爲盜卽寇患可除而隱憂方大帝以爲然詔邊將亟畫戰守毋重困農民以母喪歸明年驛召至京擢吏部右侍郎久之轉左成化初出董漕事事集王翱李秉崔恭姚夔相繼掌銓同仁才畧通敏無滯四尚書皆倚重之時在廷諸大臣南北各私其鄉黨遂與掌吏部者見忌尤易王翱最號剛正在位爲久自秉以下不久輒罷而劾秉者爲給事中江西蕭彥莊北人譁然指爲南黨善傾危而內閣執政固南人也頗患之乃進恭

以彈謗甫數月恭以憂去及薨爲尙書好引用南人北人搆以  
蜚語至曰斬却姚夔頭去祭王翺墓彭時欲召崔恭於南京同  
仁佐銓久不得已而用之旣爲尙書甄別人物隨才授任各得  
其職凡經銓注雖稠人小吏旣久猶識其名奸僞無所售而考  
功一以典例行之一時選人皆以爲能加太子少保至太子太  
傅凡典銓者十四年方士李孜省貴幸數子同仁不應大學士  
萬安與學士彭華皆有所干請同仁亦不可又嘗應召陳言請  
罷傳奉下部同仁持之故孜省惡之尤深於是安華孜省比而  
謀同仁而是時大學士劉瑯同仁鄉人也位亞於安華憚之不  
得行旣而瑯免官歸安引尹直入閣共謀搆同仁顧未有以發  
也而同仁子侍講龍頰通賂南人譁之同仁鄉人兵部郎中鄒

濟南府志

卷四十九

人物五  
明 歷城

四

襲坐事謫官而蔚州左指揮使張旺等奏留之下部議同仁請  
可其奏孜省遂從中譖之傳旨切責安又使邏卒刺得襲旺交  
通狀並下旺等獄罷襲爲民而安等風言官弁劾同仁奪太子  
太傅踰月東廠官校劾得龍陰事下龍詔獄於是言官復劾龍  
竊父權大開倖門而同仁縱子枉法失大臣體有旨執龍拷訊  
辭連多官獄具除龍名同仁致仕侍郎耿裕以失救正停俸有  
差侍郎鍾倡奏管絃等皆相繼罷斥言官累疏薦同仁同仁已  
老不果用宏治十六年卒年八十二贈太子太保諡恭簡

尹龍字舜臣同仁之子成化五年進士改翰林院庶吉士授編修  
未幾轉侍講萬安嫉言官劾其招權納賄逮下詔獄命三法司  
錦衣衛廷鞫之遂黜爲民先同仁卒

歷城縣志按尹同仁明史無傳傳維鱗明書載入姦回傳詆之甚力蓋據尹直瑣綴錄而爲之殊非公論惟孝宗實錄稱其在吏部先後二十餘年甄別人物隨才授任各得其職畧無貶語明史黨列傳亦最平允灼艾別集云同仁掌銓衡十八九年選法公平士有定守萬安深嫉之然同仁在吏部久公論已定又劉珣在內閣能持正論及珣以讒罷安引尹直入閣託所私道士李孜省譖同仁下其子侍講龍於獄令同仁致任連及同鄉故舊皆降謫外補才望如鍾傑張海輩亦貶謫吾學編云公選法通敏賢愚皆悅當時謠曰公道不如王恕選法不如尹文蓋同仁物望之重如此以直瑣綴錄行於世或有不辨二尹邪正者王貽上引月山叢談辨之詳矣

濟南府志

卷四十九

人物五  
明 歷城

五

龍官侍講舊志作侍講學士誤

按胡志辨尹恭簡與尹直兩人邪正已爲分明然明代黨禍此時已萌但未至季年之熾耳湯文正爲理學名臣所擬明史黨定可取信故備登之以俟考

王允字執中歷城人少孤勵志讀書事母曲盡孝養母卒廬墓三年有司上其孝行旌表正統二年進士景泰元年巡按直隸奏浙江安吉縣賊首梅富等越寧國縣劫掠僉兵部移文南京并鎮守浙江內外官員及巡撫巡按御史設法勦捕三年知温州以恤艱弱去蠹弊爲首務山賊出沒羅陽允親入巢穴計擒之故宦裔高士遜孫女鬻爲婢代贖之爲擇配稅糧積欠累萬根究弊由糧長不月餘數足俗好競渡每致溺斃禁之歸其舟爲

官渡仕至左叅政及按察使成化五年復除湖廣左布政使

李森字時茂歷城人天順元年進士授戶科給事中負氣敢言憲宗立上疏請禁朝覲官科斂徵求爲民害者吏部尙書王翱請從其言帝爲下詔禁止頃之言近有無功而晉侯伯都督者有無才德而位九列者有以畫奕彈琴醫卜技能而得官職者名爵日輕廩祿日費是玩天下之公器棄國家之大柄也自今宜擇人授毋令匪才競進且請嚴軍官黜陟覈逃伍虛糧皆報可御史謝文祥以劾姚夔下獄森偕同官救之不納明年夏日食瓊山縣地震森疏陳十事未幾以貴倖侵奪民產率諸給事言昔奉先帝敕皇親強占軍民田者罪毋赦投獻者戍邊一時貴戚莫敢犯比給事中邱宏奏絕權貴請乞陛下亦旣俯從乃外

濟南府志

卷四十九

人物五  
明 歷城

六

戚錦衣指揮周政求武強武邑田六百餘頃翊聖夫人劉氏求通州武清地三百餘頃詔皆許之何其與前敕悖也彼谿壑難厭而畿內膏腴有限小民衣食皆出於此一旦奪之何以爲生且本朝百年來戶口日滋安得尙有閒田不耕不稼名爲奏求實豪奪而已帝善其言而已賜者仍不問山西災山東及杭紹嘉湖大水森等請蠲賑帝並從之時帝未有儲嗣而萬貴妃專寵後宮莫得進言者每勸上普恩澤然未敢顯言妃妬也惟森抗章爲言帝心愠森已再遷左給事中會戶科都給事中缺吏部列森名上詔予外任部擬興化知府不允乃出爲懷慶通判未幾投劾歸不復出

按李時茂傳據明史錄出歷城志又從憲宗實錄增入奏疏

四通較明史稍詳其條陳十事一正心二謹學三親賢四無  
逸五納諫爲修德之要六重民七卹軍八用賢九選將十抑  
奢爲行政之目又陸通志載其每奏先昇棺於外又因劾萬  
貴妃家人譴定州同知未任而卒亦與史異附記於此俟考  
林瑛歷城人天順閒以監生任漳浦知縣當兵燹之後民不聊生  
頑梗自恣瑛問疾苦休息之犯輒不貸澹泊簡重僚屬清肅  
盧獻字世賢其先秉強人自四世祖遷於歷城縣祖盡潔爲鄉飲  
賓獻補諸生從教諭周禹受春秋景泰四年舉鄉試肄業國子  
監成化二年授蔚州知州蔚州衛軍士暴劫鄉民獻力禁治民  
有冤獄累年弗白者獻爲直之十年軍民皆化焉丁大父憂服  
除補宿州六年巡撫張鵬巡按馬進薦其治狀賜羊酒綵幣獎

濟南府志

卷四十九

人物五  
明 歷城

七

襄忽疽發於背卒年四十九蔚州民有爲制服者

趙璿字文璣世爲歷城人璿由貢生試政都察院有能聲授山西  
遼州知州以平易治民諸廢具舉九年報最擢河東都轉鹽運  
使司同知入羨出均課無所紕致仕歸成化十六年年七十卒  
曾孫繼本

趙繼本字承德號蒙泉璿之曾孫嘉靖十四年進士改翰林院庶  
吉士授廣東道監察御史巡按南畿勦賊有功劾論焦維章高  
僊貪穢不檢時上欲南狩抗疏止之下獄三日督學北畿多士  
翁然嚮風卒於官孫天開天啟三年舉人有著述

鄒萼字繼芳濟南衛人成化二年進士仕南京兵部武選司郎中  
居官清苦及歸杜門不出三十餘年以詩文自娛士大夫往謁

者未嘗干以私鄉人推重之

劉璣字廷珍濟南衛人成化四年舉鄉試第一明年成進士歷官刑部郎中大理寺丞成化二十三年貶知連州政教嚴明遠近相戒無敢犯明年遷蘇州府同知宏治十年六月以都御史巡撫大同請給守墩官軍之在大邊者月行糧一石二邊者五斗腹裏者三斗從之七月上邊備事宜一集士兵一足兵馬一申舊例一足戰馬兵部覆奏謂士兵可招集然不必按籍拘選甲仗及馬皆官給之威遠衛止就召募舍餘數內有願充當一軍者陸續編入足一千五百名而止山西民壯令所可仍選年力精壯者應役馬價令太僕給銀二萬止以買馬不可移以償商人舊負之數其所擬減損納馬納銀格例良是從之十二年虜

濟南府志

卷四十九

人物五  
明 歷城

八

陷馬營遣給事中吳世忠等往按之別用大理寺少卿

歷城縣志按劉璣濟南衛籍憲宗實錄成化二年閏三月庚子命都指揮劉政子璣襲父原職乃別是一人璣父名文華以璣貴初封刑部廣東司主事再封刑部福建司郎中又贈都察院左僉都御史亦可知璣所歷官也

張璣其先定州人元末有名敬中者籍於歷城縣敬中生璣永樂間舉人官南京後府經歷璣生諒府正術諒生禧

張禧字用和諒之子成化十一年進士授襄陵知縣入爲御史憲宗末年數管言官禧力諫又常劾妖僧繼曉方士鄧常恩等帝心惡之出按江西盜賊多強宗佮僕禧與巡撫閔珪交奏其事尹直等搆之乃貶珪而坐禧尹同仁黨謫柳州判官宏治初擢

河南僉事進奏議以協治黃陵岡遷副使十五年進按察使兼  
官河南久屢遭河患督治有方民爲立祠是年秋擢右僉都御  
史巡撫遼東時軍政久弛又許餘丁納貲助驛遞給冠帶復其  
身邊人競援例避役罷言不可因條上定馬制核屯糧清隱占  
稽客戶減軍件數事悉允行尋劾分守中官劉恭貪虐罪築邊  
牆自山海關迄開原襄陽堡凡千餘里遼撫自徐賁後歷張岫  
張玉陳瑤韓重四人多得罪去至鼐稱能武宗立移撫宣府正  
德改元召還尋進右副都御史署院事有知縣犯贓當褫職卒  
殺人當抵死劉瑾納重賄欲寬之鼐執不可出爲南京右都御  
史焦芳子黃中欲強市其居昇通政魏納鼐不從芳父子亦怨  
之會瑾遣給事中王翊等覈遼東軍餉還奏芻粟多泔爛遂以

濟南府志

卷四十九

人物五  
明 歷城

九

爲守臣罪逮鼐及繼任巡撫馬中錫鄧章前參政冒政參議方  
矩郎中王蓋劉鐸下詔獄令其家人輸米遼東鼐坐輸二千石  
以力不辦繫遼東久之總兵官毛倫等具奏諸人苦狀請得折  
價瑾勉從之閱三年事始竟皆斥爲民瑾誅復官鼐前卒世宗  
初予卹子齊

張齊字宗魯鼐之子年十六從鼐之郴州歸補諸生舉宏治八年  
鄉試入太學正德元年鼐爲瑾所構又從之獄橐餽愈益謹八  
年授金華府同知俗故健訟齊先繩其枉者片言伏之餘逮立  
遣有李江者殺父妾而無毒迹齊廉得其實置於理眾稱神明  
再攝衢州皆有能聲嘉靖元年滿九載且行過潛見築甬道長  
竟縣者爲白臺省罷其役無何遷涇府左長史時始封尉卒無

常食齋請給廩者三年人甚德之四年卒子汝椿歷泰安宣海  
二王教授

趙璧字潤夫歷城人成化十四年進士授刑科給事中時萬妃家  
人驕橫璧奏劾謫榮經主簿天水六番高陽二招討讐殺不止  
璧奉命往諭至則帖服酬以金帛不顧宏治改元調無爲州判  
官尋遷知州又遷陝西僉事行部至永昌金川堡遇敵千餘騎  
璧挺身與鬪斬首數十級奪馬數十匹尋卒於官朝廷嘉其功  
遣官以羊酒祀其家

邊節字時中其先淮陰人元至正開節高祖朝用徙歷城冒王姓  
三世至節父宣始復邊氏宣仕至應天府治中節脫乳卽善記  
誦有至性宣爲舉人時居京師逆旅疾傳語至家節祖母萬母

濟南府志

卷四十九

人物五  
明 歷城

十

王皆泣曰誰可往視者節年十二應聲曰兒可往請行萬王難  
之節伏地泣曰至親莫如父子兒不行是弗子也且甘羅十二  
爲秦上卿使燕趙兒何獨不能往耶使里人相之至則已愈人  
以此奇之成化二十三年舉鄉試卒業太學正德元年授代州  
知州地多豪家強橫不服役節召父老與言君子野人之分使  
布告諸豪咸帖帖率教獄多繫囚皆頑慢不時入賦者節釋之  
與定限使人賦賦不及限而至巡按御史集故劉瑾私人行部  
屏人與節語降色求賄節不與坐劾免官歸惟日飲酒不問家  
事郡大夫欲舉節鄉飲大賓或以其劾免難之大夫曰乃邊公  
所以爲賢也卒舉之節修美仇爽善口辯自號介菴嘗曰吾慕  
蘇子卿之爲人幸他日第進士必以漢卿易吾字竟不果正德

六年卒年六十二子貢

邊貢字庭實號華泉節之子貢生有異質襁褓中從祖母王受章句輒成誦宏治八年舉鄉試第四明年成進士授太常博士時孝宗重祠事貢駿奔惟謹偶以告不與上私語左右曰何不見年少官人耶十八年擢兵科給事中會孝宗崩上疏劾太監張諭與太醫劉泰高廷和用藥之悞又劾太監苗遠與保國公朱暉都御史史琳用兵之失辭義剴切聞者凜然遷太常寺丞以不善事劉瑾出爲衛輝知府正德五年改荊州時藍鄙寇亟飛輓之務貢以身任之民不擾而事集治行爲天下最六年擢山西提學副使父憂服除起河南提學申條教勤考校士風大振十二年以母憂歸世宗卽位卽家起爲南京太常寺少卿嘉靖

濟南府志

卷四十九

人物五  
明 歷城

十一

二年晉南京太僕寺卿貢徵求故譯是正諸文以成一家之學七年轉刑部右侍郎拜戶部尙書皆在南京貢早負才名美風姿所交悉海內名士久官留都優閒無事游覽江山揮毫浮白夜以繼日十年右都御史某劾其縱酒廢職遂致仕歸築萬卷樓於湖上蓄書籍金石古文甚富十一年火幾盡貢仰天大哭曰甚於喪我也遂發病卒年五十七賜祭葬明自永樂後辭尙纖弱貢與李夢陽何景明徐正卿起而振之號宏治四傑又益以康海王九思王廷相爲七才子去廷相以朱應登顧璘陳沂鄭善夫爲十才子貢詩清婉和粹稱其爲人而縣人爲詩者實以貢爲首庸子二長翼以廩爲太學生官光祿寺丞

邊習字仲學貢之次子能以詩世其家貢固廉吏習貧困負薪授

徒取給體粥有詩一卷

張良弼字夢徵號懲軒其先信都人元至正末有占籍歷城縣北會清鄉者良弼高祖也祖禮敦儒行爲鄉飲賓爰進灤州判官良弼五歲能作字年十三聞御史梁澤較科舉士良弼自懷卷給闈者入梁視其文甚異之竟許入鄉試及父官灤州良弼遊京師學於邑人王勅程福蠶糶歲一至灤省覲成化二十二年舉於鄉宏治六年成進士觀政吏部一日尙書耿裕問諫於諸進士良弼立對數百言謂君子諫有三重而顯身不與焉世爲上民次之君又次之體恒事經世之維也情安業輯民之庇也合德溢美君之懷也徇民而妨世諫之陋也逢君而厲民諫之蠹也表已而章君諫之賊也裕以爲名言言於帝擢戶科給事

濟南府志

卷四十九

人物五  
明 歷城

十一

中封駁咸關大體未幾勅視光祿寺及請內藏無所私爲中官所憚連丁父母憂十六年服除補原官十七年命勘延綏邊儲延綏本荒服前膺命者率取成牒而返良弼歷山砦搜散逸會計稱當中貴按土著例饋百金峻拒之十八年八月遷兵科右給事中十月遷禮科左給事中時武宗卽位劉瑾竊柄良弼抗疏數其罪上心動責瑾瑾力搆之良弼且病強命勘宣府倉而日使衛卒至臥內假視病伺之及赴宣府復誣以姦黨榜姓名於朝與大學士劉健等五十七人皆落職正德二年三月十五日也五年瑾伏誅諸得罪者皆錄用良弼獨不與朝貴通書問十二年吏部尙書陸完疏薦起湖廣叅議提督太和太嶽諸宮觀至襄陽下令數十條以厚風俗奠流亡爲務太嶽故設內侍

司香儀人且預宮觀事良弼曰安能與若輩一朝居耶以病求去抵家卒年五十八子延壽德府典簿

劉緒字繼志歷城人父璟鞏縣丞以廉著緒少有志操宏治五年舉於鄉肄業國子監久之選高邑知縣俗狡詐好訟獄多積牘緒立判曲直良民偃之巨盜掠鄉聚緒率眾捕其渠脅從者皆屏息時招諸生講授爲文之法甚有政聲知府楊某索金不得嘆之又以言忤巡撫羅某會豪民曹惠者匿罪人緒捕之急惠乃誣他事控於羅羅窮治無左驗謀於楊楊曰是何須興大獄卽考以殿無弗黜矣竟奪其官正德五年也歸里以教授自給卒年五十六子天民

劉天民字希尹號函山緒之子少病瘖九歲遇一嫗刺其十指而

濟南府志

卷四十九

人物五  
明 歷城

三

愈就外傳日記千言隨父讀書京邸遂通經史年十五補府諸生正德二年舉鄉試九年成進士父憂歸服除授戶部福建司主事俄調吏部文選司主事舊例吏部需人非久試者不得調調亦不卽文選天民負重名故其調速而美著讀選便覽雖有益吏治而時不能行十四年諫巡幸罰跪五日廷咎三十嘉靖元年署本司員外郎二年實授遷稽勳司署郎中時薛惠在考功與天民齊名有省中二彥之目三年泣諫大禮復廷咎三十余寬調文選郎中未履任謫戍人謂寬能吏難其繼天民新繫蒙釋恐不得調已而命下識不識皆慶得人天民感知遇大推小補盡秉公剔滯拔淹甚厭眾望時論嘉靖初掌選夏虞中之執天民之敏皆僅見者給事中陳某嘗著補衣見部爲天民所

斥乃上疏指摘對品調壽州知州給事中趙漢御史戴金等八  
上章論救不報凡京官外謫者出都門多以眼紗自蔽天民過  
故部部方驗封吏數千咸集有識之者曰此吾恩主無罪左遷  
者衆擁之馬不得行天民擲眼紗於地曰吾無愧於衙門使諸  
君得見吾面目耳縉紳憐其去祖饒三日始已抵任值歲饑饉  
災振乏民無菜色七年遷南京宗人府經歷八年遷南京刑部  
廣西司郎中九年遷河南按察司副使分巡大梁時上命刑部  
錦衣衛鞠河南囚重刑者一千五百餘人得平反者幾七百人  
天民力爲多嘗語人曰吾之遺子孫者祇此足矣十一年爲御  
史胡某所論以才力不及改四川去汴日士民攀泣日夕始出  
郭十四年考察以冠帶閑住遇恩詔致仕歸則日集賓友嘯傲

濟南府志

卷四十九

人物五  
明 歷城

古

山水閒天民詩有風格多闕時事似杜甫晚年好爲詞曲爲章  
邱李開先所稱善談論益都黃卿嘗曰同一語出函山口便有  
意味家居二十年巡撫李上章論薦命未下而天民無病卒年  
五十六天民母張娠十二月而生無乳庶母章棄其二子而乳  
之二子遂天章歿天民感其恩爲服喪三年子三長浦府學生  
後多顯者

歷城縣志按壽州志云天民嘉靖四年知壽州崇獎節孝懲  
刈頑梗立鄉社以厚風俗北門石橋久圯增修二百餘丈積  
穀三萬石備荒此開先所不及附錄於此

劉亮采字公嚴緒之曾孫也爲人警敏和易萬歷十九年舉人明  
年成進士授鹿邑知縣縣軍民混雜稅糧隱詭吏莫能究亮采

各正其籍又善決疑獄頌聲大作父憂服除補蘭陽蘭陽舊苦  
河患嘗漂沒民居亮采策其便鳩工築要害凡十八日而竣又  
革俵馬及敝夫之役一時裨政悉捐以上考召爲戶部主事病  
歸築室靈巖寺高巾道服以終老亮采嘗作歷城縣志未就工  
詩及書畫時稱三絕通音律以舌抵齶作韻可與絲竹合奏夢  
神人授以詩覺而繹之知將終乃旋里卒年六十五

歷城縣志接河南通志亮采知蘭陽教士恤民鋤強矜弱築  
隄修城去之日士民攀留百里不絕祀名宦靈巖志載其退  
居林下於靈巖寺構面壁齋詩酒自放士大夫聞風而造廬  
與遊者接踵焉

李澤歷城人成化二十二年舉人正德間任保德州知州澤先官

濟南府志

卷四十九

人物五

明 歷城

五

沔縣晉忻州知州及莅保德興除利病不遺餘力民皆愛戴武  
宗幸山西糧餉不給澤奉部院檄召買唐家會未旬日得米三  
百石草十萬束公用充足中外賴之後以疾求去送者載道祀  
名宦

周溥字宗大歷城人景泰七年舉鄉試第一由教諭遷元氏知縣  
生平無他嗜好惟積書至數千卷遂自號書樵其爲詩文刻苦  
精融一時咸宗師之卒年五十有九子三人伯程仲導季秀

周秀字公全溥之季子少好學尹同仁重之曰周元氏不亡矣宏  
治五年與程同舉於鄉計借京師名藉甚士子從之游者多成  
名蔡天祐黃臣其尤著者選蒙城知縣甫三月謫清豐丞時巡  
游多事捧檄奔走致疾嘉靖初吏部尙書喬宇薦知上元處繁

裕如未幾復薦爲懷慶同知與守不和鬱卒年六十三當正德  
初劉瑾竊政羅織士大夫中以慘禍海內側足而立聞秀名招  
致之或勸勿往秀笑曰是非爾所知也竟往見瑾問象緯曰左  
傳云天道遠人道邇問兵謀曰虞書云舞干羽於兩階七旬有  
苗格問術數曰有漢眭宏夏賀良儒生之覆轍也遂大忤其意  
留旬日遣歸及瑾敗或問見瑾何也秀曰吾不往見則禍及吾  
伯仲矣時程知寶珉縣導爲嘉興知府也及秀知蒙城宦豎邱  
德守鳳陽大肆誅求秀毅然弗從以狀聞上官德乃誣搆之被  
逮下錦衣獄拷訊幾死已而謫清豐卽墨藍田志其墓謂秀始  
見瑾跡類陳太邱云程字公度導字公慶宏治十二年進士

徐暹字進甫歷城人父貴以扈蹕功授江西鉛山所大使有善行

濟南府志

卷四十九

人物五  
明 歷城

六

暹幼嗜學貴恐致病每讀書至夜分趨窗下止之暹匿燈俟父  
寢仍默誦不倦宏治五年舉於鄉三上春官不第恐親不逮養  
焚香願天願以壽易祿十五年登第試政都察院而父卒朝夕  
哭謁墓側終喪如一日授南京工科給事中時劉瑾方竊柄暹  
抗疏論之械繫錦衣獄笞八十黜爲民凡七年足不入城市瑾  
敗用御史周期雍薦起山西按察司僉事晉府官以事餽金暹  
叱之去卒論如法正德八年巨寇混天王擾三晉暹與副使張  
璉設方畧殲其魁民爲之謠曰不發一矢賊乃盡死不荷厥戈  
賊死實多以功僉副使憂勤確疾卒於官年四十九暹慷慨仗  
節聲動朝野然性恬退被黜耕薄田以自給無纖毫歛望意有

功輒以讓人不自伐人尤難之

歷城縣志按山西通志載暹爲南京工科給事中奏留劉健  
謝遷繫詔獄廷杖除名與此小異要之爲忤劉瑾耳

祝壽字靜菴歷城人正德三年進士由兩淮運同擢守黎平剛正  
沈毅禁令整齊編置里甲民皆稱便賢聲上聞遷雲南叅政  
李瑛字敬之濟南人正德中由舉人知南皮縣時畿內流寇勢張  
城多陷惟南皮捍禦甚備賊所至皆有內應瑛燭其姦預拘無  
籍假他事收禁之城以克全

董昌字文隆號東溪歷城人祖正武安縣丞父瑩嗜佛經而昌好  
詩書學於伯父平山知縣璽宏治十一年舉鄉試第六入太學  
久之選新河知縣值流賊至城久圯無備驅市民拒守身被數  
十創頸筋斷者三取葫蘆瓢包領下得不死以城陷降許州判

濟南府志

卷四十九

人物五  
明 歷城

七

官踰年遷定遠知縣尋丁父憂服闋補太湖縣多逋賦以信誠  
開誘之民竟樂輸時討寧王宸濠兵道出太湖供億餽餉倉卒  
能辦而民不知厲以勞賜銀牌彤幣擢揚州通判以童奴受金  
罷嘉靖十四年年七十卒

江濬字子泉其先棗強人有名湖者遷於濟南城西門外方水而  
居人謂之江家池湖子秀徙城東四十里杏園五傳至濬舉正  
德十四年鄉試嘉靖十四年授正定知縣縣有黠少年裹石豪  
中而假宿館人旦發其裝佯驚謂或寢其金易以石獄且成濬  
至鞫其金所從來曰舉諸子錢家備引子錢家無應者少年遂  
伏罪居四年以薦入爲四川道監察御史從幸承天除道滬沱  
河檄有司作舟爲梁覆土其上列楹屬之車駕稱便十八年巡

按隆慶劾大同總兵下吏及再有寇遂以捷聞賜金幣加俸一級後遷大同知府核晉宗人祿簿懲干謁之弊有爲子甲聘女而甲沒欲以妻其子乙者女旣改適訟於濬濬命以後壻之聘三十金償前壻家人服其平允久之遷陝西按察司副使整飭洮岷邊備道一年歸又十五年爲嘉靖四十四年年七十八卒子如錦縣諸生

周尙忠字本誠歷城人始祖政良元至正初以淘金官來居大清河北遂爲縣人尙忠年十二補諸生爲學使畢所器異喪母不飲酒食肉者五年宏治五年歲饑鄉人貸其財不能償者尙忠勸其祖爲焚券後羣盜過其廬相戒曰勿驚周先生尙忠通毛詩從學者前後五六百人嘉靖五年歲貢授葉縣訓導立教以

濟南府志

卷四十九 人物五  
明 歷城

六

持敬爲主又日爲士講經義越三載投牒歸十五年卒年七十四子三居邠諸生居岐字伯康嘉靖四年舉人官葉縣知縣著有文則詩則二書居魯由歲貢舉嘉靖十三年順天鄉試孫六學六學子繼

周繼字志齋六學之子嘉靖十四年進士授任邱知縣歷任太僕卿應天巡撫勅條鞭法疏奏報可天下便之時劉汝國叛旋經勅復上賜銀幣勞之遷南京戶部侍郎歷官愛土恤民本諸天性課試諸生講藝談道無倦期士習翕然丕變尤精陽宅之術著陽宅書若干卷

歷城縣志按舊志謂周繼勅條鞭法而江南通志云一條鞭之法創於海忠介瑞不知孰是王文肅集有與周志齋巡撫

書數通多言賦稅之事亦未及一條鞭也

陳朝字子虛號近山歷城人嘉靖五年進士任建昌推官臨事無大小立見隱微嘗督造圖冊工省弊清前後有司無能及者兩署縣篆俱著能聲後陞臨洮知府有殲虎除妖之政及解組歸布衣角巾徒步懷刺有古人風

范瑟字孔和其先東平人元末有名恩温者避亂於歷城縣之天馬山因家焉五傳至瑟瑟十餘歲讀書山中二龍窺其牖又聞天樂作雲中嘉靖十一年第進士改庶吉士父憂服除授翰林院國史編修進經筵講官十七年分校會試明年謫開州判官身勦巨寇遷大名尋擢南京戶部主事歷員外郎郎中二十四年入賀遷四川參議上川南道駐雅州及嘉定先是都蠻之叛

濟南府志

卷四十九

人物五  
明 歷城

九

守臣檄兵討之輒爲所抗瑟乃身往諭以朝廷威信都蠻稽首謝請內屬如故二十九年再入賀拜陝西副使分巡西寧道明年二月征羌道遇暴風起東轉西瑟曰羌豈舍掌吉而就紅崖乎乃趨紅崖羌果至迎擊大敗之復戰斬其酋長九人八月又數其酋長爲爾定等羌遂平屬北虜徼塞遣百戶李堂齎牛酒詣其王俺答不亥曉以利害明日獻馬十四謝三十一年虜更寇三川瑟將兵三千禦之復破其眾於紅崖斬首數十級并殲肯騰狼台吉事聞尙書上其功未報明年以他奏報免其官四十年卒於家

歷城縣志按陝西通志范瑟字柏峯爲副使文武通材性剛

直愛禮人士莅任時屬蕃驕橫攻打堡塞烽烟四起諸將不

能禦寇至練兵馬運糧於西川各總堡分伏官兵爲持久計  
已而乘虛自領奇兵潛擣碾伯水溝大捷又下捕賊之令有  
能三人共捕斬一名者賞銀十兩本賊馬匹器械卽給之於  
是無一生蕃敢至界者

吳聞詩號養齋歷城人嘉靖十一年進士性磊落不羈知天長縣  
飲酒賦詩不廢吏事祀於鄉

金城字邦衛歷城人嘉靖十七年進士以御史巡按福建值佛郎  
機夷人入漳州檄道海副使柯喬禦之効浯嶼把總丁桐及去  
任副使姚翔鳳受夷人金縱之入境乞正其罪同安覆鼎山賊  
猖獗掠漳泉諸縣城與巡視浙福都御史朱執督官俘獲因條  
上便宜四事其一白葉坂雲嶺地方跨龍安二縣百餘里山林

濟南府志

卷四十九

人物五  
歷城

二十

險阻實爲盜藪請卽其地創建二堡并立官舍歲令漳泉二衛  
守之而白葉坂尤險遠孤危宜移源口渡巡簡司官兵協守其  
二覆鼎白葉坂賊旣殄滅其中山田可籍入官給軍耕種其三  
武平永定諸處乃守備俞大猷汎地前爲漳州所調致覆鼎賊  
起倉卒失防今宜行鄰省無輕調遣俾守土官各盡其職其四  
地方遇警因損軍令嚴輒不敢動調一軍而募鄉兵拒敵所養  
非所用今宜通行領兵官凡有警俱依北邊例調官軍征勦其  
勇往者雖殺傷仍上功幕府若引避觀望卽全軍無失亦治罪  
下兵部覆議報可後遷蘇州知府三十一年考績北上歸有光  
爲人作序送之有云郡吏治抗敵疆場靡寧詔使旁午責數年  
之逋負於俗奢民貧災殫凋瘵之餘寬則廢上供急之則傷民

命金公鎮以寬靜處以宏簡不震不竦能使上安而下服之可謂難矣

薛樟字子喬歷城人事親孝嘉靖二十三年進士授山陽知縣擢廣東道監察御史疏劾嚴嵩遂挂冠歸嵩敗臺省屢徵不起所著有蘭臺奏議諸書

歷城縣志按明史彙纂臣傳前後劾嵩世蕃者謝瑜葉經章漢臣趙錦王宗茂何維柏王華陳瑄厲汝進沈鍊徐學詩楊繼盛周鉄吳時來張紳董傳策皆被譴經鍊用他過置之死繼盛附張經疏尾殺之他所不悅假遷除考察以斥者甚眾薛樟之名不見於史而舊志距樟時尚近不宜有誤俟考

張嵐字華巖歷城人嘉靖二十三年進士官至山西叅議事嫡母

濟南府志

卷四十九

人物五  
明 歷城

三

曲盡其孝居喪三年不見婦女莅官清廉居鄉醇謹鄉評以爲人物稱首孫廷彬羞出例金遂屢舉鄉賢不果子志萬歷五年進士仕至湖廣叅議

洪遇歷城人嘉靖二十三年進士知秀水縣先是民覲輕役多析戶寄產遇令民自疏歸併賦均而不擾歲大饑自鬻者眾不待上聞亟發廩賑之全活者無算後陞西安府知府

殷衡歷城人其先居武定父旺爲德府審理正衡以永平訓導入爲德莊王教授從之國濟南以勞績進審理正遂家焉旣致仕王以師傳舊恩爲畫像製贊使就其家存問比卒而永平諸生祀之學宮子峻

殷峻衡之子成化十六年舉人家世傳禮經靈寶許氏遺二子諱

讚從學詣至戶部尚書讚至大學士後卒業太學與襄垣劉氏同舍劉二子龍夔從學龍至兵部尚書夔至都御史一時言禮者奉爲山東大師子汝麟

殷汝麟岐之子生八歲孤不能就學一聽伯兄所爲獨取敝惡具財物盡與兄數年兄盡破其產汝麟輒復分與之後兄在德州逆旅病疫且革主人問卽不諱孰收子者曰有弟愛我徒以素遇之少恩恐其不來耳會汝麟家亦有病疫者或諷勿往汝麟曰伯兄赫然在原隰而可以內爲解乎亟與其親歸汝麟與章邱翟洪友翟客濟南病卽昇至家視粥藥四十餘日沒爲具棺殮年六十八卒卒之夕出書一帙付子士儻曰此我所見聞陰德事也爾他日勿負朝廷而虐百姓吾目瞑矣

濟南府志

卷四十九

人物五  
明 歷城

三

殷士儻字正甫汝麟之子嘉靖二十六年進士選庶吉士授檢討久之充裕王講官凡關君德治道輒危言激論王爲動色遷右贊善進洗馬直論如故隆慶元年擢侍讀學士掌翰林院事進禮部右侍郎未幾改吏部明年春拜禮部尚書掌詹事府事其冬還理部事四年正月朔望日月俱食士儻疏請布德緩刑納諫節用飭內外臣工講求民瘼報聞以舊恩進太子太保時寒暑皆罷講士儻請如故事四時無輟并進講祖訓及大學衍義貞觀政要帝嘉納之始世宗定宗藩條例親王無後以兄弟及兄弟之子嗣不得以旁繼嘉靖末肅懷王薨無子其大母定王妃請以輔國將軍縉熾嗣禮部議縉熾實懷王從叔不可承祧詔許以將軍攝府事及帝卽位王妃復請前尚書高儀執不可

縉燼重賄中官屬宗人爲奏祈必得士儻持之甚力帝以肅藩越在遠塞不王無以鎮之遂許縉燼嗣士儻爭曰肅府自甘州徙蘭州實內地且請別選郡王賢者理府事毋遂私請壞條例而帝意堅不可奪士儻乃請封爲郡王諸宗率以此令從事帝終不許故事郊畢舉慶成宴自世宗倦勤典禮久廢帝卽位三載猶未舉行士儻始考定舊儀行之十一月命以本官兼文淵閣大學士入閣辦事俄俺答封事成進少保改武英殿始士儻與陳以勤高拱張居正並爲裕邸僚三人皆柄用士儻仍尙書不能無望拱素善張四維欲引共政而惡士儻不親己不爲援士儻遂藉太監陳洪力取中旨入閣以故怨拱及四維四維父擅鹽利爲御史邵永春所劾事已解他御史復及之拱四維疑

濟南府志

卷四十九

人物五  
明 歷城

三

出士儻指益相構御史趙應龍遂劾士儻進由陳洪不可以參大政士儻再辨求去不允而拱門生都給事中韓楫復揚言脅之士儻亦疑出拱指故事給事中朔望當入閣會揖士儻面詰楫曰聞君有憾於我憾自可耳毋爲他人使拱曰非體也士儻勃然起詬拱曰若逐陳公逐趙公復逐李公又爲四維逐我若能常有此座耶奮臂欲毆之居正從旁解亦諍而對御史侯居良復劾士儻始進不正求退不勇士儻再疏請益力乃賜道里費乘傳歸有司給廩隸如故事家居十一年卒贈太保諡文通久之改諡文莊

殷啟賢士儻之孫以廕仕潞安府同知有清操重於時

張存智字應貞別號春溪歷城人嘉靖二十八年舉人任昌黎知

縣縣近塞稱巖邑存智至勸農繕兵甃墉甃泉招集流亡給之田畜二歲始錄之籍自占者萬餘口擢戶部主事進郎中致仕歸

劉宗禹字一中其先世榮洪武閒自棗強遷於歷城之堰頭鎮八世孫徵生宗禹爲殷士儋高弟嘉靖閒舉人授新城知縣遷沁州知州轄三縣農不諳種植之法宗禹循行阡陌親爲指示至秋倍稔其堂兄希禹生遷

劉遷字山谷宗禹從子性剛直豪於詩萬歷十年舉人授商水知縣歷刑部四川司主事擢衛輝知府謁潞王王一見器重之時與尊酒論文時中官多浸漁民利民有訟之者遷置諸理民戴之如父母卒後崇祀鄉賢

濟南府志

卷四十九

人物五  
明 歷城

五

傅延耆歷城人隆慶閒以貢知應州性極端方政惟節愛辦山糧不辭利害值寇訐大有擔當又知祁州有豪右犯法上官屬出之延耆指其冠曰此冠可奪此法不可奪上官愧謝六載卒於

官祀名宦

張紳字仲紳一字士行濟南衛人自稱雲門山樵亦曰雲門遺老少從事戎馬閒洪武中禮部主事劉康薦其明經老儒達於治體可備顧問十五年驛召至京授鄆縣儒學教諭十七年十二月以通政使蔡瑄薦擢都察院右僉都御史十八年授浙江左布政使紳有才幹不屑屑於世事慷慨激烈詞辯縱橫終日齟齬不休工大小篆精於賞鑒法書名畫多所品題撰法書通釋一卷詩格清健若不經意而自成一家論者謂齊東自周公謹

後復有此人

歷城縣志按陸通志載張紳濟南人舊志謂濟南衛人實錄謂登州人蓋紳本登州人而籍於濟南衛也陸志又云以勇略薦而實錄云耆儒明初薦以耆儒爲最重紳與鮑恂余銓張長年同徵而紳後至恂銓長年皆授文華大學士恂等力以老疾辭乃放歸田里而獨用紳可謂曠典矣

王田字舜耕濟南人以縣佐請老歸田材敏喜爲樂府詞膾炙人口遠近傳播山水學高房山不失矩度

王詔字孟宣其先棗強人洪武初徙縣中詔頎秀美顏辭正德五年舉於鄉久之授知定州地當衝要前牧無良去者詔示以誠信獷悍遂息蜀人卓某過定遺百金奔告詔曰第往尋當有守

濟南府志

卷四十九

人物五  
明 歷城

五

者至則果然卓謂其人曰何不攜而去乎曰州人有棄子我公嘗活之我豈忍爾孳轉於我公之境哉御史梁某按部猝入獄惟二匹繫焉因登上考擢開封同知會朱仙鎮盜起陷尉氏詔往擊以計捕首虜於扶溝執訊以還嘉靖十七年河決金相寺口水在地上一丈餘議者謂自孫繼口至清河口百餘里大興卒塞之須十四萬人領吏六百期六月歲事計費且十七萬緡詔是時實注治河往勘曰是在我卽湛祭以徒四萬舉菱而自踏橈理機事三月隄成纔佐吏數十算九千七百餘緡績上賜秩視從四品以母憂歸比服除日吟嘯繙書帖泊如若忘其嘗仕者詔工五言詩與劉天民齊名邊貢稱兩生俱俊傑者在京師交於何景明有句云雨雪逢人日江湖問客星爲時所傳

誦

谷繼宗字嗣興號少岱濟南衛人幼好學家貧嘗走寺廟撿鑪灰取遺炷其母棺爲一束然以照夜讀舉正德八年鄉試嘉靖五年成進士終宜興知縣繼宗嘗以積憂而晉進人依章邱李開先章邱士人爭攜酒穀爲之主居九十日作詩數百篇贈開先長律百七十句雖有目者檢類書爲之不能及其詳雅後遇良醫刺之復明其詩集崇禎十二年燬於火

歷城縣志按歷朝詩集云歷下有劉汝松谷繼宗者皆舉進士有詩名谷亦能填詞而詩俱未工又云嗣興富於篇什以倚待立就爲能故可傳者絕罕又按谷嗣興撰趙繼本墓碑署少岱野史谷蘭宗嗣興而舊志俱作繼宗或通籍後改爲

濟南府志

卷四十九

人物五  
明 歷城

三

蘭耶要非二人也

李寶歷城人以貴事德莊王爲郎善酒任俠不問家人生產妻張氏夢日入懷生子攀龍寶早卒張教之學緝纏以給脩脯

李攀龍字子鱗自號滄溟寶之子九歲而孤家貧自奮於學稍長爲諸生與友人許邦才殷士儋學爲詩歌已益厭誦話學日讀古書里人共目爲狂生舉嘉靖二十三年進士授刑部主事歷員外郎郎中稍遷順德知府有善政上官交薦擢陝西提學副使鄉人殷學爲巡撫檄令屬文攀龍怫然曰文可檄致邪拒不應會其地數震攀龍心悸念母思歸遂謝病故事外官謝病不再起吏部重其才用何景明劾特予告歸予告者例得再起攀龍旣歸搆白雪樓名日益高賓客造門率謝不見大吏至亦然

以是得簡傲聲獨故交殷許輩過從靡閒時徐中行亦家居坐  
客恒滿二人聞之交相得也歸田將十年隆慶改元薦起浙江  
副使改參政擢河南按察使攀龍至是摧亢爲和賓客亦稍稍  
進無何奔母喪歸哀毀得疾疾少開一日心痛卒攀龍之始官  
刑曹也與濮州李先芳臨清謝榛孝豐吳維岳輩倡詩社王世  
貞初釋褐先芳引入社遂與攀龍定交明年先芳出爲外吏又  
二年宗臣梁有譽入是爲五子未幾徐中行吳國倫亦至乃改  
稱七子諸人多少年才高氣銳互相標榜視當世無人七才子  
之名播天下擅先芳維岳不與己而榛亦被擯攀龍遂爲之魁  
其持論謂文自西京詩自天寶而下俱無足觀於本朝獨推李  
夢陽諸子翕然和之非是則詆爲宋學攀龍才思勁鷲名最高

濟南府志

卷四十九

人物五  
明 歷城

五

獨心重世貞天下亦並稱王李又與李夢陽何景明並稱何李  
王李其爲詩務以聲調勝所擬樂府或更古數字爲已作文則  
聳牙戟口讀者至不能終篇好之者推爲一代宗匠亦多受世  
抉摘云

按世以文章推重滄溟而政績畧焉茲以明史爲主而以逸  
事附載於後

攀龍爲山西司郎中有邊將觸法不至死者柄臣子銜其不  
賂必欲置諸辟攀龍力持不可得未減其人卒自奮功名致  
大帥嘉靖三十二年出爲順德知府嫉當世流俗之論以爲  
文士無所短長思以經術綴飾吏治有所興除務便民順德  
故有牧馬場民久耕業其中供繇賦而監司誤以爲營馬牧

地歲增賦至三千金攀龍請悉蠲之將作所徵順德視正定大名諸郡攀龍以爲郡故嘔貧民不當他郡比請裁其費比正定十之三又留永濟倉粟無灌輸京師以餉戍卒增設永年縣傳於沙河邯鄲界中寬二邑力移通判鎮鉅鹿官亭以扼盜衝移巡檢黃榆嶺爲晉趙關前後請白於臺得報可李駒字千里號松盤攀龍之子歲貢生博學能文章有父風王世貞嘗稱之

許邦才字殿卿其先棗強人五世祖伯成遷於歷城父鏊字待時府學生因母疾究方書疾良已邦才少讀書城南山中舉嘉靖二十二年鄉試第一與李攀龍殷士儋遊詩風格近攀龍而無客氣或以爲溫厚過於攀龍初知趙州有裝橐將置而去者妻

濟南府志

卷四十九

人物五  
明 歷城

天

孟叱而擲之無何調永寧行萬里無難色題詩山家藹惻得風人之旨遷德府右長史勘中官某獄又有餉珠珥於孟者孟曰安用此糞土加諸首豈以爲有廉吏未必有廉婦乎四十二年補周府左長史加四品服俸久之卒子復府諸生

潘子兩字潤夫歷城人嘉靖二十二年舉人與李攀龍同時而爲詩自盡其才王世貞謂歷下詩人各騁於康莊之途而無犯轍由知縣仕至行太僕少卿有政聲弟子震莘縣訓導亦能詩

張弓字希仲號月梧歷城人少爲諸生有名舉嘉靖二十五年鄉試第五久不第授淮安通判以才稱同官忌之爲下石罷去歸則杜門守一編吟詩自娛長吏造請皆稱病不見人以此高之

王大儒字汝爲歷城人舊志載其詩二首甚有奇氣

歷城縣志按舊志無文苑傳而有詩人一門所列唐崔融宋李冠元潘昂霄明邊貢等二十七人今於其卓卓者皆爲之傳惟事少無所附者如張邦基有歷下八景詩薛照擅臨池之業亦能詩進士方守地能詩文歲貢董光馬一乾皆能詩趙克塾能詩文張夢兆博學能詩精天文陳彥劉遜楊衍嗣皆能詩選貢賈嗣照有和陳方伯落花吟三十首王德璋能詩文監生李化魯能詩劉謙光博學能詩共十四人又按宋仲良山左明詩鈔所選歷城人又有封術于達楊瑾薛耒張玉珍其詩皆佳附記於此

師必大字東津歷城人祖理昌黎典史父孟深澤教諭必大有文名隨學道楊溥試六府隆慶六年以溥薦授靈壽知縣以廉謹

濟南府志

卷四十九

人物五  
明 歷城

三

聞課士勸農多所振作三載告歸民爲立祠樹碑述異政

于鯨字子長始有于六者從東海徙歷城又六世爲芳鯨其仲子

也少穎異九歲通左氏傳十五補諸生第一太倉王世貞在郡

召至邸試而三覆之謂阿愁不及也李攀龍亦命子駒與之交

許邦才欲得快婿無當意者於路聞見鯨與語曰此正吾倩矣

遂以女妻之而薦於殷士儋嘉靖四十三年舉鄉試隆慶二年

成進士卽出士儋之門試政刑部未幾以母憂歸服除授刑部

湖廣司主事故主事遞閣郡國獄凡有可否悉聽尙書裁及鯨

爲之尙書不能易一字擢河南道監察御史出按正定黜貪墨

撫善良吏民帖然以安順德富人置同姓姬前使深交論適矣

鯨覽而笑曰於禮賈妾不知其姓則卜之何擬之重耶立破械

釋之自餘寃獄往往原情求活然竟以多平反失權相心至鑄  
俸回京師行李蕭然都御史賢之爲奏上報可復故官久之按  
順天順天多戚畹輕俠相通又宦官盧兒寄請爲姦利終鯨任  
無敢犯者嘗行縣漁陽爲將軍戚繼光所部畧鯨按覆軍政甚  
嚴繼光介胄伏謁鯨視之蔑如都下一時傳語謂鯨能屈大將  
軍矣還朝以資久掌河南道萬歷八年監試未幾推掌京畿道  
尋用臺例遷太僕少卿被議罷歸晚懼父憂晝夜號哭遂日委  
頓不逾年卒

劉伯縉字薦卿歷城人隆慶二年進士初任蠡縣遷戶部主事權  
北新關稅溢解二萬四千餘兩守杭州蠲看堂舊例入庫公用  
兩定軍民大變陞陝西按察司副使潞州兵備道嘗自銘曰居

濟南府志

卷四十九

人物五  
明 歷城

辛

則爲端人正士出則爲循吏良臣雖矯俗太激遇物寡諧然自  
茲仕至宦歸無異布素縣人咸仰其清標云弟伯綬

劉伯綬號吾山伯縉之弟萬歷四年舉人歷知浮山順義上元三  
縣所在有聲京兆謁留璫劍皆長跪伯綬獨抗禮璫重其名緝  
江寇理關務以廉敏聞陞雲南楚雄知府加意撫夷境內肅靖  
伯綬生平好學老而彌篤事兄尤恪謹

劉化光字汝化伯綬子天啟七年舉人候選推官戊寅當事俾練  
回兵保護西郭植柵挑壕

大兵至率眾拒守已卯城陷死之

劉漢儀化光之子崇禎三年舉人戊寅守西城父子俱力戰死贈

卹有差

趙強歷城人歲貢生性慈善人呼曰趙佛有盜夜入室強呼家人執火索之不得乃曰吾適爲夢中語非果有盜也家人就寢強曰梁上人可速去勿爲家人獲盜下泣白母老無衣食狀強周之而去逾二年強自縣東鄙歸至山水溝天昏黑有執梃行劫者強驚呼其人辨聲釋梃長跪求恕強曰爾又爲此何也曰母死無櫬耳強至家又厚贈之子應奎

趙應奎字子徵強之子由長史掾授壩上倉大使謹會計執概不爽釜鼓自奉取給家廩改小村鎮巡檢屬有劇賊聚松徐閭上官檄捕之乃率卒往遇賊輒格鬪俘十餘人賊益衆遂爲所獲刃加於胸不爲動從容爲陳說利害賊竟解諸上官皆壯之棄官歸年五十一卒子世卿

濟南府志

卷四十九

人物五  
明 歷城

三

趙世卿字象賢應奎之子隆慶五年進士授南京兵部主事張居正當國政尙嚴州縣學取士不得過十五人布按二司以下官雖公事毋許乘驛馬大辟之刑歲有定額徵賦以九分爲率有司不及格者罰又數重譴言事者世卿奏匡時五要請廣取士之額寬驛傳之禁省大辟緩催科而末極論言路當開言近者臺諫習爲脂韋以希世取寵事關軍國卷舌無聲徒摭不急之務姑塞言責延及數年居然高踞卿貳誇耀士林矣然此諸人豈盡真節無節忍負陛下哉亦有所懲而不敢耳如往歲傳應禎艾穆沈思孝鄒元標皆以建言遠竄至今與戍卒伍此中才之士所以內自顧恤宜自同於寒蟬也宜特發德音放還諸人使天下曉然知聖天子無惡直言之意則士皆慕義輸誠效忠

於陛下矣居正欲重罪之吏部尙書王國光曰罪之適成其名請爲公任怨遂出爲楚府右長史明年京察復坐以不謹落職歸居正死起戶部郎中出爲陝西副使累遷戶部右侍郎督理倉場世卿饒心計凡所條奏酌劑贏縮軍國賴焉戶部尙書陳彥有疾侍郎張養蒙避不署事帝怒並罷之而進世卿爲尙書時礦稅使四出爲害江西稅監潘相至擅捕繫宗室曩時關稅所入歲四十餘萬自爲稅使所奪商賈不行數年閒減三之一四方雜課亦如之歲入益寡國用不支邊儲告匱而內供日繁歲增金花銀二十萬宮帑日充羨世卿請復金花銀百萬故額罷續增數不許乞發內庫銀百萬及太僕馬價五十萬以濟邊儲復忤旨切責世卿又請正潘相罪且偕九卿數陳其害皆不

濟南府志

卷四十九

人物五  
明 歷城

三

納世卿復言脂膏已竭閭井蕭然喪亂可虞揭竿非遠不及今罷之恐後將無及帝亦不省三十二年蘇松稅監劉成以水災請暫停米稅帝以歲額六萬米稅居半不當盡停令以四萬爲額世卿上言鄉者旣免米稅旋復再征已失大信於天下今成欲免稅額之半而陛下不盡從豈惻隱一念貂璫尙存而陛下反漠然不動心乎不報其夏雷火燬祖陵明樓妖蟲蝕樹又大兩壞神道橋梁帝下詔咨實政世卿上疏言礦稅不可不罷者六帝優答之而不行至三十四年三月始詔罷礦使稅亦稍減然遼東雲南四川稅使自若吏民尤苦之雲南遂變作楊榮被焚而西北水旱時時見告世卿屢請減租發振國用益不支踰月復奏請捐內帑百萬佐軍用不從世卿遂連章求去至十五

上竟不許先是福王將婚進部帑二十七萬帝猶以爲少數遣中使趣之中使出諄語且劾世卿抗命世卿以爲辱國疏聞於朝帝置不問至三十六年七公主下嫁宣索至數十萬世卿引故事力爭詔減三之一世卿復言陛下大婚止七萬長公主下嫁止十二萬乞陛下再裁損一做長公主例帝不得已從之福王新出府第設崇文稅店爭民利世卿亦諫阻世卿素勵清操當官盡職帝雅重之吏部缺尙書嘗使兼署推舉無所私惟楚宗人與王相訐世卿力言王非僞與沈一貫議合李廷機輔政世卿力推之廷臣遂疑世卿黨比於是給事中杜士全鄧雲霄何士晉胡忻御史蘇爲霖馬孟禎等先後劾之世卿遂杜門乞去章復十餘上不報三十八年秋世卿乃拜疏出城候命明年

濟南府志

卷四十九

人物五  
明 歷城

三

十月乘柴車徑去廷臣以聞帝亦不罪也家居七年卒贈太子少保子鏐

趙鏐字伯玉世卿之子以父廕官後軍都督府都事歷太僕寺丞戶部江西司員外郎出爲河南知府調高州知府所至有治聲著有牧民政畧一書子濬初

趙濬初字保一鏐之子以祖廕仕周府左長史河南爲其祖舊部政聲藉藉人口濬初撫作名宦錄王所爲多不法濬初繩之不少假朝廷嘉其剛直加四品服俸擢河南知府命未下而濬初卒子櫬桂楮皆諸生有文名櫬子恒煜喪父寢柩旁三年推產讓其兄以諸生終

穆深號桂陽歷城人七歲能文督學周鶴皐呼爲神童萬曆二十

年登進士時神廟靜攝不親臨軒深丹堦獨對冢宰器之擢吏部稽勳司員外郎萊州守持三千金爲壽卽之秉公持正爲權璫所忌竟削籍歸囊篋如洗亡何卒祀鄉賢

穆遠號南陽深之弟萬歷二十二年舉人授直隸元城縣知縣吏議鑄級博學善談論己卯遠守西門獻策當事不納城陷被殺及其子光嗣

穆光允深之子崇禎八年武進士本省巡道中軍守備己卯守西城死難

王見賓字懋欽其先世爲淮之安東人明初從軍徙濟南遂隸濟南衛家焉傳世至福福生珍珍生銳銳生儒見賓父也見賓少負英姿博覽羣書萬歷三年登第任南陽推官疏冤擢猾多所

濟南府志

卷四十九

人物五  
明 歷城

三

平反南陽山谷礦徒爲害巡按使別駕捕賊別駕鞠平民抵罪賓釋之曰冤之不伸何以爲司李唐藩王少內侍陳周侍寵侮

少主賓上狀御史疏請寘法通國快之張江陵相國南旋鄭撫王世貞迓諸境上屬賓爲請啟世貞讀之歎賞曰歷下多才不

獨一李于鱗而足也適有欲以憾中賓者太宰知其枉疏留任報可庚辰升刑部主事當直牢全活甚衆江陵語人曰王鳳洲

每稱王主事才第其人負氣耳意欲致賓不往壬午進員外郎上怒江陵沒其家出國門無敢送者賓獨送窮日揮淚別乙酉

升郎中尋出守開封開封瀕河下流壅決潘李馴督河政賓悉心區畫靡不當指汴當大劇宗藩驕橫耗羨爲累賓事掣要頷清約而人肅服丁巳大禘多方掇濟明年疫甚掩骼無算河溢

隄潰溺者蔽流而下賓馳至招善沒懸賞援之所救不啻千人  
委曉事者煮粥善酌與之栖隄上者五日夜比歸署形色驚悴  
口不言勞已丑以河南副使治霸州兵汴人攀臥號泣如失所  
親霸之房山礦盜作亂遣將密授方畧陽爲大舉實不煩一矢  
而五日解矣臺省知賓才可治邊首薦之調密雲左輔重地武  
備久弛賓與諸將約盡掃敵轍大飭邊備敵聞之相戒勿犯終  
任八九載謚如也壬辰調遼海軍民叩關乞留以滿加升坡察  
使再滿加左布政戊戌遷都察院右僉都御史巡撫延綏河套  
部久背盟至是復搖尾叩關乞賞不無逾額賓力持舊制走尉  
候講折論以利害套部亦俯首退賓爲具題虜渡河西賓決策  
出塞斬馘千七百餘級秋虜大糾所部犯延東賓令一副將兩

濟南府志

卷四十九

人物五  
明 歷城

三

叅將合兵擊敗之虜始退次歲凶疫虜請尋盟賓亦弗計前惡  
再爲題款上疏解任聽勘奉旨候勘明加一級起用終以勘案  
未結竟寢閣弗敘歸田六年以疽卒年七十二祀鄉賢

按歷城志敘王懋欽事不詳茲取青岳相國劉鴻訓四素山  
房文集續之又按明史韃靼傳蒙古俺答居河套大爲邊患  
隆慶時受撫令互市殊恭順詔封爲順義王其後順逆不齊  
詔停市賞套部入寇萬歷二十七年延寧守臣擊之殺獲甲  
首三千明年乞通款不許邊臣王見賓爲請詔復套部貢市  
卽其事也

陳九疇號東華歷城人幼讀書別館有少婦月下踰垣而至九疇  
辭以疾嘉靖三十四年舉鄉試第二萬歷五年進士歷官山西

副使絕請託禁僕從焚連券言動不苟有古君子之風卒祀鄉賢子載春

陳載春號澄渠九疇之子萬歷八年進士歷官順德府知府河南副使天性醇謹所莅皆有實政家居杜門謝客不預外事嚴禁家僕橫暴屢薦不起己卯城陷不屈而死年八十八子樞太學生樟楠諸生孫文煥皆守城

陳樞載春之子庠生入監樸厚溫醇善承親意人樂與交己卯守西南城死難

周璧歷城人萬歷元年舉人任直隸玉田知縣又任山西交城縣知縣實心愛民雅甘淡薄裁冗費墾荒田開河渠繕城堡尤加意學校於貧不能自存者時時賑給之祀名宦

濟南府志

卷四十九

人物五  
明 歷城

三

張九賢字共甫原名九重舉鄉試後改焉其先棗強人遷於歷城縣東雁山數傳至九賢幼師劉致力學萬歷四十一年進士授絳縣知縣有惠政調汾陽報最遷刑部主事時神宗倦勤廷臣黨勢已成九賢無所依附俄退居林下與方守地殷象賢飲酒鬪詩相羊湖山以卒

姜應科濟南人由舉人萬歷四十四年知無極縣縣有昇平橋文昌閣次第修舉士氣民風蒸蒸日上有起色其均徭役省雜支月吉布令讀法皆培植元氣之大者又爲郟陽知縣

楊承恩字君崇歷城人博學長厚萬歷閒歲貢官平陽通判三視邑篆不染纖塵致政歸家徒四壁立藜藿不充人皆嗟嘆承恩處之晏如也知縣張鶴鳴署其第曰端僚知府文球造廬躬請

爲鄉飲大賓

董元學歷城人萬歷庚辰進士陝西布政爲人醇謹寡交遊亦篤行君子也

陳大務歷城人萬歷壬午舉人爲陝西延安同知五馬之第無一樣支風雨諸子孫皆以才餽口四方矣

歷城縣志按舊志人物傳每傳僅數語亦有歷官甚顯而無傳者其選舉條下閒綴一二語姑錄於後云孟醇嘉靖辛酉舉人雲南僉事善攝生好亭榭熒萬歷丙子舉人直隸廣平同知袁霑嘉靖閒歲貢秦府教授劉萃萬歷閒歲貢壽張訓導竝飲於鄉

殷汝楫歷城人任河南唐縣主簿居官不阿堂官冤逮一人命楫

濟南府志

卷四十九

人物五  
明 歷城

三

鞠之竟棄官走一縣稱嗟曾孫象賢萬歷二十四年舉人直隸霍山知縣精理學善音韻

李寶號儒溪歷城人任河南柘城縣主簿征施五有功

殷哲字子濬歷城人通吏河南趙府審理居官清慎處眾謙和一貧如洗眾皆賢之

秦邦彥歷城人任大興縣丞精律令性剛直縣令欲殺一人彥輒出之至相毆到京兆謂令曰秦丞強項爾須讓之竟出其人後陞經歷彥以仕途難容謝政歸學律者多師之晚歲得子夢暉爲諸生有文名

孫自成歷城人武功中衛經歷習律令明術數善奕棋充例貢以

從征加銜都司

范名臣歷城人爲京衛經歷性恬雅有文人之度

鄧瑜歷城人洪武閒爲濟南衛指揮同知將從征屬其妻胡氏曰我爲人臣當盡死節汝爲人妻能盡貞節乎胡氏許諾瑜果歿於陣胡氏守節不渝詔旌其門

其歷城縣志按舊志鄧瑜從征猗蠻其家傳則謂從駕北征陣亡飲馬泉未知孰是

劉興祖歷城人自父母世六喪不舉興祖不避寒暑傭力以葬負土築墓洪武閒有司請於上特賜錢幣後知縣楊成復請旌

鄭璟字庭璧歷城人好施與里中人婚葬恒仰給焉歲暮餓夫羣然操瓢延頸於門日給粥不厭妻子氏克佐之成化九年宏治五年歲大饑二次共出粟若干石以賑流亡有司上其事於朝

濟南府志

卷四十九

人物五  
明 歷城

三

旌曰義民年六十二卒子集泰安王府典膳孫大綸黃池驛丞李萃歷城人葬母於黃臺山家甚貧親築其墓高如山地方莫以問宋桐岡太守出遊見而詢之遂奏於朝旌表

方東省字月岡歷城人嘉隆閒以九則均役差徭繁多民苦奔命東省條列其弊陳於官請罷之而行一條鞭之法上下稱便東省沒縣人楊一鵬王三聘等五百家爲立石墓上乞趙天開記其事東省子守地舉進士官至叅政

谷珍濟南衛指揮瑁之弟鴻臚寺序班父母卒各廬墓三年宏治

十年三月旌其門曰孝行

羅縉歷城人邑廩生其舅氏貧縉贖贍養之以慰母心遂得旌表

李明元歷城人親喪廬墓崇禎五年吏科給事中李春華都指揮

李在沐爲立碑題曰純孝格天

金益字是增世爲歷城二坊人洪武間補府學生有義行鄉人有貸其粟鈔者及期見其饑寒乃出券焚之畧無德色里或罹於刑獄傾貲拯之景泰中卒年七十七子鼎由國子生授戶部主事歷廣東貴州二司

王應祥字和徵歷城人父峻積學有行宏治間舉人爲遷安吳二縣教諭遷貴池知縣攜家之官甫禮神以暴疾卒時應祥年十八負觀侍大母并挈弟妹歸貧甚鬻衣器給養殮與弟讀書致色養母時有忿笑受之遇弟妹煦煦如恐傷嘉靖四年舉於鄉旋卒年三十五

劉傑字漢卿世居歷城縣西郭少失學醇謹無異儒者傑以仲子

濟南府志

卷四十九 人物五  
明 歷城

三

而父養於其家月朔必治具往候其兄嘗值兄怒誤拋而仆諸塗敬不加衰終其身不知欺人子鈺嘉靖四十年舉人官漢中  
通判有詩二卷

歷城縣志按劉鈺舊志作劉鉞今從滄溟集

任爵字天祿其先自平陰徙歷城爵初爲掾尋罷去性嚴無所狎侮子登瀛嘉靖三十四年舉人官河東運副有文名

韓剛字克柔其先棗強人遷歷城數傳至剛少孤事兄甚謹不分其產所善客繫獄力救之鄉里稱長者子應元

韓應元字雲卿剛之子嘉靖四十四年進士隆慶初知山西懷仁

縣釐正祀典均平夫役至今猶尊其法陞評事仕至山西參議

以貢市功蒙賞祀於鄉

王元復字見心歷城人萬歷中歲貢官直隸平山教諭隱居龍山莊舉鄉飲賓嘗云人當在高處立以聖賢爲地步當在寬處坐以天地爲襟度當在平處行以中庸爲踐履所著有遵遠邇言家訓要語諸書門人稱爲靜一先生

洪隱君歷城人戢居東山習治圃邊貢嘗作圃田詩以美之

陳明歷城人博學工詩善書法嘉靖癸未進士累官至浙江按察司僉事以廉能稱性淡泊慨然有遯世之思旣罷著有水部集歿後門人表其墓曰八柳先生鵲湖詩人

耿熠字官橋歷城人蓋縣知縣尙文子也器度恢宏才資敏茂萬歷四年舉於鄉筮仕陝西任環縣令廉平勤幹三載報最陞徽州知州輯彫敝糾貪婪當時稱賢吏終廣平府同知

濟南府志

卷四十九

人物五  
明 歷城

早

靳清濟南人洪武中從軍戍遼東官百戶以陣亡世襲千戶其後有名應選者隨

大兵入關世以功名顯應選子輔官至河道總督有治績謚文襄辛鎮都指揮馬斯才百戶馬虞順百戶樂賢忠百戶李季子所鎮撫秦邦賢武舉朱廉武舉蓮妖之變諸弁往勦敗岡山死者數人

按明史蘄州人王森得妖狐異香倡白蓮教其徒蔓延山東萬歷四十二年森斃於獄其子好賢及鉅野徐鴻儒於天啟二年五月反陷鄆城犯滋陽破鄒滕二縣十一月巡撫趙彥擒之伏誅所謂死蓮妖之變者蓋從彥征鴻儒耳岡山屬鄒

縣境

樊應科歷城人以千總從征死於陣事聞贈卹配享張元戎可大廟

孟海王朱常泐性謙和能馭下葬母步送至墓哀動路人咸稱其孝崇禎己卯之變守南城城陷死泰安奉國大將軍朱常沐泰安奉國四將軍朱常涉臨朐奉國將軍朱常濬俱死難

孫止孝字敬止歷城人天啟二年進士由盧龍縣知縣晉戶部郎尋遷密雲兵備道叅議

大兵兩薄城皆晝夜宿陣兵輒引去又密計獲謀者韓僧以忤權貴歸己卯命子建宗率族人守東城捐貲犒師城陷自縊死兄諸生則孝舉人純孝弟諸生永孝姪憲宗延宗數人皆與於難劉勅字君授歷城人弱冠登賢書春官十二上不第授富平縣知

濟南府志

卷四十九

人物五  
明 歷城

聖

縣母卒居廬砥礪名節好著書年八十猶手不釋卷己卯城陷不屈而死子弟皆被殺

劉檄勅弟也歲貢生授樂亭縣知縣終邳州知州舉鄉飲大賓己卯死難

史臣贊其先浙人後居歷城天啟中恩貢生歷任忻州知州以罪歸己卯城陷被殺子起鳳亦死

賈槐字世蔭歷城人希夷子萬歷四十三年舉人已卯糾眾協守捐貲餉卒城陷死

張元英字孟育歷城人天啟四年舉人好儲書以經史子集分部鐫鍾惺書別貯一笥閉門謝客日焚香點校歲數百卷以為常戊寅守南城倡施布被以恤軍之凍者捐酒食餉卒城陷死

稽嵐字珊楓歷城人崇禎九年舉人戊寅守觀風樓城陷死南城  
下

胡士傑歷城人少好讀書年四十爲掾吏勤慎謙和雖案牘紛紜  
不釋書史子顯宗字昭來崇禎三年舉人戊寅守西城出簪珥  
易鐵百炬以濟軍需城陷父子皆死於難

米嘉珠號玉函歷城人萬歷四十三年舉人天啟二年七年兩中  
會試副榜戊寅守西城城陷投井中死

徐暉吉號義上天啟四年舉人劉汝通號復陽萬歷四十三年舉  
人並歷城人戊寅同守南城城陷俱死

丁振字又從歷城人崇禎六年舉人戊寅守北城城陷死  
張允文歷城人歲貢生東昌教授素有文名兩中副榜戊寅守城

濟南府志

卷四十九

人物五  
明 歷城

里

死

吳安邦字磐石歷城人歷任登州鎮總兵官戊寅守北城城陷死  
王敬賢號震陽歷城人武進士武定州守備致仕家居年七十餘  
戊寅守北城與吳安邦同死

王允前字丕承歷城人年十二值父病禱神借壽爲父益算髫年  
入泮爲周廉憲延光所知舉鄉試戊寅守北門城陷負母至歷

山頂遇

大兵母子俱不屈同死

費克謙歷城人京營副將戊寅守南城城陷被殺

陳光先歷城人衛指揮戊寅署巡道中軍率道丁守城城陷戰於

新政司街力竭而死

高思恭字凝止歷城人邑諸生崇禎己卯知縣韓承宣議城守思恭分守北城城破死之

四城巡守義社生員死者三百五十二人

向兵者皆歷城西關人聞警糾千餘人保護西關陳金兩教長頗有戰績死者二百餘人

楊家寨者歷城縣城東北楊家莊也莊人環水立寨獨留一徑偽設木砲而別點正砲以禦敵己卯城陷寨猶固守

大兵入寨死者楊卓等百餘人稍西爲邊家寨亦稱能守云

歷城縣志按崇禎己卯死者自宜海王至楊卓俱見於舊志忠義傳又有附注於選舉者吳斗光天啟丁卯舉人直隸博野縣知縣戊寅死難趙標名斗光同榜舉人已卯守東城正

### 濟南府志

#### 卷四十九

人物五  
明 歷城

聖

月二日城陷人見其死東城下張經崇禎恩貢生己卯守北城死江源長乙亥拔貢生己卯死陳典崇禎丙子武舉死西城并附於此

劉廷寶歷城武生善騎射崇禎末羣盜紛起廷寶練鄉兵保其村坊盜不敢近官知其勇俾爲練總捕賊於莠山之南格鬪峻瀾中幾毀賊巢會同伍有爲賊內應者遂遇害部下卒李浩然被傷匪亂屍中得歸述其事

李興邦字振宇濟南衛指揮崇禎甲申闖賊移明社聞變勸興易服誓以死殉持刺遍辭所親或以官卑無社稷責勸之曰官雖卑亦官也况世戴國恩敢不盡節遂不食闖僞權將軍至官司

出迎李聞砲聲閉故拊牀一慟而絕

歷城縣志按舊志作於崇禎十三年而十七年鼎革時事絕不見於紀載惟張爾岐蒿菴閒話於李興邦死節事有云僞權將軍至濟南官司出迎於此稍見其概而葉承宗傳記李自成僞官刑辱搢紳事頗詳謂僞知縣喬茂桂四月初到任僞權將軍郭陞十三日宿齊河十四日到任居都司署又有僞防禦使丁昌期僞濟南府知府高丹桂僞推官李世顯僞軍糧廳呂陞索德王冊寶不得刑訊梅察將乃得之府學月牙池邊十九日陞去時有戶政府從事張琚者謂之催餉司拷掠宦家子俾助銀其被掠者以萬歷來科目爲斷計三十餘家及德州謝陞殺僞防禦使闞傑泰安州守將高桂等及蕭趙兩鄉官殺僞防禦使郭都青州殺僞威武將軍昌期等

濟南府志

卷四十九

人物五  
明 歷城

四

聞之懼甚德州討賊檄至僞官次第逃去孫進士建宗糾眾請推官鍾掌府事知縣朱掌縣事諸王歸府五營兵皆還

按歷城縣志載鄉賢祠明十一人尹同仁張鼐邊貢李攀龍殷士儋韓應元吳聞詩趙世卿王見賓穆深趙濬初也今祠中又有徐暹陳九疇陳載春三人已載入列傳中惟河南睢陳兵備道副使賈希夷一人舊志不載查縣志忠烈傳云賈槐希夷子而希夷事跡無傳殊爲缺典

明 章邱

滿福周一名甫生章邱人通經史氣練達時務縣尹李儀伯聞其名舉爲孝老時元末政舛俗橫民多冤枉福周爲悉心平之洪武初以人才應召授浙江左布政使居七年以目眊解職歸

喬穩章邱人生而警敏洪武初以人才薦授北平府理問靖難兵  
過歷下穩獻策稱旨陞北平按察使轉行在刑部左侍郎後以  
直諫被譴幾死者三尋乞歸

韓禎章邱人博學有機變洪武中以國子上舍授河南道監察御  
史清介不染力振風紀尋遷江西布政司左叅政調廣東卒於

官

謝肅智章邱人有才幹工詩文任山西大同府通判陞福建運副  
歷官所至有聲子孫科第不乏子九儀壬辰進士由知縣累官  
兵部侍郎雄縣志稱其典學校崇節義裁冗費懲奸貪六事尤  
治百廢俱新蓋一時才吏云

洪漢字天章別號雲广章邱人初入縣庠以講書見稱巡按於鄉

濟南府志

卷四十九

人物五  
明 章邱

墨

試後出巡至章邱命背講中庸八引詩大喜曰有是人而不作  
解首可謂無目成化戊子中鄉試壬辰進士授工部都水司主  
事管濟甯牖河值天旱水澀權豪往來任其啟閉漢立法嚴禁  
無敢肆行者庚子年司虞衡監稅荆州竹木徵取平恕商民深  
德之辛丑升員外郎巡清五城街道點視九門城垣軍器天壇  
之旁偏近御路秋水泛漲衝一灘廣數十丈深三丈次日午後  
駕出漢令用杉木爲棚鋪板而覆以土扈從官服其才又監修  
大慈恩寺工竣同事欲援例乞恩漢曰以文職修寺不能諫止  
復因之得官豈不貽後世笑眾乃止後以都水司郎中勘漕政  
廢弛事條陳十事上之糾治貪婪武職選補老幼運軍及處置  
造船事宜劾總漕不稱任使者漕政爲之一新宏治戊申超補

廣西右叅政會征古田猺獠設法水陸運糧軍兵萬餘無苦  
飢者荆竹嶺獠賊千餘擄掠斷絕行人漢經其處分守康叅將  
勸使由水路勿由陸路遇賊漢曰朝廷設官本爲地方今道路  
不通己三月吾輩若再退避何時可通耶遂毅然往賊勢果熾  
乃遣驍勇數百騎爲前鋒以步兵夾擊之洪亦親御戎服以督  
其後賊遁去路不復梗永福地方有猺屬八百餘占據民田鎮  
守副將已發兵駐劄兩月漢委洞曉猺情者先行文推誠招撫  
仍耀以兵威猺退民皆復業以母憂回籍丙辰補升四川右布  
政使戊午升陝西左布政使不旬日升大同巡撫上書極言地  
方便宜八事其增守備以專責任演神機以期實用置方田以  
遏敵騎寬住俸以惜逃官尤爲切要會有星變痛加修省嚴整

濟南府志

卷四十九

人物五  
明 章邱

吳

武備未幾敵人內侵鎮守太監及統兵官不聽節制以致喪師  
漢連劾失事人奉旨回京聽用下所奏法司勘問得實各抵罪  
太監改調陝西鎮守中官愴類忌漢朦朧叅奏回籍閒住有以  
白灰書於朝堂云陳堯重賄翻留職洪漢無錢却去官臺諫以  
漢才猷薦不報正德己巳再薦亦不報庚午二月卒嘉靖丙申  
祀鄉賢

張茂蘭字德馨章邱人少有至性慎取與宏治戊午舉人乙丑進  
士知鉅鹿縣爲政簡易以外艱歸服闋起知任邱縣時流賊劉  
六齊彥明起霸州掠及縣境茂蘭築城誓眾散粟哺饑民兵甲  
完具樓櫓屹然賊去之城賴以全時兵荒洊至乃上救荒四事  
多見施行官柳爲饑民藟伐或以言茂蘭曰歲饑窮民無所得

食多厲禁乎又市書籍以勸學者兵荒之餘人不廢業御史以紀功至茂蘭出迎被詰責茂蘭仰視曰公此來何爲者也御史曰奉命勦賊紀功獨不聞乎茂蘭曰賊去此幾何御史曰八百里曰公以紀功爲名今相距八百里脫有冒功者何從知之御史怒其強項亟驅車去亡何御史以事被逮茂蘭迎數十里外廩餼甚腆御史歎曰令古人也煖不增衣寒不減葉吾見其人矣茂蘭兩爲令布衣脫粟不以妻孥自隨遷戶部主事餉軍遼陽封還羨金於官使歸監兌臨清榷舟九江終始以廉潔自勵空同李夢陽時視學江西歎曰張君非唯操守清氣味亦清其使九江也李文康公賦詩送之曰當年相與駐孤城豺虎縱橫近帝京洛下書生曾獻策關中令尹解談兵時平上國仍同醉

濟南府志

卷四十九

人物五  
明 章邱

聖

秋盡西郊復送行黃瘦一童牽一騎雙流應照使君清人競傳之者滿遷郎中總理宣府糧儲以疾固辭爲給事中論劾調汝孟府通判三月棄官歸嘉靖改元給事中李錫疏薦之詔起用會丁內艱旣免喪巡撫王堯封繼薦之不起久之起爲河東鹽運同知亦不赴築室長白山之陰老焉每與農夫樵牧雜坐談農事人亦忘其嘗爲大夫也遽於經傳授徒山中經其指授者率有所成就如袁軒冕陳德安輩皆是嘉靖乙未十月病起坐命索陶詩周子通書置袖中而瞑年六十五鄉人稱曰東谷先生祀鄉賢

王士禎曰少聞諸前輩曰正嘉時京師語曰天下清官張茂蘭問其後裔則式微久矣長白山李氏嘯園中有亭曰皆山

此東谷先生故居也先生在郎署日冬無絮衣饋遺皆不受  
東阿劉戶部田解衣遺之乃受曰世惟劉伯耕衣可服耳人  
以比陳師道云

王昺字承晦號杏里章邱人正德十一年舉人嘉靖二年進士觀  
政兵部大冢宰聞其勤用作選首除太常博士十一年考選河  
南道監察御史明年巡河東鹽辦歲課外多積銀十餘萬兩補  
完先年逋欠邊餉其不盡者預解邊鎮以待後日之不足十四  
年巡按真定府獲鹿縣李氏有繼妻閉夫室中縱火燒死而誣  
其子獄十年不決昺一鞠得其情爲之平反定州亦有李氏以  
惡疾自經死繼妻告官誣其子坐死罪昺爲辨其冤釋之又活  
男女貧屈百餘人十六年升江西布政左叅議十九年遷陝西

### 濟南府志

#### 卷四十九

人物五  
明 章邱

吳

按察副使撫治西寧蕃漢錯居區畫有法邊境靖謐處置益州  
均田事尤得其宜在陝給公文有限吏邊廻者定數責之凡納  
糧者手自稱兌庫藏官吏不得近出財物有識巧詐侵換者計  
弗行裁抑太監織造料價銀二十餘萬且不循舊規分派百姓  
直給官銀以彌侵羨每次止用銀七萬兩遂爲定例觸忤織造  
太監劉清詔獄逮至京而清死昺乃得釋焉仍降浙江布政左  
叅政分巡嘉湖道至嘉興見其久無城郭修之工竣未幾而倭  
奴猖獗士民安堵眾始服其先見後累遷至湖廣布政使麻陽  
兵回沿途掠良家子女四百餘人匿之舟中昺下令搜檢眾懼  
出之江干遂差官訊其鄉貫揭榜招各親屬領之歸先是雲南  
土人聚眾或開歲或比歲一出谿洞劫掠居民必動官兵勦撫

互有勝負三十六年廷推曷雲南巡撫曷至先揚兵威繼卽行撫諭土人率眾歸附願爲良民明年拜南京工部右侍郎致仕歸宏治辛亥年卒年七十六

李冕字端甫世居章邱百脈泉因號脈泉七歲不作兒戲十三從學於鄭鸞鄭奇之許妻以女冕在縣庠十五年江都趙鶴提學山東首許王曷及冕正德丙子冕果與曷同舉於鄉讀書長白山食不宿飽又入監讀書嘉靖丙戌進士知魏縣連年荒歉民皆就熟於河南其不能行者自縊林閒冕見之哭於衙齋扣算庫銀可賑數月報不待允卽已散給告太守借粟四千石歲登如數輸還漳水決乘扁舟一葉泛橫流中隨決處命眾多方塞之河不爲災有蝗蝻單騎郊野督鄉長集人捕之或以粟易蝗

濟南府志

卷四十九

人物五

明 章邱

冕

而蝗亦不爲災後累轉南京戶部郎中出知杭州府織造龍衣每季銀數萬必先呈據於府留據然後給銀每百金率尅其一冕則不尅亦不留機房感之以內艱歸服闋補處州府有二渠利甚溥湮塞已三百年爲開濬復其故分派御衣銀一萬兩設法措置而民不知奏減秋米數萬石雖甚災傷不爲困簡任才賢表揚貞節其尤長也除北院南曹晉大名兵備副使列銜河南兼節制山東州縣出費月數百金冕至裁革白蓮社紅羅女倡妖術弄兵鉅野將過大名冕選民壯駐東明待之賊不敢至有中官解湖南皇莊銀在河南新鄉被劫上震怒巡按立限捕盜有巨奸希厚賞以民兵所乘類盜馬報拷服稱賊寄富家命衆議趙廷松往取冕抗辨良民非盜巡撫劾之而眞盜在京已

獲趙叅議語人曰處大事當如李冕爲民而忘其官三載擢陝西叅政二載又擢按察使自以爲法官之長但涉疑獄必爲平反擢山西右布政使丙辰考察有陷害者以老疾致仕冕自奉儉約卻餽遺不下萬金鄭夫人與同德曰官多壞於妻女溺愛不防因墮名節所生子女雖小過必共處笏先冕卒冕生無厚積歿無厚貽親友賴以舉火者數百家鄉人爲立生祠祀鄉賢康濟民字惠之號懷朴先世由棗強徙章邱明永鎮有田一夫屋數楹牛六角力作養親好施予正德辛未流賊至扶親匿胡山爲行省掾閱獄請輕罪在外調治全活百餘人同舍有醉而遺金者晨起歸之有少婦遇盜憑垣呼救謂禮不可廢命童子梯下之出入帑藏人稱其臨賄不動堅如鋼皎如月凜如霜壽登

濟南府志

卷四十九

人物五  
明章邱

五

七旬以微疾終子廸吉

康廸吉字道夫號右川濟民之子嘉靖癸卯科舉人連第進士授戶部主事管倉餉邊及督湖廣糧儲三差各稱其任摧泚墅關稅屢司錢穀纖毫不染府判索其瑕垢不可得超郎中管大同糧邊兵驕善調度德威足以攝服之出知太原府汾水溢壞城一角周視歎曰堤高則水蓄易多堤薄則水浸易壞於是培其厚而損其高水患以息有兄弟垂白而訟者謂之曰吾德政不足以挽頽風乃至於此令修學宮工訖乃聽訟月餘入見相抱而泣願退其辭甲寅重午父誕辰遣使以衣履上壽回報父病卽遣醫往傳病急夜從兩騎出城東雨昏迷步過黃泥坂至小村對竈燎衣鷄鳴促行遇訃音一慟墜馬移時乃蘇見巡按御

史泣曰若得見父生面罷官何恨奈不相及御史爲之動容服滿補任保定府都御史以譖言怒其吏而意在廸吉卽上書致仕都御史旋悟曰康守一至百廢俱興地方賴以保障何遽言棄去也六月構疾八月卒年四十子大壯大猷

康大壯廸吉之子萬歷丙子舉人任行唐知縣西北兩嶺口多盜甫下車捕殲渠魁俗刁訟逋賦大壯裁決如流不使案有積牘徵輸諭令無後期不徒事追呼民感之調知大城縣東有子牙河乃滹沱滏陽諸流之委春漲秋靈非溢則決沿河諸縣皆苦昏墊大壯率屬勸察以城家橋下流地狹而逼勢直而迅請於上官開廣舊河築厚堤以束之後忤巨奄意回籍起知山西洪洞縣有姦人扞網挾千金以求解峻拒之又捧檄鞫鄰縣獄平

濟南府志

卷四十九

人物五  
明章邱

五

王姓冤尋引年歸卒年八十

康大猷廸吉次子由拔貢生官昌平州判陵寢重地又近邊關巨奄爲梗易成貝錦大猷立法簡明以清介著聲權豪斂迹而民睽就之後引疾乞假縣人扳轅流涕送之出境

楊盈字守謙號雙溪世爲章邱人生而警敏正德丁卯舉於鄉遵父命乞恩授學職得隴州路癸酉以考官聘往三晉所得多名士有欲私中其館賓者府首薦之監試監試薦之監臨盈力爭之監臨初不之聽及開卷乃知爲人所蔽棄其卷而稱盈不絕口庚辰升潞城知縣縣一盜穴賊巢也下車諭以禮義恐以禍害辟荒萊懲奸宄重黷校恤孤寡佑善長廣偵候治甲繕兵增城浚隍完逋賦判疑獄又隨丁田以定賦役每升降一戶與眾

商之歲將除忽失藏金問吏吏答曰縣官家人爲之盈禱於城隍之神有申明者婦誤以金外封識字紙擲出爲邏者所得收其婦款訊盡獲原金其人乃守藏者吏卽其弟也高平諸邑監倉有累足駢肩不能坐臥者府守言之撫按檄盈審釋卽時立解歡聲雷動村有兩家夜鬪者後一閉門不出一詈於門前當夜詈者以鬪毆殺人律絞委盈覆審問應抵者曰本村有讐人乎曰某讐人也問某與死者有讐乎曰亦讐人也遣隸勾其人卽悸語其妻曰豈事敗露耶研究之竟白其事人驚以爲神嘗勘壺關郭氏獄郭氏遣人懷金入境卽返兩任凡七薦二十餘獎因與州同莊敬不合陷之獄潞民投狀上官莊得罪死王僉事過潞恨其餽送之薄妄謂與青山寇陳遷有私橫坐以受賊

濟南府志

卷四十九

人物五  
明章邱

五

成邊兩院知其寃駁付藩叅王端溪擬復職事以內艱歸王僉事仍誣以數事因考察落官子選

楊選盈之子嘉靖甲辰進士初授行人嘗使雲南卻黔國公之餽

轉御史按畿南郡課羣士恒陽書院轉副使兵備易州去而易

人立生祠轉都御史巡撫大同時蒙古部辛愛有妾以私部人

懼誅來降總督楊順受之辛愛來索不獲乃縱掠大同圍右衛

數重順懼返其妾辛愛戮之知順無能圍益急詔侍郎江東代

順而選與總兵張勳各嚴兵至圍乃解蒙金幣之賞丁母艱以

才望奪情起復轉兵部右侍郎總督薊遼屢捷又獲通罕爲質

復蒙金幣之賞通罕者三衛之長實朵顏部又蒙古部俺荅子

辛愛之妻父也癸亥年俺荅入牆子嶺大掠本兵黃尙書與選

素有隙指質通罕爲勾引選得罪死海內寃之

袁慶先世冀州人明初徙章邱有名通者以舉人官太原府教授通生端端生綱綱生慶宏治辛酉舉人知行唐縣以蜚語下北鎮撫獄其子勲不避艱險徧訴臺省事得白而誣者竟抵於法袁勲號樂盤慶之子正德庚午舉於鄉入監以試撥吏部驗封司歷事以外艱歸嘉靖癸未選授同官知縣久疲敝民逃亡金鎖關乃三縣界乞將弓兵六十名均撥三縣編充竟如所請差銀倍於隣封正糧外復有站銀乃申請上官得減銀七百兩糧三千石邑多盜自外來令一人一鎗一刀二人一氈一村之眾統於村長一鄉之眾統於鄉長擊鑼聚眾以氈蔽矢及對面則去氈而鎗刀出賊不復入境爲政稍嚴勸者曰三尺之密何如一

濟南府志

卷四十九

人物五  
明章邱

五

分之寬勲曰法行於嚴否則民玩而刁廢乘之矣俗嫁女論財夫家非破產不能得婦勲乃嚴其令減其財村城更無長女驪夫哈密將入寇客兵四至總督命勲辦芻糧四十萬勲下令不論民校但有芻糧者卽報名於官時肅世子權府事使問曰國有勲令府尉不當民差勲曰此非尋常民差比今賊擁兵城下城破則玉石俱焚矣世子更無以難勲照時價兌銀不決旬足四十萬之數上下賢之調渭南縣賦不下十萬七日而完編差則先自重者始可否與眾商之商定榜諸衢有過客訟主者藏所乘驢勲曰主無藏理薄治主以不謹之罪給客驢價使去曰吾邏者無遺漏不三日驢當送官矣已而果然旋降級歸後除衡王府紀善升本府右長史以京察罷歸卒年六十有九

焦馨號衛止章邱人七歲就外傳一覽卽成誦十五歲錄博士弟子員萬歷丁酉舉人辛丑進士除中書舍人兩奉使命餉遺一無所受庚戌遷駕部員外郎掌東宮旗尉力士多市滑竄名馨嚴尺籍虛冒一清驛傳郵符不少假藉晉郎中己卯遷河南按察司副使備兵大名轄順廣大三府號河朔重鎮詰戎飭備察吏安民畿南恃以爲保障地多種手結黨雄行廉得主名繩以三尺威懾服丙辰大祿捐贖設粥賑之全活以數萬計己未晉河南叅政分巡汝南一故官子殺人據法論抵人比諸南山之判辛酉晉按察使仍管道事入握臬篆偶值八道并缺兼管數職分而應之裕如也是歲冬以廉訪入覲壬戌轉廣東右布政使時議移豫撫鎮磁州新撫軍馮公特疏改河南右布政

濟南府志

卷四十九

人物五  
明 章邱

善

備兵磁州所統毛武勇三營兵多獷悍不馴申嚴軍紀躬爲校閱分給月餉悉手自兌封唱名散給兵士畏而感之癸亥以原官回司管事旋攝司篆故事支放宗祿類低其衡以其贏自潤司帑以告峻却之甲子擢山西左布政使山西歲賦皆供三鎮軍餉惟新加地畝一項由司解京馨不啟封第署一公移令原解官自輸納太倉督餉臺省合疏特薦奉旨紀錄且頒爲天下式丁卯授都察院副都御史巡撫宣夏過堂邑會同年友張司空遂位語及魏瑄建祠事毅然曰吾頭可斷祠不可建宣夏有漢唐二渠引黃河水灌田歲久淤塞馨銳意修舉鑄賦招屯計畝疏濬時出廕覩視其勤惰春鍾徧野所收入可數百鍾至今頌之時逆璫生禍徧天下宣鎮將吏頻以爲請不應請之急則

笑曰倘有禍我自當之迨逆璫敗諸頌德者皆得罪戍辰人以事誣馨卽飄然辭節鉞東歸杜門埽軌林居十三年屢薦終不出歿之日守臣以聞予祭葬贈工部左侍郎廕一子入監讀書子二長日培次日芬

焦日培號心植馨之子博學嗜古善斷大事以父紱西夏績廕成均讀書期滿應赴部授職不忍去親膝下遂不仕父歿伏闕請卹典如例侍養母曲盡孝道與弟日芬友愛無間幼女許字甯氏婿警求退婚不可嫁女而維持其家辛未饑土賊起賊紿縣令曰單騎臨我當受撫培覺其詐亟沮令曰是必有謀爲密具方畧戒備而後招之賊計奪乃就撫兵燹之餘遺骸徧野令人周視而瘞之甲申乙酉開縣令欲其應巖穴之求以病力辭祀

濟南府志

卷四十九

人物五  
明 章邱

妻

鄉賢

喬岱號龍溪先世棲霞人有名大堅元兵之亂避居章邱家焉大堅生明德明德生本正德辛酉中禮魁官鄭王府長史本生奉先成化辛卯亦中禮魁官秦王府長史奉先卽岱父也岱生而秀穎宏治辛酉仍以禮經魁多士三世皆中第五人且皆辛年家建樓因以三辛名之壬戌第進士除行人差滿選授四川道監察御史出按兩浙鹽政飛章劾退鹽場僨事者數人風清按地會逆瑾弄權牟利以岱不副其望降謫太平府教授稍遷鈞州判官流賊披猖擁騎數萬薄城下州乃宗藩所居賊必欲破之岱率眾登陴拒守八日始解嚴升永城知縣兵火之後城隍殘破欲修無費忽報掘城得銀巨萬自是金城湯池屹然大

壯調廬陵縣號健訟難治犯者稍從重典縣連永豐寇起當承都臺檄用計設奇悉就滅捷音上奏蒙獎勅銀牌之賜後升廣德知州尋升瑞州府同知推升按察司僉事兼督屯種管河東道佾長於刑名歷任久州縣吏民有事案下者或不解行裝卽已決斷歸矣癸未以母老告歸又二十年而歿

劉樹號企齋先世棗強人有名義者徙章邱城北之張林鎮生仁美仁美生仲英有二子長曰時生子澹澹生樂宏治丙辰進士官至河東運使次日誠任涉縣知縣生澹成化甲午中鄉試任鞏縣知縣未久罷歸年六十生子東性穎異曰吾一生刻苦天其報我以是子乎姪輩賴以成就皆進士其他弟子成名者尤眾

濟南府志

卷四十九

人物五  
明章邱

美

劉東字思周號貞庵澹之子十五歲已徧誦經史人以書箱目之未冠食餼嘉靖乙酉中鄉試十二名東讀書法最精案上止一冊熟方易之有餽以美錦者卽以奉母赴部考選居第一除工部司務升南京戶部江西司員外郎籌算出入各有規矩侵漁之弊革之殆盡升本部貴州司郎中部具考語云文學足以飾治才識足以防奸未久以病卒

王儀鳳字應和號梧岡由薊州徙章邱遂爲縣人從學於族兄王道嘉靖乙酉舉於鄉任眞定府通判管倒馬關及龍泉關前官多以與武弁通賄敗儀鳳至有以常禮餽者斥出之上南巡署定州區畫得宜迨無廢事委查保定府倉糧歲久混濫以雜米充數免戍者七八人推升定州知州前官多賄敗母戒之曰食

後宜繼以廉對曰生平義當受者且遜辭而敢枉法以圖利乎  
乙巳升順慶府同知以道遠別母之任值西番不靖朝廷數命  
將征討因松潘險遠糧運難通儀鳳訪其弊知官取羨餘賣放  
大戶糧因不完乃以原封銀兩使之自分又以大戶作總領吏  
有教以十扣其一者杖而逐之竟以糧餘克敵蒙欽賞銀幣有  
奸人稱中書索汝賢言出封王沿途肆擾儀鳳疑而執之寘於  
法擢知思州府苗民順化欽取辰砂千斛急不能辦布政高翀  
以宣慰安萬全有之倩往得之萬全餽以珍品不受苗人服其  
廉烏撒軍民府知府女官余祿恃強肆害遣官曉諭皆不往倩  
儀鳳至余祿郊迎不肯延參折以禮制一時士兵露刃門外眈  
眈然儀鳳大言曰爾即富強能勝三宣慰人兵邪三十二頭目  
鳳卒年六十六

濟南府志

卷四十九

人物五  
明 章邱

五

有殺爾者以其官官之余祿色變取罪人監候回報巡按行文  
治其罪無敢有劫殺侵擾者以功邀欽賞銀兩已而母歿歸儀  
鳳卒年六十六

尤潔字廉甫號雙泉遠祖尤虎高琪仕金後人以避難去虎從尤  
世居章邱潔嗜學幼通術藝登嘉靖壬午鄉書謁選除涿之房  
山令房山產美石督學胡侍御將勒京兆學官檄石房山時任  
丞攝縣篆應之潔抵任闖人咎文鑒承上命采石房山要取入  
贄潔不應誣奏擅鑿玉石不法房山人叩閭鳴誣謫戍青州後  
數年復其官而潔卒

李繼孜先世隴西人徙章邱父文臯倣儻有大志繼孜類其父弱  
冠習射每曰大丈夫生則珥貂蟬沒則裹馬革老死牖下非所

願也後爲上官募兵者充義士嘉靖三十年從禦敵雁門關以功授濟南衛左所鎮撫三十三年從備倭江南八月十四日至嘉定縣有戰功連三日皆捷倭銳頓卻乃棄兵僞遁日將夕大倭播扇長嘯張兩翼夾攻我軍繼致陷水套中遂遇害

馮時英章邱人崇禎初以孝廉仕至刑部主事遼東經畧舉其才改任遼東都司指揮僉書管經畧大廳事備邊多策後與用事者不協誣以文臣不諳武事奏罷之時英去遼東亦失後聞國亡嘔血卒

胡來貢章邱人嘉靖歲貢官宣城主簿祿俸外織塵不染指左遷泰州吏目上治河入事旋以艱歸宦橐如洗顧獨喜周人之急性忼爽好面折人過人亦以直諒許之祀鄉賢

濟南府志

卷四十九

人物五  
明章邱

五

甯光先章邱人萬歷丙辰進士歷五任至巡按直隸以進賢黜惡爲急務薦舉有司凡三十六劾官三薦將材官二十四劾將領官一邀獨得體要之褒且傳有天下本章甯光先一語又特薦致仕吏部尚書崔景榮兵部侍郎馬從聘大名道丁魁楚時魏璫燄熾上疏擊其奸有爲魏立生祠者按律劾之於刑獄之有一綫生路者卽爲駁問經駁問者百餘人確有可開者亦得數十人所上免派召買一疏尤爲惠民通商要務至稽邊餉以節財用守關塞以固要害察驛遞以施軫恤皆蒙上獎以嶙峋氣骨直大精神許之旌祀鄉賢

呂懋修章邱人由副貢官山西絳州學正懋修息不越畔言不浮行又察士之好修者獎之不及者策之於是相觀而化不敢以

虛憍恃氣託之剛果凌厲詞察託之高明放侈踰檢託之恢宏  
斌斌然復良士瞿瞿之舊焉復捐俸修聖廟及學署致仕後設  
教家塾課子孫著有唾餘詩稿祀鄉賢

張如式章邱人官衡水縣知縣鄉賢祠祀之而行實無放

王國生字楨甫號治山章邱人嘉靖戊子舉人官唐山知縣民以  
火甲爲累首罷之未有更鋪獲盜者止令民壯巡警犬不驚而  
民安作官衙蕭索有寒士之所不能堪者而固安之且曰廉乃  
本分不爲奇節叅將怙勢凌辱丞尉申暴其惡使不得遂因賦  
舊有指揮督催百端橫索叱出之曰徵收令職也捕盜若職也  
奈何操刀而代割因觸迂上官被劾左遷卽日輕車就道歸不  
出

濟南府志

卷四十九

人物五  
明章邱

五

姜大成號松棚章邱人家貧絕糧與客笑談竟日其洒脫如此由  
拔貢中順天鄉試揀選河南鄆城知縣出見隣封有以鞭血爲  
威者歸卽庭諭百姓曰吾非不能此實不忍耳然勿梗吾令倘  
不得已將以此試之矣前後贖緩皆轉發市穀以備賑救憂旱  
禱雨兩立沛調屯留人或謂屯留爲頑大成曰有異地無異人  
有異人無異心吾不敢逆料其頑而改前政政成卽告歸民哭  
送於途如發鄆城時卒年五十七

張師雍字公度章邱人以縣學生入太學得官代州同知輔其長  
以有爲稱司錢穀立完數十年逋賦以征有善法而動民以天  
良也操守素嚴峻凡奉差委於民一無所擾以呈談棄官歸

張汝蘊字子發章邱人萬歷庚辰進士知東安縣首治猾胥擒劇

盜時渾河溢築土堤二十餘里調獻縣至則汰積收公編審均  
驛騎雪唐郎中齊秀才兩家訟獄新廟學葺公廨修橋梁繕斥  
堦邑故無志匝月成之以治行爲畿輔最遷南京工部主事後  
以服除補戶部晉至郎中視驗糧廳積弊盡除出監天津倉錙  
銖不染值倭犯朝鮮陳奏調班軍借漕糧固守備飭營壘皆得  
請遷孟夏叅議督撫奏以監司兼部務留之天津倭平與賜金  
所列郵傳苦驛騷爲定程品非信節不得橫索稅監王朝激變  
某帥陳兵待之汝蘊反復聞說事遂寢宦者馬堂繼至手卮酒  
慰勞期勿擾百姓宦者悅減郡稅數萬緡歲大禮請於上官出  
帑金以賑又因大疫捐藥活之遷山西兵備副使士民挽留不  
得哭聲振野行次邠州以疾歸

濟南府志

卷四十九

人物五  
明 章邱

卒

袁弼章邱人成化戊戌進士任刑部員外郎有文名能識士於未  
遇如李空同夢陽及同邑夏西阜廷芝是已外謫慶陽府同知  
子公冕崇冕軒冕

袁公冕字伯瞻號西溪弼之子本家學能爲古文詞宏治甲子舉  
於鄉正德初逆瑾欲致門下力辭之嘉靖癸未除汝孟府除盜  
通判人以爲處非其地公冕曰正其所宜前居是任者多舞文  
破律教賊妄拔以規利公冕至唯詰盜安民外無餘事張希者  
大俠也殺人賄上下求解脫公冕械致於廷一訊伏辜斃賊會  
張佐於獄旣而聞他盜有欲劫獄者人服其智會有譖者公冕  
知之不與質卽拂衣浩然而歸

袁崇冕弼之次子兄弟皆以科第起家崇冕獨以布衣終工詞曲

著有春游秋懷及南北諸小令時關中王溪陂冀北楊方城與邑人李中麓皆心折焉

華珩字鳴朝章邱人宏治己未進士初令元城振刷吏弊發奸摘伏如神裁節冗費與民休息元城民至今德之陞監察御史有直聲忤逆瑾瑾敗始不及難祀鄉賢

張舜臣章邱人嘉靖戊子督學使者試章邱諸生得舜臣卷亟以解頭許之繼得德平葛與川卷復曰解頭必屬葛然張亦不下第二人也後揭榜果如督學言嘉靖乙未登進士歷仕南京戶部尚書爲人機警磊落故所至皆亨途無坎坷以疾歸至鄒縣卒

劉祿字惟學章邱人嘉靖甲辰進士授行人使朝鮮朝鮮王餽遺

濟南府志

卷四十九

人物五  
明 章邱

空

甚厚悉卻之選戶科給事中因救王尚書果忤嚴嵩廷杖七十謫蒞蒲尉未至卽罷歸課農訓子外一無所營構亭曰思居飲酒賦詩以自娛隆慶初臺省交章薦不起詔復原職晉太常寺

少卿祀鄉賢

張應吉章邱人嘉靖壬午舉人任河南湯陰知縣會迎駕以才幹稱陞鳳翔府通判又陞開封府同知恩詔進階朝列大夫居官清苦不受餽遺歸田二十年不減寒素入湯陰名宦祠

龔彪章邱人少時嘗爲縣官輸租詣京師見遺錢百緡於道彪稍稍致之車中逆放人曰孰與易金而裝囊中爲便彪固辭乃馳及前遺錢者下自致之輒起乘不顧而去又嘗代宗人償粟三十斛卽收償者亦不知爲彪粟也子勛

龔勛字懋卿章邱人彪之子少貧牧羊豕山中暇卽讀書自經史暨百家稗官小說無不發其覆而抉其精年三十補郡諸生時邑中如袁四野李中麓皆以詞名家勛獨與歷下殷正甫李于麟爲古文詞相倡酬年六十始以歲舉徵初訓江都繼諭威縣皆力振師道居亡何陞開平衛教授卽歸歸五年病卒著有懋卿集訓子質疑感興百韻歌太極圖解性命辯諸書劉白川稱爲朱元晦忠臣王伯安諍友

胡東漸字向若章邱人萬歷乙未進士初筦銀庫一絲不染以時望擢吏部郎遇銓除請託不行人咸服其剛正累官至南京都察御史僉都察院時魏忠賢焰熾甚索寄庫銀四十萬兩竟不與遂免派徵江國獲安機房胡太監請廢營爲瑄建祠立拒

濟南府志

卷四十九

人物五

明章邱

奎

之後祠成亦不拜瑄遂矯旨勒令致任怡然就道時論高之著有向若詩稿祀鄉賢

李淳章邱人年十五爲諸生試輒前列年四十始舉於鄉天性孝友善能說經義在都時高麗使臣問以書史疑義淳應答如響使臣爲之折服子開先

李開先字伯華淳之子生而卓異七歲能文嘉靖己丑進士是時北地李獻吉信陽何仲默後先告逝而晉江王思道毘陵唐應德倡論排之開先與吉水羅遠夫平涼趙景仁復左右之李何文集幾于過而不行一時有九才子之稱而開先九子詩文高自標榜謂足掩映前九子云又以其餘力爲金元諸曲嘗奉使關中康德涵王敬夫董鳳壇才名見開先詞皆折節倒屣不敢

居前輩初除戶部以才望改吏部至選部轉太常寺少卿爲夏相所忌罷歸優游林下近三十年開先才敏捷每爲文一篇輒萬言爲詩一韻輒百首皆縱筆而成不爲巉巖刻深語而有天然自在之趣性好客座上嘗滿所著閒居集揭要集經義待質諸書行于世海內稱爲中麓先生

李衡字虎門開先之孫萬歷戊午舉人工詩善書每與同邑張光啟倡和山水花木閒後以不得志終有墨跡二百二十有九

高應玘章邱例貢生中麓弟子也工詩詞隆慶時爲元城丞有清白之譽是時王元美在大名應玘上詩爲所賞鑑著有醉鄉小稿歸田稿

袁奇蘊號海靈章邱人治春秋著有春秋刪春秋解子三人聲韻

濟南府志

卷四十九

人物五  
明 章邱

奎

韻

袁蕨一名氣號泰丞奇蘊之子邑諸生性聰敏過目卽成誦九歲善屬文喜詩曲有烟雨樓稿行世

袁韻號清越奇蘊之次子性嗜學天性尤篤父素有心病每出入必隨與兄聲最友愛朝夕切摩聲謂爲諍弟共著麟經匯海一書

王時英字千甫章邱諸生善古文詞能詩尤工書法舉鄉飲賓

張國籌章邱人隆慶年選貢生任行唐縣知縣雅負才名善金元

詞曲有脫穎茅廬臨歧柳章臺柳等雜著藏於家

馬廣章邱人性樂施因字濟周諱濟困自族人始乃捐財爲義社

族凡下戶四十人馬價徭銀皆爲代輸他姓貧者亦多依之廣

勇決有膽畧尤精騎射正德辛未流賊張興張旺等三千人屯駐步村鎮分掠四出有七千餘騎直抵大冶廣所居也廣挾弓矢躍馬衝賊皆驚散嘉靖丙午春萊蕪巨寇吉關等二十四人白晝搶劫亦據步村廣令仲子居守長子接應賊遣迎敵廣一箭落其帽迎者逸廣攻之益力賊有逃者廣知有伏鞭馬突過一箭中其目賊大潰次年有楊龍楊虎兄弟率眾二十餘人晝劫鄰村范思升家有救援者廣助之殺二楊餘悉帶傷歸自是絕警者十七八年子旣閑旣同皆庠生

康延世章邱人崇禎年武生多力善騎射土寇作亂糾鄉黨禦之爲一方所依賴後因賊眾猝至遇害

劉淙字源深章邱人少孤成化閒貢入太學念母鄭老多病卽告

濟南府志

卷四十九

人物五  
明 章邱

畜

歸母卒廬墓側有羣盜遺之米不受相與歎息去三年墓產靈芝數本知縣陸公里顏其室曰報本室爲立劉孝子傳

高能章邱人以諸生入太學母疾日夜叩禱尋愈事無巨細必稟令以行常云夫死從子之文可以經可以權泥古者鮮不得罪於名教兄嫂死而各葬有年矣能乃力合之人稱其友及地下云

侯志勝章邱人家貧甚嘉靖閒有沂州解銀大戶鄭鶴算遺銀百兩志勝拾報於官鶴算欲中分之不肯受官給匾獎之懸於戶內而逃

胡東銘字鑑南章邱人善吟咏能金元樂府不樂仕進隱居南村結屋鑿池蒔花種竹日徜徉其閒天啟中縣令表其廬曰冥鴻

高風有悅性錄行于世

張光啟字元明章邱人邑諸生每試輒前茅聲名藉甚崇禎末漕撫朱欲薦用堅辭不應遂放情白雲湖之濱滅跡西墅日以園林詩酒爲樂買山居以梅公巖老漁題之足跡不入城市卒年八十餘著有自娛草四卷行世

呂應魯章邱人萬歷二十一年歲大祲縣奉檄煮粥救饑應魯輸粟百石濟荒撫按給冠帶門匾以示優獎

牟華野章邱諸生聞甲申之變以身殉國婦甄氏亦以身殉夫墓在北曹范村之西南有碑識焉一時死者又有牟瑞野牟穎野牟興春

張應祿章邱舉人性耿介好義里人高道子婦已及笄貧不能娶

濟南府志

卷四十九

人物五  
明 章邱

壹

應祿爲畢其姻同學友徐祺父歿於從軍助以貲歸其喪因父慮妹家艱苦應祿卽割腴田資之

李文慶章邱諸生比鄰有吏人數歲時父出游二十年忽來歸吏人拒之文慶爲說古義吏人感悟劉中庵元之名相也嘗聚石爲十友其一移置學宮太監谷某遣人取之文慶遮留曰二百年物未可動也來者氣沮石得不行

張可壽李氏舊僕也李江南海州人其先世以友方正學遇禍死

幼子顯甫離襁褓可壽負之以逃居章邱大溝厓徙舊軍鎮顯

旣長人無敢與婚者可壽妻田氏欲子之可壽曰乘人之危不

仁干主之分不義吾弗爲也以女妻之家亦稍裕其後李氏子

姓蕃衍春秋祭享必及於張

終

人物六

明 鄒平

孫本鄒平人孫進之裔也宋末由淄川徙鄒傳至福爲提控官生希武又四傳曰仲謙生四子曰本曰智曰雄曰龍明太祖興本以壯士歸附得軍官追寇金山歿於陣弟智代之亦歿弟雄又代之成祖起靖難兵雄以燕山右護衛爲前鋒積功累升羽林右衛指揮使扈成祖北歸成祖念無可守潼關者一日熟視雄曰得之矣卽以命雄雄頓首曰臣効犬馬微勞蒙恩使備宿衛願依日月之光老死輦轂下奈何棄臣於遠成祖笑曰毋以爲遠乃任汝萬里長城也使乘傳至潼關予以昭勇將軍世職其

濟南府志

卷五十

人物六  
明 鄒平

一

在鄒者本之後也本之曾孫有資資生文澤及文瀛

孫文澤字德輝本之五世孫也文澤有兩弟曰文海例授高年爵曰文瀛以舉人累官唐府右長史奉議大夫文澤性嗜書入太學選除陽城縣主簿歲荒民多流移設法安輯以佐貳署縣印長吏或不能及次歲大饑亟請於中丞出倉穀振救先期預出榜文某鄉某里某日至民沾實惠戒里書不得近面至編審徭役於累戶則多降格於富戶則酌添丁又於學校加厚往時廩生有供了免門銀文澤曰科舉不拘增附而差役獨不累廩生何歟一體優免之縣士會文約以朔望且爲出紙筆之資撫按委查一州四縣殷實戶假盤飧而行貨賄者不可勝計文澤一切嚴拒實冊上聞上臺賢之陽乃兩城山險盜聚上命捕之

功成蒙首獎病縣門隘高之改作譙樓并創建上司行縣公署  
已而辭官歸士民留之不能止縣人送至化龍池遮馬不得前  
哭聲遠聞二十餘里抵家惟明農課子居郭西希周亭每月一  
度入城良宅沃田盡讓諸弟自擇小第畱地不及百畝優游三  
十餘年陽城距鄒往返三千餘里而來問遺者歲有四五次嘉  
靖四十二年卒年七十八子五人養晦養吾養朴養默養禾當  
文澤之捕山寇也練鄉兵陳山下爲檄諭之曰若輩亡命爲饑  
故耳然干國憲父母妻子皆將爲戮若輩宜審處吾法不治脅  
從倘散去者吾弗相憾也盜聞之散者半數曰又陳山下令如  
前散者益多文澤曰可矣鼓行而前盜驚竄巢遂空當道大奇  
之曰得吏如陽城三晉可銷甲矣後謝病歸歿祀陽城縣名宦

濟南府志

卷五十

人物六  
明 鄒平

二

祠

按文瀛及養初墓前各刻官誥一通封文瀛則因其子養初  
且嘉文瀛昔供職唐藩後乃高尚封養初則嘉其以甲冑之  
裔而善吏治知養初官誥由考最得之矣其事實無所攷

孫忠字子敬鄒平人明宣宗章后之父也初名愚先世孫七公生  
復初復初生世英世英生忠爲諸生貢入太學洪武己卯擢山  
西介休主簿又爲河南永城主簿時營天壽山陵寢率邑夫赴  
工得上下心補馮臚序班而家猶居永城第四女被選入宮爲  
皇太孫妃宣宗踐阼冊貴妃陞忠驃騎將軍中軍都督府僉事  
賜名忠并錦袍犀帶冊爲皇后追封推誠宣忠翼道武臣特進  
榮祿大夫柱國會昌伯食祿千石子孫世襲復賜諡券追封三

代遣歸賜御製綠竹引賜還鄉詩景泰三年九月卒年八十有五勅葬於宛平之香山追封會昌侯謚康靖天順改元追封太傅安國公改諡恭憲

明史樂府注太監王振怒國子監祭酒李時勉不附己誣以伐彙倫堂樹用百斄枷枷之助教李繼求援於會昌伯適生日宣后時爲太后有饋賜伯謝後附奏曰去年此日國學李先生賁臨不勝榮幸今諸公皆至李爲桁楊之臣鬱然不樂上知振所爲飛詔釋焉

按孫忠之後皆居北直隸非鄒平人矣然舊志所載不可盡廢且繼宗等皆生長於鄒平故節錄於後以見一門之盛焉

孫繼宗字光輔忠長子宣德三年授府軍前衛指揮使宣宗特愛

### 濟南府志

### 卷五十

人物六  
明 鄒平

三

重之景泰壬申襲會昌伯以復辟功封會昌侯食祿一千二百石時曹石恃功橫悖朝廷獨倚繼宗爲重加太保成化改元命總提督十二團營操監修英宗實錄加太傅成化己亥薨年八十五詔贈鄉國公謚榮襄

孫璉字國用繼宗第四子以世嫡嗣太傅之舊官爲錦衣衛指揮使居母喪哀毀過甚早卒未襲爵追封太保會昌侯生子銘

孫銘字自新璉之子襲會昌侯嗜讀小學有儒素風管理三千營

宏治時遷五軍營正德紀元改奮武營己巳廷薦提督神機營

軍務僉後軍都督府事西夏平加太保正德十五年卒子杲

孫杲銘之子嗣侯嘉靖初坐營八年以安昌伯故盡革外戚恩澤

封爵嘉靖十六年卒子應乾不得嗣

孫璽繼宗之姪錦衣衛鎮撫原籍鄒平者璽子雲龍生員雲龍子儲秀錦衣衛千戶儲秀子世勳鎮撫世勳子重光衛府典儀至國朝順治初年猶有子孫爲邑諸生者

孫恪鄒平人洪武末官懷柔縣主簿陞知縣清廉爲上所知識福建布政司叅議致仕歸載書卷二十車贈遺親友

孫碩鄒平人其祖菊洪武三年自棗強徙鄒平傳至碩中洪武癸酉鄉試官監察御史外歷山西陝西四川按察使性至孝奉母之官後官四川母以老且道遠不能行因辭職朝旨不許乃樹萱於廨謂見萱如見母也檢討黃公太常方公皆爲作宜萱堂敘一時名流多歌詠其事焉

王慶成字吉祥鄒平人以穎異之資鴻博之學貢入上舍友天下

### 濟南府志

#### 卷五十一

人物六  
明 鄒平

四

士講明治道考最銓衡授廬江知縣剔弊除奸安民阜物邑稱大治以內艱解職服除廬江之民奔走乞求欲其復任終不出成化七年耿琚爲作墓碑子琛官徐州夾溝驛丞

孫鵬鄒平人成化丁酉舉人有孫曰梯以貢仕高郵州同知梯生子五人其次曰燠厚重端方先德行後文藝庠序重之萬歷丙午舉人出仕潞安府襄垣知縣寓撫字於催科擢慶揚府同知未久告歸居家二十年以慎持身以實待人步趨一依於規矩焉

劉文進鄒平人祖海洪武二年自棗強徙鄒平禮泉潁灤之鄉居焉三傳至文進以人材舉先是帝夢太極殿將傾一偉丈夫扶正之其指爪赤而長使人徧物色得文進如所夢擢之仕至南

京都察院直言敢諫多著功績有弟曰文義文著亦登仕籍義官至平涼府同知著官至守備文進數傳有巍然以俠烈聞生子卽劉洞也

傅顯鄒平人正統甲子舉人官象山縣知縣其弟曰榮榮有曾孫曰居巖官婺源縣丞娶景氏無子居巖年五十解官歸景氏爲納王氏女生子瑞璋官縣丞瑞璋生子作舟字濟汝崇禎壬午被兵時年十四于夫人者姑母也欲攜之去曰吾去祖母將若何乃止及長有幹才爲諸生所往來皆賢能者宗族稱其孝養焉

李海字仲容世居鄒平有名士成者洪武時以耆宿入覲賜冠帶爲農師生子某募眾以應靖難之師文皇嘉之授武功中衛千

濟南府志

卷五十

人物六  
明 鄒平

五

戶又屢用戰功進武畧將軍卽海之父也海兄弟五人而海居四及長能讀書所行不失規度三兄以次亡海悉力奉喪事又事孀嫂無違禮洪熙改元始嗣有父兄之職宣德初官武城後衛時武城衛多食祿不視事又爭事聲樂海治戎務翕然有能譽出同列之右且務簡靜不樂游衍少年聚昧之不顧也以宣德三年卒贈昭勇將軍年三十有八子銘

李銘海之子四歲失怙母邢氏徒步攜孤兒請世祿於官稍長又命就外傳常拔淚語以先世之遺烈俾圖不墜羣居凡四十四年茹澹服韋節益勵以成化五年卒年七十有二銘官至武城衛指揮使掌後軍都督府升都督僉事鎮守三屯營

按李海墓在鄒平縣西上口莊濟河之陽撰碑者爲左春坊

左諭德姓名不可考首言僉後軍都督府事李公具其父昭勇公行狀使其從弟百戶忠奉以請余書其墓上之石初李公在京營名有智勇先尚書襄毅公器重之同下川廣又同殪虜延綏遂擢叅將久之受詔總薊永山海諸路兵捍國東陲爲時重臣此則李銘功績及官階也襄毅當是單縣秦襄毅公紘

耿尙忠鄒平人少時讀書過目輒成誦曾在架局取日記簿投諸火後錄出不差一字宏治十一年戊午科預以解元自命時堂邑李太僕爲諸生與許君廷用同學各以擢元自勵兩不相下尙忠出闈後袖大鐵椎徧訪山左名下士使各誦其文後訪許君求誦其文許退遜不爲誦尙忠出椎怒且笑曰君鄙我乎許

### 濟南府志

### 卷五十

人物六  
明 鄒平

六

爲誦之求於李李亦誦之尙忠謂李曰君勿爭解首屬許君矣君文佳甚亦高第然兩君中間仍須位置一耿尙忠也及榜出許第一耿第二李第三尙忠上禮部試不得第官句容縣教諭選士二十人殷勤訓之晚歲家居安貧樂志晏如泊如一日出遊跨驢過濟南適李大中丞來撫山東乃尙忠弟子徑入署訪之中丞倒屣出迎延入肅謁樂談竟夕留一日歸厚贖不受尙忠居城西距通衢二里明年中丞按部屏騶從謁其家尙忠方食中丞驟入臥內尙忠喜出不意挽與接坐手奉秬粥進之曰亦曾嘗田家風味乎此雖蜚於口慘於腹然鄒平瘠邑得此正不易易意欲以民艱風大吏也中丞唯唯爲盞一甌而去尙忠終以不元爲憾以其法授陳嘉言又不元陳以授子其蘊果以

第一人發解矣

王賁字文明鄒平人先世由青城來鄒平賁總角方學以諸生七入秋闈不第用明經貢於太學考最銓曹授奉訓大夫陝西階州知州撫字匡直夙弊一空羣利一遂民安物安郡稱大治滿歲擢山西太原府同知以內艱歸服除階州民李貞亨數百人詣闕請公以同知仍守階州不許復補太原府同知居亡何以老請歸天順十年朝命進階一級有司歲給米五石成化六年張鳳騫爲撰墓碑

按王賁墓在鄒平黃山北署鄉貢進士張鳳騫撰考張以成化四年戊子舉人八年壬辰進士官至太僕寺丞撰文在成化六年是時未捷春闈故止稱鄉貢也

濟南府志

卷五十一

人物六  
明 鄒平

七

王之土賁之六世孫隆慶丁卯舉人戊辰進士出官潁州撫綏振厲威惠兼聞治行爲江北第一擢南京戶部員外郎復奏績擢宣國府知府以外艱歸起復補廬州知府操江中丞用忌者言奏落職久之起保定府同知朝廷用直指言擢河閒知府復以蜚語罷歸未久卒之士性坦夷推誠接物不設城府而事有操持屹不可奪官潁州日有軍尉橫恣爲士民害廉得其罪狀報直指重論之郡中震栗廬江界有巨盜嘯聚數百人發兵傳檄深入其阻盜衆解散境賴以安河閒東南地勢下多積水舊任錢君橋其南之士又連橋其東橫亘六里病涉者頌之別駕以羨金致饋固卻者三固進者三乃命守者納之遇平糶出之河閒有十六歲趙少婦無故死亟使廉之乃其姑與里中少年通

貧綠謙及少婦嚙指自誓又百方窘之益罵不從姑介少年共擊之斃焉獄具弊罪坐姑及少年而旌少婦之烈至於重文興學慰荐士類其所甄獎多成科名特質行自任以法繩下無所阿私常爲僚吏所憚故數數中傷之居鄉時舉子錢千緡在官聞里中大饑寄書使子盡折其券門外故設空貨肆一偷兒挾扁入爲守者所執命釋之縣有先大夫言氏裔甚貧欲貸其墓石給以值不令他鬻石賴以存卒於萬歷二十年子庭薦

王庭薦之士少子童時卽馴雅如老成父特鍾愛之每攜之宦邸歷守南北四郡無不從者乙未充太學生戊戌仲兄庭奏爲濟南衛指揮長兄庭對下帷讀書不遑內顧悉以家政付之不辭苦怨者三年戊申加布政司經歷乙卯大饑救活人無德色丁

濟南府志

卷五十一

人物六  
明 鄒平

八

已謁銓部授四川布政使經歷方岳陳公雅重之己而迂直指於中江山谿嶮熾歎曰隻身天末能勿動秋風尊罍之思乎蜀歲例貢御用錦筵二物乃經歷所職庭薦力辭又以補縣缺亦不往以病請歸竟不起方岳使護輻歸里

張魯鄒平人祖克讓官國子監博士生希賢從家人避亂出亂少定惟希賢一人歸生魯字柳泉年十三遇亂賊將挈之去魯曰我幼學子也賊曰子能背誦大學序乎魯應聲口誦如渴瓶水賊喜縱之去予一大雨傘曰此軍令也適大雨三晝夜張傘以次同匿者皆得食亂定歸發憤力學充博士弟子員中永樂九年辛卯鄉試官武昌同知以內艱起復授禮部祠祭司郎中又出爲保定同知擢廣平府知府體國愛民以清自勵隻身居官

角帶布衣室無長物或於署內灌園種蔬以食有直指入境訝其積多下令搜之其孤峭多類此以病卒於任魯少時聘於樊後薄其貧改盟焉知縣李侯素奇魯適鄉先生李君有女代致聘幣涓吉有期樊女義不改適或爲調停使魯埽除兩室分兩居後樊生三子翔翹犇李三子羽詡翼犇與翼皆拔貢犇官台州府經歷

張詡魯之子少備駙馬選魯使入都辭得旨放歸生五子

張璣詡之次子有文名學使者取爲第一挈往他處使隨棚考試皆第一以拔貢入都途次遇舉人李某沽酒共飲李以璣豪放心曠之又遇一能者邂逅相契訂莫逆交後數年璣任山西興縣知縣李適爲其上官璣守正不阿李益曠之授意於人使抵濟南府志

卷五十

人物六  
明 鄒平

九

其隙有奸民控璣問者知其廉正訊所控皆誣欲處以反坐李怒欲寘璣重辟長子忠淵詣闕陳情擊登聞鼓上嘉其孝勅下巡按勘問勿枉廉能按院熊君卽邂逅相契所訂莫逆交也事得白獲冠帶歸於家

張傑字宗彥鄒平人其父克善乃克讓之同懷弟也同居伏生鄉第六里而克讓居柳泉莊克善居禾稼莊克讓有孫魯以太守起家克善有子傑以方伯起家自是遂分兩派云傑爲克善第五子洪武甲子科舉人仕至北布政使叅政生四子第三子曰可祥生數以貢仕益海衛經歷數孫荆州經歷琴孫朝臣以貢仕武清縣訓導

張松鄒平人其始祖曰明秀由東強來鄒平四傳至興生四子桐

桂杞松松博學好古讀書十行俱下有重名固安楊方城爲山東布政使欲致於塾許以領解松謝不可因罷歸以貢出仕知祁縣事有治行所著書有瀛南子及祁大夫祠記皆不傳

張一元字鳴春號仁軒桂之孫也桂貢生官清河訓導生佩芝佩弦生一元嘉靖甲子舉人隆慶辛未進士初任陽曲縣陽曲者晉都會也軍民錯趾豪宗恃勢爲之釐大猾剔巨蠹覈隱田輸匿賦遷考功司主事轉文選司員外郎調考功郎因疏救趙南星貶秩爲敘州府同知未抵任改部郎尋擢光祿卿至僉都御史巡撫河南歲大饑上書請留贖金借卹餉貸河北漕米又請發內帑以賑民上悉從之全活甚衆葉大盜李自省挾饑民爲亂一元計擒之巡按御史希旨上言開礦一元執奏不可事遂

濟南府志

卷五十

人物六  
明 鄒平

十

寢致仕歸篤愛弟妹設義莊以贍宗族卒年六十五

張一亨字仲春號義軒佩茲次子也生而夙慧父避繼母之難於渠邱田荒室罄乃業農悉其才智用之生殖以奉父母有餘以卹置父性嚴急醉後易怒家人皆避匿公獨侍往往受朴責長跪夜分乃起兄無子已有子延登卽以爲兄子嘗爲兄御遊靈巖登日觀望海而還延登之補吏垣也戒以持大體勿搏擊市名及病時延登心動上言臣本獨子請歸所生一亨聞之潛然曰孺子何爲令吾不得見兄於地下適延登奉太后遺詔釋楚諸王孫之錮鳳陽者過家意不欲行乃輒之曰此古今極冤獄楚王孫久墜陰關望白日孺子何得徐徐延登行竟不起卒年六十有九太常寺卿趙南星爲表其墓

張延登字濟美號華東一亨之子也其母李氏生延登三十一日  
中稔風疾亟嚙指屬嫂劉曰以是辱邱嫂願兒畜之於是乳於  
劉爲伯父一元子萬歷辛卯舉於鄉壬辰成進士選內黃令茹  
蘖戴星額外積穀至六千石鄰封藉以賑災丁內艱歸邑人思  
之爲立生祠先是一元予告歸過黃語劉太恭人曰國恩未報  
小子幸得服官從膝下進卮酒可累官燭宮齋享出俸銀二十  
金命償之延登拜受至是而太恭人歿服除補上蔡令下車卽  
申詳停徵荒地銀覈逋賦使侵漁舞弊者無所容奸給牛隻備  
子種立粥厰建共濟莊助諸生之貧者境寥廓多盜有警必出  
禽之徧飭保甲彌於未萌鄰封有重囚七十餘案上官委覆勘  
核可矜疑者釋之天雨壞城又受派河夫三千人皆設法彌縫

濟南府志

卷五十

人物六  
明 鄒平

十一

或取辦家資勿擾百姓前後爲令十年行取京職乙巳權禮部  
主事明年授兵科給事中又明年丁中丞艱服除補吏科給事  
中上補言官選閣臣疏澄清四議飭吏治疏惡閣詭奏亂國法  
疏是時廷臣角立黨勢方張乃上感時觸事恭陳無黨之論疏  
福王就國又上分封宜速括地太嚴疏又奉勅巡視京營條上  
八議一核兵額一定驗期一教騎兵一數軍實一嚴占役一清  
犒賞一練捕營一恤班軍編巡視事宜一卷其時蒙古部炒花  
不靖延登又上會議太輕煩言無用疏旋奏改歸嗣本生父甲  
寅以本生父一亨憂家居明年山左大饑捐贏餘濟窮餓養老  
稚掩骼服闋仍補吏科已未管計吏守一亨戒勿發人陰私  
然而遇國家大事輒義形於色故卓囊之上無虛日在部有銓

司委任當久疏枚卜奉行宜公疏亡何因枚卜事有爭上臺臣保舉非法疏不從遂投劾歸鄒滕蓮妖起與邑大夫日理城守且上書撫軍誅首惡散脅從勿調客兵自擾辛酉卽家起太僕少卿甲子轉正卿乙丑以繼母艱歸丁卯服除會推巡撫兩浙崇禎元年六月閩寇自東甌犯石浦羽檄狎飛戎服登舟賊方圍昌國衛轉攻爵谿城聞延登至退保台州大陳山延登帥三衛士衆深入勦之火其巨艦生縛其魁餘黨入粵耀兵而還以功晉銜少司馬長安忌者紛布蜚語遂具疏辭新銜浩然解組口不言功但著晏海編存將士戰功之績焉辛未事白起右都御史掌南院有武生糾衆辱臺臣謂御史之法不行法更無可行者武生之衆不問衆更無可問者卒以法之東牟戍卒之變

濟南府志

卷五十

人物六  
明 鄒平

三

山左洵洵卽寄家書令出蓋藏爲餉兵守城費又糾同鄉縉紳亟陳勘定要着勿以招撫自階之厲掌院二年擢工部尙書改左都御史甲戌九月鄉人某遣人私至京爲邏者所緝事連延登請罷請勘皆不許乃引疾歸戊寅冬鄒平被兵帥子弟蒼頭助戰守事平作東園小騷孝勇傳四烈傳三物說修城記各一帙已卯鄉人事訊明果不讎已再起掌南院歲大饑倡捐院帑積貯千餘金令人買江楚米賑貧設慈幼局全活弃兒無算辛巳五月署刑部值大赦詔限季夏通結時大暑日夜鉤攷拮据鞫竣而怔忡之疾作少息北上便道過里中數日趨行疾大作翼日晨起櫛沐危坐嘆曰吾不克入春明再瀝肝膽矣日亭午端坐而瞑贈工部尙書加太子少保諡忠定

張萬程延登家嗣也生而廣穎濶頤雙目炯炯時延登爲中丞劉夫人子語中丞從襁褓中抱去嘗坐置膝上曰是兒有福宗祔賴之矣十六歲補博士弟子員督學吳公按士陽邱面試露布一表一纒纒干言立就吳公喜曰驟褻四蹏如曳電一日千里未足爲喻亟拔置前列俾食餼自是試輒高等身處華腴行篤繩墨丙午至乙卯四科皆以片語受屈抑鬱卒年三十二子同居廣居

張萬鐘字扣之延登三子也少英敏有幹濟才崇禎戊寅被兵王午又被兵城守皆無恙守禦之策調度之方實惟萬鐘是賴先是戊寅十二月十五日有數騎至西門外殺人次日騎兵五百來城西北發矢而去逼午大風鐵騎三百飈忽迅集俄頃亦去

濟南府志

卷五十

人物六  
明 鄒平

三

立破長山卽旋濟南時延登適以總憲引疾歸家嬰城有法故不再攻至壬午延登已歿萬鐘知必受兵預求援於遼東副將邱磊遣部將率遼丁二十餘人來十二月一日兵忽至攻城西南隅力禦之翌日甲騎三千步兵五六百擁雲梯突至先是知縣楊可經斂民財環城加高三尺及兵來攻梯短不及堞兵益怒戴楯穴城或張牛革如小穹廬伏其下矢石不能制城人藪火推下燒之攻者益力相持數日拔營去東趨萊州事定以貢出仕鎮江推官卒於任

張同居萬鐘子也以祖廕官罔卿游歷少府轉南京戶曹管鳳陽倉鳳陽舊無城郭同居謂倉庫國儲也疏請改移臨淮扼險創關且稽察積核歲贏餘萬石升守滇之澂江府再守廣州府卒

於官所著有座右格言激海集

張實居字賓公號蕭亭延登之孫司李扣之之子也去城市卜居大谷深處於山麓泉畔得五色靈芝因作采芝山堂背黃鵠面象山流水繞戶青山在左一瓢一卷吟嘯其中所著有蕭亭詩集王漁洋尚書爲作序別有答詩問二卷

張奇策先世有名順者自棗強來鄒平爲東門張氏以別於西門張氏也生守臯守臯生得祿得祿生四子其三曰維以歲貢官寶坻縣丞縣受兵與令議守親當矢石有全城功生三子長學易學易生八子其長曰奇策爲諸生事繼母以孝撫弱弟以友置義田義塾惠及族黨歿祀鄉賢祠

張毓乾奇策之長子也弱冠游庠結宇東郊顏其齋曰三立取不

濟南府志

卷五十

人物六  
明 鄒平

古

朽之義也父疾侍湯藥衣不解帶疾尋愈就養三子毓泰邢臺官署天啟四年忽不起奔往扶柩以歸哀毀骨立葬父九龍山獨留墓所結一廬植柏栽松或以世事語之瞠目不答墓側有泉久涸及廬於此泉忽溢服闋歸泉亦竭按院以純孝獎之

張毓泰奇策之三子也天啟進士任邢臺知縣歷汾陽永年二縣累官江西布政使居官三十年勤儉不異寒素居家古道自處言多侃論

張毓謙毓泰弟也天啟中任鴻臚寺左丞以忤權奄謫歸崇禎十五年再起鴻臚寺序班不赴甲申三月聞流賊陷京師慟哭不已至八月卒

崔獻成鄒平人成化丁酉舉人官桃源知縣性鯁直同官不公因

忿與之爭誤以脚趨斃之自投河死從者求尸不得以一靴歸葬

崔凌霄鄒平人崇禎庚午舉人先是縣令舉賓典禮以平步凌霄四字爲公堂之額人以爲獲雋吉兆秋榜出果中式善友人言行必有箴規後以上公車卒於京寓

程企朱字景陽鄒平人力學嗜古試輒冠其曹然不屑爲章句儒習戰陣究韜鈴嘗讀諸葛隆中語慨然太息天啟丙寅忽以病殞年三十六驗其壁上預書死期云

劉信棗強人明初從軍積功至武畧將軍武功中衛世襲千戶以官籍遷鄒平家焉信生賞貴生四子長曰宣守世職世職外別分三房一曰宜宜生圍圉生治以貢往登州府教授治生談談

濟南府志

卷五十

人物六  
明 鄒平

五

生巨鯨巨鯨爲封公也一曰宗宗之長子曰因因生洵正德丙子科舉人洵弟漑嘉靖丙午科舉人一曰賓賓生次子戡正德丙子科舉人與從兄弟之子洵同舉者也

呂正鄒平人成化辛卯科舉人仕至常德府推官正生夔正德丙子科舉人鉅鹿縣知縣正又有子岳以貢往蘄州府推官別有呂剛官主簿呂瑛官典史亦其族也

陳嘉言字亦山先世自棗強遷鄒平數傳至嘉言從耿尙忠學耿以解元自命宏治戊午亞元意不自得授法於嘉言亦以元自命嘉靖乙酉中式非元復授法於子其蘊云

陳其蘊字道甫號此泉嘉言之子天資穎異骨相超絕初讀書上口千言初學文下筆千字年十六充邑庠弟子員每試必首羣

英嘉靖丙午科年二十四以榜首發解監臨党公稱其文爲二百年來舉業家第一手性純孝年三十五丁兩艱以悲哀病卒兵部亞卿東江楊公爲志其墓

林棠字尙木鄒平諸生受知於縣令王紹徽萬歷癸卯王分闈終爲其門下士英敏有幹畧崇禎辛巳大饑著荒政畧呈之上官皆切中時務以不第終不仕

邱磊字文石鄒平諸生面赤美鬚髯落落無檢束邑人張萬鐘獨好之磊以歲試被黜思仗劍從軍以馬上功名自立萬鐘函致遼東兵帥拔裨將磊好同官左良玉良玉以弓矢射生一日見道旁有橐駝馳騎刼取之乃錦州軍裝也磊亦與同犯願獨任罪以脫良玉良玉出磊坐繫刑部獄十三年良玉出金救之得

濟南府志

卷五十

人物六  
明 鄒平

六

不死出獄仍投遼東久之積功至總兵官受鎮東將軍印崇禎四年高陽孫承宗督師會議築大凌河城磊供執筆之役十五年冬萬鐘料鄒平必受兵遣人求援於磊磊命守備張某及隊長押住帥遼丁二十八人來十二月果被圍鄒人力守城得不破遼丁死者五人焉十七年國變磊至南都福王以爲山東總兵官守安東衛旋爲怨家計陷詔獄而佯與交好會史可法督師江北知磊忠勇疏請貸其罪將大用之怨家懇乘磊未之知也赴獄慰問良久不交一言執磊手痛哭而出磊疑禍不測遽雉經死萬鐘家賂獄吏得其尸歸葬之鄒平城西五里

劉光澤其始祖源自橐駝來鄒平居城南蝦蟆注之側後移居東門故號東劉以別於西郭劉氏也源五傳而得光澤以貢生與

修校十三經疏事竣國子祭酒王公題授司李辭不仕泰安蕭少師爲作抱璞傳人遂呼以抱璞先生生櫬又生楠櫬嘉靖辛酉科舉人知獲鹿縣楠生文燭文燭生挺官兵馬司副指揮

馬安其祖榮自棗強來鄒平有四孫第三孫曰孟爲禮部儒士生可大爲省祭可大生道成第四孫曰安爲壽官好義人也縣城隍廟年久傾圮縣令李瑞來欲修之命董其事安與里閭結社以貧富爲率出錢若干繕加卷棚三楹穿廊以通寢室兩廡及大門重門復若干楹皆新其土木而金碧之鄉先生孫養默立重修碑萬歷六年事也

馬道成宣之孫天啟辛酉武舉本名驥善騎射發必疊中主試者爲改名道成性慷慨好施予尤善發彈丸公車北上道出河閒

濟南府志

卷五

人物六  
明 鄒平

七

府遇響馬三騎或後或先頗相連綴道成不爲意適林樹上有兩雀爭食發一彈迸落之三騎皆吐舌亟馳去

孫孝子失其名鄒平人年十六入大學又五年入譯館能修其業居六年將仕一旦翻然曰吾久在外吾親老孰爲養者不歸無以子爲也卽日上書上閱其情而允之遂束裝歸時宏治丁巳春也邊尚書貢爲作孫孝子詩卷敘

孫繩鄒平人貢生祖母孀居繩少長父卒而母又孀繩孝事兩孀父遺一妾亦善事之如父在時有二妹善嫁之妹各生子母愛諸甥一日不見不歡也繩養諸甥於家以悅母意母苦節五十年獲旌成晉徵爲作孫孝子傳

王勝鄒平人三歲喪父其母他適少依祖母馬比長孝事祖母祖

母歿竭力營葬廬居墓側

高樂鄒平人五歲喪父依母伍氏長充府吏因吏事如京而母歿聞計歸營葬畢廬居墓側日夜號哭負土成墳並遷祖祖母叔叔母皆以序葬成化時旌焉祀忠義祠

辛恕字貫之鄒平諸生葬母後廬居墓側父歿亦如之廬居凡五年宏治時旌焉後諸生准貢仕至南和縣知縣歿祀忠義祠

成己字爾仁鄒平人隆慶丁卯舉人居家以孝友聞任雄縣令以節約自矢薄徵緩省屬傳然不爲勢怵中貴人弟姪素暴橫收其甚者窮治之民驚服擢治行第一遷固原州知州及歿以邊功賜祭葬諡文貞祀鄉賢子三景運嘉運昇運

成嘉運己之次子由副貢仕高郵州同守高郵城枕黃河時值河

濟南府志

卷五

人物六  
明 鄒平

七

水暴漲士民大噪嘉運躬率士民運土築堤得以無恙郵民呼其處爲成公隄立祠祀之未幾卽棄官歸構小樓凝嵐岩下署曰環山隱棲息其中終身不入城市自號參寥子

成昇運字元坤號寶月己之三子弱冠登振庠序萬歷乙卯大祲竭力捐卹饑斃者從而瘞之由歲貢仕兩淮運判綜理鹽務以舒國計東臺十場鎮如慈父會梁垛盜起結聚恣劫以智擒其首餘皆宵遁東臺士庶愛之思之祀淮南名宦祠

言芳鄒平人成化己丑進士博學謹守仕至廣平府知府兼多善政

馬九功字肖甫鄒平人世居孫家鎮鎮皆業農九功始倡爲讀書訓弟桂卿爲諸生性喜施濟近村貧民婚嫁喪葬咸貲給焉萬

歷甲寅大饑出粟賑貸全活萬人居常訓子弟曰讀書積德缺一不可以貨授兩淮鹽場副使不赴捐金數百兩創建北門甕城爲邑永利後孫驪成進士

呂成名鄒平人天啓初爲臨清營旗牌官以征妖賊陣亡

成端徵字臨人鄒平武生少倜儻有膽畧喜讀孫吳書崇禎十五年邑被圍急身先禦之敵張牛革南門下伏甲穴城矢石不能制徵以蘆席束柴雜硝黃燹推城下灼之敵稍卻數百束一時舉火燄連徵身翌日而逝撫軍王鏡山題請優卹邑侯楊可經自臨哭奠題其墓曰烈士以時事倉皇未得卹典邑人惜之

明 淄川

國盛字永盛淄川人登進士第累官工科都給事中遇事敢言景

濟南府志

卷五

人物六  
明 淄川

九

泰癸酉與曹給事竄抗章論內官毛長隨罪惡狀適遇毛於禁門外盛與龔手格殺之遷順天府丞陞通政司右通政卒於官王達字士禮世居淄川之豐泉鄉父早亡事其兄自少至老敬慎如一日介於利無所苟嘗詣縣于途得大戶所遺三百金守候竟日嘆曰是能不敗汝家乎爲投之官縣令稱爲長者鄉人益義之同居四世家百餘口不異爨洎子崇義爲比部尚書郎出使中州便道省父卽遣之去于時達染小疴不欲行勉之曰中都之待理者熱之望濯不翅也第往訊獄平允忠卽孝也去踰月遂不起人謂王氏之賢皆達之遺教云

王崇義字子由達之子十歲通易詩戴記嘉靖戊戌進士授刑部主事提武定侯獄侯信臣素驕更相飭謹視之崇義曰是悞國

多矣法吏知以三尺從事耳宮嬪之變坐逆誅者以百數上怒欲族之崇義曰外家安與知內庭猝發事抗論以爲律止坐其家長中丞毛伯溫壯其議遂以聞疏格中三日衆皆危懼事已得可所活男女七十餘人奉使簡河南獄道廣川有囚家偵之計有所關說立捕治之及河揭諸所郵置悉焚之曰崇義而不惟不辜是讞而私家于獄之兩辭者有如河北行縣會逮錄其可矜者數百人以聞草三上皆得可且出守中丞四明屠公僑念鄉郡強崇義往至抵天台道上見一少年毆士人幾溺戟手詈之曰吾殺汝問之卽屠奴也崇義曰是屠公所爲屬我矣捕得重笞之四明多豪宗不可問又卑澤家人子大店遂以盜波守致仕歸欲以一室邇客不克好事者相與助之材因顏曰助

濟南府志

卷五十一

人物六  
明 廣川

三

軒日以經史課子姪相繼登賢書者有見一山人集見一筆談五經註辨行於世祀鄉賢子暗汾州府學教授有暢然園稿

王教字子修號秋澄淄川人嘉靖甲子舉于鄉辛未成進士授戶部主事權崇文門有介聲權許墅關設便民橋橋下爲小關舟之不中權者悉聽出而稅視昔則溢額焉監兌江西裁一切浮費尋補考功轉文選乙酉主山西試得王濬初等六十五人拆卷知王爲山陰相公子衆引嫌欲亞之教曰若閱卷時知爲相公子乎未知爲相公子而錄之與知爲相公子而抑之等私耳我以文衡不爲嫌低昂也陞考功郎中覆諸劾疏二百餘貪墨者雖輕必正之然冤者亦白轉文選杜請托抑奔競凡四選風清弊絕有託巨璫居間者慨然曰丈夫鬚眉如許而俯仰刑餘

此其人不肖何如也匪惟不從更加劣處巨璫銜之會胡黃門素乖人望擬年例處之胡偵知先疏訟教適吏部推饒伸萬國欽兩人皆論去相特旨謫者前當庇胡憾教伺帝思去相時故捧疏進遂觸帝怒一司盡黜教辭朝有句云丈夫去就尋常事小帽青衫亦主恩歸臥山房謝絕公府長吏造廬始獲一見沒後十七年光宗卽位錄卹降斥諸臣復原職贈太常寺卿撫按檄縣祀之學宮乃立祠于縣之通衢有碑記

王君賞淄川人嘉靖戊午舉人已未進士授中書舍人封藩高麗秩滿擢浙江道監察御史舉劾不避權貴出視河東鹽政剔蠹胥鉅豪強奏報時視往例溢額數萬悉出之以市屯田修太原府學歸不持一錢時江陵柄政君賞將按秦中江陵謂秦撫與

濟南府志

卷五

人物六  
淄川

三

不佞兒女姻親聞其粒政失僚屬心幸爲周旋對曰若其賢敢不唯命是聽若其不賢豈敢枉朝廷法長揖而出抵任遂露彈章秦撫罷會京察江陵諷掌憲謫君賞判許州旋升開封府推官次年升刑部主事歷浙江水利道浙濱海多水患築塘捍潮不辭勞勩調秦州治兵兵安輯升陝西苑馬寺卿一年乞終養歸

孫鑑淄川人以子光輝封推官勅云九閭叩帝洗父冤於不白一經教子貽孫謀於勿替上書而孝義獨彰垂訓而慈嚴更顯事不可攷

孫光輝字華國號夾谷鑑之子嘉靖戊子舉於鄉己丑成進士館試擢爲翰林第一值獻廟議禮爲人後者不得復顧私親抗疏

忤旨左遷真定推官燕趙之風雄于河朔光輝性嚴卽以嚴治之初若不堪久而稔其無私服其能斷闔郡咸稟仰不知有他吏也會述會臺巨寇宵聚爲梗當事者私相計非孫君誰可使者卽毅然以三百騎往覆其巢穴執渠魁以歸復以亢直忤直指劾調南陽與河南鄉試尋陞留都計部郎致政

王所須字衡吾號幹宇淄川人性純篤好學萬歷癸卯領鄉薦授南皮縣令時徵調多端拮据以辦無病於民邑人爲立生祠調交河陞應州知州卒輿榾歸父老披擁於道各致奠以去子十人成進士者三貢生三餘皆諸生

高捷字中白淄川人少家貧荷薪負米力學養親三試皆冠擢超等肄業蒼龍咬潛心理學萬歷丁酉魁于鄉辛丑雋禮闈輒旋

### 濟南府志

#### 卷五

人物六  
明 淄川

五

里益開講席名士多出其門甲辰廷對授行人歷使荆魯蜀晉補司正序應使江右蔡毅中使蜀以母老遠行爲難捷慨易之冊封蜀藩跋涉萬里不辭也陞戶部郎中分司雲南遇瑞邸婚禮例筦金商輸納悉除勒折商人頌焉出守淮安府遇山左大饑流民走淮上餓殍盈路輒賑橫行乃發倉出粟以賑之興工煮粥以食之施藥以療病嚴兵以防亂贖還婦女周給歸資計其註東省官冊復業者十五萬六千餘名寄俸金以贍淄庠政成報最舉卓異陞淮徐兵備副使疏濬挑築河工賴之淮人爲立生祠

安伸號葵盪淄川人萬歷丁未進士初令武強縣濱滹沱漲則爲災設法築隄邑永賴之補陽城禱雨立應擢授御史巡視京

通二倉糾核侵耗夙弊清焉時有議紅丸疏畧曰先帝以焦勞  
太過哀痛失節致成虛羸尋至大漸獨是崔文昇屢以瀉藥進  
李可灼笑以紅丸進事有明據罪斷難容方從哲身爲首輔不  
急討賊而累擬以回籍調理何忍于忘君父之讐而曲庇此么  
磨小吏哉當時服爲確議巡按山西巡視皇城釐奸剔弊忘者  
以危辭撼之不爲沮也崇禎初陞太僕寺少卿掌河南道事初  
耿如杞以不拜魏瑄祠下獄伸上白其寃卽獲昭雪任陽城時  
邑人爲立生祠後又入名宦祠所著有柱史草費麓漫吟

王孟震字筠蒼淄川人萬歷乙未進士觀政都察院丁內艱服闋  
謁選授行人復丁外艱丁未起補原職擢浙江道監察御史時  
福藩未之國母貴妃擅寵光廟孤立兩上國本當重疏又叅巨

濟南府志

卷五十一

人物六  
明 淄川

三

璫南宗順諸不法狀時神宗靜攝久諸台諫疏多置不問至是  
特用孟震言廷杖閹發充南京淨軍權貴胥爲斂手爭相戒勿  
犯髻王蓋孟震美且鬚云光廟在東宮嘉其忠直不阿疏名緘  
周易中每一檢閱輒嘆爲真御史庚戌巡按遼東轉冀益道叅  
議河東道副使丁巳京察降河南布政司理問陞工部主事員  
外郎中光祿寺丞尙實司卿通政使司左通政魏瑄方擅權用  
事屢使人示意拒弗通阿璫者遂誣奏其黨附異類予杖謫戍  
雲南崇禎元年首劾元愍以次昭雪斥逐諸臣乃復原官嗣是  
臺臣交薦屢奉旨起用而孟震以老病力辭卒年七十四孟  
震爲人爽豁伉厲不能容人之過以故多爲細人所中在西臺  
席未暇煖輒以抗直罷及再起謫籍一歲數遷朝野拭目又以

忤璫削奪未竟其用時論惜之

戴誠字守一淄川人由鄉貢授監察御史按浙江先是浙之豪右陳珪爲不法吏莫能制誠至卽杖殺之宣德初勘河南親藩及湖廣楚王事稱旨陞山西僉事有治效改授貴州時洞蠻作亂誠與叅將郭英討平之尋陞叅議治河有功後以老疾致仕詔晉爵一級

仇相字君佐淄川人以貢生卒業太學宏治間授饒陽令剛方嚴毅人不敢干以私饒陽地汙滹沱鴨河當其南西接塘沙二河三岔口崩決不常壞民田廬相指授方畧濬淤築障環之以柳丁丑饒陽大饑發粟賑貸所活萬餘人相出遇李姓數人裸體丐於市下車泣曰相之不職至是哉捐俸易布衣之死無以葬

濟南府志

卷五十

人物六

五

者勸民具棺殮之九年考績之京師百姓千餘集闕下願復借相一年旣考稱惇縣令饒陽之民立石寄思焉惇之遠鄉頑民不納稅者往吏以卒呼之稍急至持梃逐卒相單騎至其里喻以禍福寬其期以致之數歲逋負月餘而集雲中之變惇實當其衝相儲餉時芻蕘卒爲重鎮居惇踰年求歸不得請未幾大獄起言官劾相不時檢察逮繫錦衣獄事白獲釋焉又歲餘致仕歸囊中惟琴書而已

畢木字子近號舜石淄川人讀書多妙解暑時偕王秋澄從張松石遊稱爲二俊補增生再困棘闈年甫三旬遂棄青衿學使者給冠帶命爲儒官事父母務得歡心及歿儀節悉倣家禮立祠肖像如事生儀歲時朔望率子姪瞻拜立責善簿朔望分別登

記其序畧曰父子之閒不責善子與氏蓋激於父之愼諫子之非類者言之責善固至情之不容已者也中才之養幾諫之事亦何莫非善用其責善者况家庭隱隱疎者不肯言賤者不敢言至父若子而猶以責善爲解則過何由聞而善何由遷哉識者服爲確論有子八人二登甲一登科一明經一食餼餘青衿皆莫不痛自砥礪居爲良士出爲名臣中遭家難雁行爲讐所整毅然禦侮不憚跋涉千里拯出於厄者三人絕爲立繼者一人子自嚴成進士戒無矯無侈爲刑官戒無黠染無訪察自矢以不居閒不放債不攻煤并三事守之終身里人貸粟值歲歉焚券可數百緡晚號黃髮翁嘗治小圃顏其亭曰投豆且系聯曰簡點身心投豆亭中無墨子怡愉情性護花籬畔賞黃英工

濟南府志

卷五十

人物六  
明 淄川

五

真草書詩文通真陶謝著有黃髮翁集行於世

畢自嚴字景曾號白陽木之子萬歷戊子進士除松江推官有才幹徵授刑部主事歷工部員外郎中遷淮徐道參議內艱闋分守冀寧改河東副使引疾去起洮岷兵備參政以按察使徙治榆林西路進右布政使泰昌時召爲太僕卿天啟元年四月遼陽覆廷議設天津巡撫專飭海防改自嚴右僉都御史以往置水軍繕戰艦備戎器及能廷弼建三方布置策天津居其一增設鎮海諸營用戚繼光遺法水軍先習陸戰軍由是可用魏忠賢令錦衣千戶劉僑逮天津廢將自嚴以無駕帖疏論之報聞四方所募兵日逃亡用自嚴言攝其親屬補伍兵部主事來斯行有武畧自嚴請爲監軍山東白蓮妖賊起令斯行率五千人

往功多初萬歷四十六年遼左用兵議行登萊海運明年二月特設戶部侍郎一人兼右僉都御史出督遼餉語詳李長庚傳及是長庚遷乃命自嚴代敘前平賊功進右都御史兼戶部左侍郎時議省天津巡撫令督餉侍郎兼領其事卽以委自嚴又議討朝鮮自嚴言不可遽討當俟請貢輸誠東征効力徐許其封耳京師地震因言內批宜慎恩澤宜節人才宜惜內探宜罷語甚切直自嚴在事數年綜核撙節公私賴之五年以右都御史掌南京都察院明年正月就改戶部尚書忠賢議鬻南太僕牧馬草場助殿工自嚴持不可遂引疾歸崇禎元年召拜戶部尚書自嚴以度支大絀請覈通賦督屯田嚴考成汰冗卒停薊密昌永四鎮新增鹽菜銀二十二萬俱報可二年三月疏言

濟南府志

卷五十一

人物六  
明 淄川

美

諸邊年例自遼餉外爲銀三百二十七萬八千有奇今薊密諸鎮節省二十三萬尙應二百九十四萬八千統計京邊歲入之數田賦百六十九萬二千鹽課百一十萬三千關稅十六萬一千雜稅十萬三千事例約二十萬凡三百二十六萬五千有奇而漕貢相沿所入不滿二百萬卽盡充邊餉尙無贏餘乃京支雜項八十四萬遼東提塘三十餘萬薊遼撫賞十四萬遼東舊餉改新餉二十萬出浮於入已一百十三萬六千况內供召買宣大撫賞及一切不時之需又有出常額外者乞敕下廷臣各陳所見於是廷臣爭效計畫自嚴擇其可者先列上十二事曰增鹽引議鼓鑄括雜稅覈隱田稅寺產核牙行停修倉廩止畫公署南馬協濟學文鋪稅京運撥兌板木折價已復列上十二

事曰增關稅捐公費鬻生祠酌市稅汰冗役核虛冒加抵贖班軍折銀吏胥納班河濱灘蕩京東水田殿工冠帶帝悉允行詔輯賦役全書自嚴言全書之作自行一條輒始距今已四十五年有一事而此多彼少者其弊爲混派有司聽奸吏暗灑瓜分其弊爲花派當大爲申飭因條八式以獻帝卽命頒之天下給事中汪始亨極論盜屯損餉之弊自嚴言相沿已久難於覈實請無論軍種民種一照民田起科帝是其議先是忠賢亂政邊餉多缺自嚴給發如期又疏言最耗財者無如客餉諸鎮年例合三百二十七萬而客餉居三之一宜大裁省其次則有撫賞召買修築諸費皆不可不節帝褒納之其冬京師被兵帝憂勞國事旨中夜數發自嚴奏各無滯不敢安寢頭目臃腫事幸無

濟南府志

卷五十

人物六  
明 淄川

七

乏明年夏以六罪自劾乞罷優旨慰留先以考滿加太子少保敘遵永克復功再進太子太保兵部尙書梁廷棟請增天下田賦自嚴不能止於是舊增五百二十萬之外更增百六十五萬有奇天下益耗矣己陳時務十事意主利民帝悉採納又以兵餉日增屢請清覈而兵部及督撫率爲寢閣復乞汰內地無用之兵帝卽令嚴飭然不能盡行也御史余應桂劾自嚴殿試讀卷首薦陳子泰乃輔臣周延儒姻婭自嚴引疾乞休疏四上不允時有詔縣令將行取者戶部先覈其錢穀華亭知縣鄭友元己入爲御史先任青浦漣金花銀二千九百帝以詰戶部自嚴言友元已輸十之七貯太倉帝令主庫者核實無有帝怒責自嚴自嚴飾詞辨帝益怒遂下自嚴獄遣使逮友元御史李若讜

疏救不納踰月給事中吳甘來復抗疏論救帝乃釋之八年五月敘四川平賊功復官致仕又三年卒賜卹如制

畢白肅字範九號冲陽自嚴弟萬歷癸卯以春秋舉于鄉丙辰成進士初授定興令邑當孔道凡借差枉道橫索逾例者概拒之置于法以是過者多避道去驛困爲甦凡舊例之不便者削牘申請以雇募代僉報以官輸代吏解改墩夫爲健丁改坐舖爲巡路邑人永戴焉經過援兵且糗設儲皆憚其威無敢橫者一日奉上檄買車牛騾頭運關隘餉百姓爭輸如數付之直不受乃白諸臺建尙義坊以旌之秩滿內徵士民攀轅不獲于城東建生祠時兄自嚴以少司農督餉津門不與考選擢主客郎提督會同館有核賞段抑貢使之疏請堂代題悉荷允行旣持節

濟南府志

卷五十

人物六  
明 淄川

三

封肅藩復命以邊陲陞岳前道叅議單車就道毅然任事至則秋雨連綿五城俱圯竭蹶版築不兩月雉堞屹然晉憲副時遣三內監出鎮關隘氣餒薰灼抗不爲屈丁卯以益錦功加太僕寺少卿戊辰陞都察院右僉都御史巡撫關隘上方畧九事大稱上旨經營布置思爲封疆久遠之計築城儲需市馬繕塞而司計者以雲中告警乃急西而緩東抗疏八九上請馬價器械撫賞月餉無一應者缺餉至四五月川湖一營素輕躁乃脫巾起蓋七月二十五日事也自肅素性旣剛不勝憤激叱亂卒無一異懷語卒搜臥內囊空如洗始大悔悟四日乃就伍自肅恚憤不食猶口占上疏移鎮中右後十三日而歿兄自嚴三疏申理陳兵變因缺餉乞納職贖罪求復原官不得請乃輯撫遼疏

草爲一集曰撫遼茶語以志苦云

畢自實字良甫號旭陽自嚴弟萬歷乙卯科舉人授吳橋知縣明徵收裁驛傳節省七千餘金代完前任欠解陞南兵馬司南戶部廣東司主事筦鹽課積弊以清先是調登兵赴遼左不欲往及吳橋諫而南至是追論罷歸弗辯也刻有拱玉園集選石齋詩志隱集

張敬字松石淄川人天性澹泊稽古嗜學尤精周禮左氏傳嘉靖戊午舉於鄉丁丑捷南宮授禮部主事故事禮曹有教習都尉一人世宗懲戚里驕貴特簡充任諸尉憚其嚴重稟律度惟謹丁外艱歸石田茅屋不異寒畯二三生徒日夕講習寒暑不輟瓠葉匏樽飯脫粟而已如王考功教畢贈公木皆及門士也生

濟南府志

卷五十一

人物六  
明 淄川

五

平不問家人生產及卒貧不能葬所著有張儀部集行于世子至發中發

張至發字聖鶴號憲松敬之子少孤從泰安李少崖遊闡明理學後爲刻其語錄曰還樸心聲云萬歷丁酉舉鄉試辛丑登第授玉田令邑故饒陂池每霖雨山濤激成巨浸至發相地築隄至今蘄人猶曰張公隄歲歉助賑旌閭復役益以官帑躬親散給全活數萬戶癘疫大作手製藥餌隨地給予活人無算歲荒多盜立傳箭法一聞枹鼓不移晷而達縣捕之立獲調遵化縣均徭役革火耗下令曰收銀至臺而止納錢者聽支兵餉軍民兩利焉里豪某黠而忍與其讐訟不勝陰斃已子噬之歷六七讞皆坐讐者至發廉得其狀一訊而服邑爲蘄撫駐節地三屯營

鍾密雲督撫倚角建牙相望供億繁多游刃有餘報政授監察御史時神宗倦勤葉向高以獨相輟機務出典癸丑試至發上疏曰獨相非祖制也請卽允枚卜以充揆路巡視西城清軍匠占役之弊巡按河南時福藩之國使者相望至發赴任以禮制裁諸大璫沿途需索爲蘇郡邑輸納朝賀之使例有導行費亦以法抑之王素耳其名深器之不以爲簡也嘗駐節某邑使院貯金匱二左右曰例也置弗顧所薦以舊例謝者卽之巨憲苗之碩以睚眦殺平民持上官短長捏款送訪至發令刑官攝之甫下吏請託至未敢函卽杖殺之熊朝會者王妃弟也怙勢長惡捕之匿王府百計爲請至發曰職爲朝廷守三尺耳卒置於法時礦盜哨聚數千人召其渠魁曉以利害令各復業其患悉

濟南府志

卷五十

人物六  
明 淄川

三

平任內贖鍰一無所取宗祿不給爲置義田遷婚等禮如期題請宗人感焉又爲宋邵程兩先生請奉祀萬歷四十二年以水雹請捐稅賑濟四十三年以饑請留正項備賑皆報聞其賑饑也設粥廠男女異處富民有買子女者至來春捐其直而歸之全活多者賞賚有差潞王以幣來已卽之轉念曰吾且以成賢王之名于是盡易錢給貧民時衛輝饑尤甚括官私錢施襖袴等數萬具天啟元年陞大理寺左丞以親老子獨祈終養王申起順天府丞癸酉陞光祿寺卿初行藉田禮洽慶成宴無不恪整請修倉廩自行估計吏不得欺節省大農錢巨萬八年陞刑部右侍郎召至中左門看本擬稟旋陞禮部左侍郎兼東閣大學士外官人相自此始旣執政戒臧獲曰毋益負屈讓入務使

吾家若無官九年進禮部尙書時國計日絀千戶韓伯孝乞開礦鼓鑄上疏諫止會溫體仁去位遂爲首輔以考選事與詞臣議不合滇撫王世德以清介不諧於時言路誣以通賄至發力辯其誣旋見時事多舛以病請告疏累上得歸十二年以捐資倡建淄城遣官賜勅獎諭十一月以徽號告成勅行人存問賜文綺白金上尊羊果等物以淄川解邊餉累弊難堪從田間具奏民窮勢必走險安民莫先察吏因言監司宜久任錢糧宜循舊典總歸藩司彙解詞甚剴切奉旨議行壬午七月終於正寢遺命勿請卹勿立家廟勿用墓誌撫臣奏聞贈少保廕子祭葬如禮著有閣彙三十卷巡方約畧及檄畧等書

張中發字智鵠號仰松敬之子至發兄也幼食貧力學補邑增廣

濟南府志

卷五十

人物六  
明 淄川

三

生試輒前茅從李少崖學深加器重及弟至發領鄉薦乃專心理學姚江龍溪語錄皆著手評後弟貴至首輔而中發緼袍茅屋不改儒業凡弟所寄奉之物另置一室封識宛然每酒酣濡墨奮腕疾書字可方丈得之者珍逾什襲及歿人稱之曰石隱所著有回首窩稿藏於家

張泰來字伯開至發子萬歷乙卯舉人遵父命捐修石城又以節省銀修葺學宮教諸弟子嚴而有法凡親知貧不能葬者輒周恤之饑年減價糶穀收養棄兒掩骼及遭父喪時值明季寇亂多方區畫卒能祭葬如禮

高昇字殷宗號仰鬢淄川北月莊人篤實慈惠勤稼穡好施予少失父兄遺孤弟二鼎閔兄子一汝科皆幼昇曲加撫愛長爲婚

娶且分已產給之剛介不阿常而折人過不少假有構訟者輒置杯酒爲解有急必周之歿者棺暴露者葬數十年無倦色嘉靖四十五年邑大饑出藏粟召鄉閭日食其家者百餘人昇務農起家而督子孫以學萬歷四年見仲孫舉薦於鄉六年卒年七十三子汝登

高汝登字自卑號柳溪尋之子受學于舅氏王崇義淹貫經史以病眩輟業事親以孝聞居喪喪墨削戚禮兼盡每旦必虔謁神主如事生儀聞人一善如獲瑤寶里有雀鼠之爭得其片言爲解自奉儉衣三泔食二簋旣貴不改子所奉袍笏筥而不御曰吾樂吾韋布人以急告靡不應車馬器物與人共之嘗發地得錢數千緡曰無故之獲不可壅也召諸父老悉分給之有田四千

濟南府志

卷五十

人物六  
明 濬川

三

畝盡佐施與而家鮮僭儲修學宮獨繕一楹以爲倡創建五里橋再易靈虹橋欄以施濟著齊魯聞而口不言惠爲鄉里矜式者六十年萬歷三十三年卒年八十一先三日諸子侍側猶諄諄以畏天爲訓故日之所爲夜必焚香告天云歿後邑人建祠立像祀之提督學道檄下祀之鄉賢子舉

高舉字鵬程號東溟汝登子母楊氏夢月入懷生舉十歲能文于言立就補邑諸生萬歷四年舉於鄉八年成進士除直隸完縣知縣調湖廣蒲圻縣兩地皆有惠政祠祀之十四年徵拜河南道監察御史言事侃直璫張德殿斃人於掖門眾莫敢問上疏論其罪抵璫於法出按真順廣大擊貪墨吏不以奧援故有所縱舍河決淮泗害漕且憂及陵寢舉方按廬鳳淮揚謂宜疏周

家橋以洩水勢條上疏濬築塞事宜悉中窾會當事者如其策遂告成功又疏陳宜開泃河以濟運初格於衆論後以運道水涸乃用其議漕運遂爲永利曠役興中使四出鑿及天壽山時舉按順永保河上疏力爭此靈秀所鍾國家千萬年基業奈何輕行挖掘洩王氣而傷陵脈疏留中而橫璫亦爲氣阻當光宗未冊立出講久稽言者相繼蒙譴甚至予杖舉抗疏言皇長子一身宗社所繫不冊立何以安人心不出講何以開聖智詞甚切直神宗遂允行出講提督北直隸學政力卻請託獎拔多寒士遷大理寺右丞丁父憂起復原官遷大理寺右少卿三十七年以右僉都御史巡撫浙江下車詢民瘼力爲興除豪右巨猾皆鋤去之清冒濫嚴角試歲節軍儲數百萬緡又嚴防居民通

濟南府志

卷五十

人物六  
明 淄川

三

夷之法三十九年倭寇温州遣兵擊盡獲之無片帆歸者終其任無敢復至餘杭縣南湖開於漢爲杭民大利日久湮廢雨潦乘之爲災捐贖緩數千金濬之期年復其舊浙人立碑頌之上賜金旌焉海上遊徼得夷舟以爲盜也俘而獻功訊之則安南漁人爲颶風漂至者疏請給資遣歸晉俸一級撫浙將六年具疏乞休溫旨慰留不可乃予暫告旣歸出俸置產數區分諸昆弟歲歉賑宗族親舊有差卹庠士百金編氓千金家居十年端坐一室流覽典籍蕭然如寒士開會松蔭閣招邑文士課以藝手爲之程經指授者多成名去臨歿出笥金分諸友人曰以此爲老年資餘以與兄弟子姓曰朝廷恩勿忘也天啟四年卒年七十三初熹宗立修光宗羽翼功廷臣咸薦舉謂力扶綱常有

功國本因魏璫擅權國事日非遂不出時門戶之說方盛各有黨與舉畧不濡跡其間著有西臺疏草撫浙疏草貞篋編詩彙集陶世名言循良模範夜光集等書行於世崇祀鄉賢子六所翻所蘊最知名

高譽字鵬程號南溟舉之弟以監生肄業太學屢試順天萬歷三十年僅副正榜輝精著述有目錄三十冊承家學事以合天理遵王法爲矩矱兄舉宦遊南北家政悉付之譽恪守前規俾無內顧者四十年嘗從泰安李少崖遊講明濂洛之學吳郡馮時可謂爲富才藻名列文苑而一本經術當事者表其閭曰真儒生平著作多散佚僅存與兄舉唱和薰篋編及同選名言文蒼行於世崇禎十六年卒孫珏以進士任御史有聲

濟南府志

卷五十

人物六  
明 淄川

高

高所蘊字爾施號宏室舉之子兄弟六人友愛甚至下帷攻苦補府學廩生萬歷四十年秋闈本第三抑置副卷父卒遂不應試習靜於山中之磨莊慈儉忍讓過於寒士好施而不德積借券三四千金後悉焚之教子嚴而有法不拂人情不愧衾影以畏天爲心以濟人爲事崇禎六年卒年四十九子瑋珩孫之駒繼成進士

王納言字允忠淄川人正德丁丑進士授戶部主事管河西務鈔關尋奉勅南直隸監兌歷陞本部郎中總督大同糧儲時大同兵不靖人皆危之納言撫馭得宜軍民咸服己丑陞陝西布政司左叅議平涼故多宗室難治納言至以時給其祿糧察其暴橫之尤者以法繩其左右民以獲安總制唐漁石雅重之時胡

店有劇盜嗜衆據險郡縣莫能制納言移檄徵兵討平之事聞  
尋陸按察司副使繼除河南副使世宗南幸至衛輝府回祿之  
變一時撫按藩臬皆懼重咎而納言獨無虞己亥陞陝西布政  
司右叅政謝職歸年六十餘以疾終

王啟睿字玉琴一字玉烟納言之曾孫也癖情翰墨以詩文自豪  
嘔心鏤肝抽練而出以詩爲性命居般水上游闢榛鑿厓爲龍  
門園有十四景詩又南走吳楚北遊帝都當世知名士必輿定  
交贈言申縞紵焉古樂府以數百計近體以數千計花木草蟲  
上及國是形之謠誦從友于松于檣探竒弔古徧搜名勝可喜  
可愕可法可歌之事一寄之于詩閒刻一二特片羽耳嘗作般  
宮古柏律詩上下平三十首詩成咯血幾殆其苦心如此有水

濟南府志

卷五十

人物六  
明 淄川

三

絃樓集

韓思武字守正淄川人早歲強學遊庠有聲性恬曠不事生產有  
田千畝每歲入輒以周人急尤敦厚不喜談人過時邑博杜君  
爲閭右所持挺身爲白其冤師儒義之以明經卒業太學或勸  
之仕曰吾少孤不忍離吾母堅不仕及病革撫諸子泣曰善事  
太母太母慰九泉慰矣卒祀鄉賢

韓道揚字伯名號迪菴淄川人事父以孝聞父歿事母色養備至  
兄弟八人長俱揚不事生產次卽道揚又次爲友揚廷揚皆成  
立矣而岳揚公揚卿揚朝揚皆幼道揚議以長兄各撫弱弟一  
人分典家政而已總持其閒於是資產益饒乃延師課弟治舉  
子業析產取其饒者旣而合爨如初四十餘年家無閒言嘗以

勤儉爲訓日當其可之謂儉不失其時之謂勤非徒節嗇勞苦也從弟大中丞取善用不數卽指萬斛授之後子孫各以次貴皆一門孝友之所貽云

韓卿揚字振庵道揚弟爲諸生試屢冠軍以歲貢授興化訓導時姪浚掌河南道事未嘗一字言及興化令李懋芳入覲問之令茫然陞文水知縣不赴五舉鄉飲大賓孫曾皆成進士

宋雲霄字奎光號霽寰淄川人萬歷丁酉舉人授延慶知州崇學校興水利廉以自持正以率物三年考績陞保定府同知延民詣闕保留准以同知銜仍留任管延慶州事四年丁憂回籍州民追隨數千里抵淄旬餘方泣歸服闋赴部候補州民復呼籲叩請再求往時三院會題准令實授同知仍管州事兼理宣府

濟南府志

卷五十

人物六  
明 淄川

美

糧儲遂于州衙建郡庫供事胥役一視郡例凡三任前後十一年士民立碑建祠刊實政錄一書改慶陽同知踰年陞雲南澂江知府興教化正風俗一視延慶陞臨安分守道激民遮道挽留亦視延慶時臨安城爲寇據以順逆諭之聞風投戈六年齋捧入京積勞盡瘁以致仕告未允復以病告始假回籍調理優游林下顏其室曰澹然居又十餘年乃卒收延慶時自家攜紡車爲式令老嫗歷民家教之紡績織布爲衣此事膾炙人口云王載揚字汝賓號見山淄川人嘉靖辛酉中省試辛卯謁天官授知海州司牧水濱抵任見一切刻敝不厭意奮力洗刷之杜侵牟戒吞噬立倉社修學宮巨細方就理而島夷報警海當其出沒地民素荷耒耜不諳兵律乍聞警惶駭無措乃贖民間地數

頃闢教場立演武廳募民兵二千分五團營立五假將軍號以統之喻以步伐嫻以止齊習以威南塘鴛鴦陣法而海人始恃以無恐適歲又大祲當事者檄崇城載揚念此枵腹之衆而徵之役是速之斃無已池可浚也池深則城自高因海潮導水灌之屹然金湯矣又海多漁舟歲權銀八百餘兩陋例也悉爲卻之他無名征徭亦皆申罷淮揚吏治遂稱第一而南京章御史含沙及之卽拂衣歸臥林泉十餘載年七十三歲卒

譚誠言號心齋淄川人萬歷乙卯舉人曹縣太原兩縣教諭知肥鄉陞安慶府通判署太湖縣郵驛緩征庭無冤獄太湖苦無城草竊間發旋就擒滅又建陽石橋不煩官帑橫經講約有聞而泣下者湖民勒石紀之致政歸卒年九十三

濟南府志

卷五

人物六  
明 淄川

三

韓澹淄川歲貢河南許州同知崇禎辛巳冬流寇數萬圍許時署州事嬰城擊賊賊少卻已而悉衆環攻城陷不屈死時方多事卹典不及輿論惜焉

袁文衡字宗儒淄川人天性樸厚制行正直家無多積尤樂施予接賢禮士淳如也嘉靖初年設義會畜錢穀置義田五百餘畝鄉邑宅各一凡里甲差徭俱辦于此又視年豐歉爲賑給婚喪不給者資助之一身總其勞因建義學延師督率族子弟使知禮節宅左畫地三畝植樹立碣設義冢聽死徙無地者葬焉嘉靖四十年巡撫山東朱公衡檄縣尹孫公孝旌之曰尙義之門四十二年邑令許公爲作袁氏義學記刊之石

李思豫字敬一淄川人性方嚴狷急與人怨而有恩家貧與兄同

居始終無間猶子婚嫁皆身任之父疾病私爲嘗藥色嘗父怪而問之對曰兒聞養苦者生故喜耳已而果愈後家稍給人有所假貸無不應卽負亦不較有董姓者老而無歸收養終身王官兩犯罪兩生之無德色嘗遠出囑其戚守舍沽篋取二十餘金埋之爲役夫所發出他金賞之而以原金與其戚

王政淄川人事親悉色養父先亡哀毀如禮暨母亡齋素三年不入私室服闋仍朝夕持香紙奠墓前每節序忌辰潔豆以薦未嘗不泣下也雖雨雪不廢石司旌其門

蒲生汶淄川人少孤未嘗違母命讀書刻苦備歷艱難及登第後任玉田知縣聞母病棄官歸侍湯藥母亡痛哭幾絕素羸吐血數斗而卒竟無嗣士論惜之

濟南府志

卷五十

人物六  
明 淄川

五

張文慶淄川人正德中從寧泉討流賊所向有功以一馬深入賊營殺數十人賊中善射者中文慶左目文慶下馬猶手刃數人遂被執賊愛其才勇欲降之不屈而死

張信字允元淄川人領鄉薦入國學祭酒令諸生講經義信獨稱最揭不彙倫堂由是名動京師目爲山東小夫子後謁選因貌陋授浮山簿抵任不三月乞歸家居益肆力讀書爲監司所重延至藩省授諸子業漢府聞其名聘之尊以師禮信見其動踰矩制與之絕後數年卒

高鴻儒字岐東淄川人博學刻勵隱居教授里有窘婚喪嘆嗟獨者竭力賙之常以放生爲樂一日友人饋生鱸七夜夢黃冠七人乞命及寤放之中流管早行見煥山山市樓臺雉堞若有與

馬往來其間晚年陶然自樂子捷舉進士

唐恩仁淄川人重詩書家貧好施里人因債爭代給之見無衣履者解與之所乘馬逸不問見者曰此唐佛之馬也爲收羈之暑月設漿通衢飲渴者蹊徑有不平爲平治冬治暖屋宿無衣者臘日煮粥飯饑嗣後臘日施粥以爲家訓傳再世子孫多入膠庠至曾孫檢討夢賚卽以臘日生鄉閭或以爲徵云子士卿

唐曰俞字彥開思仁之孫士卿之子也庠生讀書取大義務規於倫教家學以止至善爲宗每一編危坐庭戶閤然熒熒內夜不爲疲也教人以忠恕爲本卽蒼頭牧豎不厭諄復家不逐什一之利口不爲燕饗之談雖處閭室如對大庭獨行君子也李兄爲暴吏所整嘗衆中一言脫其奇禍僕輩或急愬輒不問儉歲呼行乞者而飼之歲稔聽之去其行誼侃直類如此年七十四卒子夢賚

濟南府志

卷五十一

人物六  
明 淄川

完

王我聘字冷岑淄川人萬歷中補弟子員冠軍學古文詞隱居三台山下因自號三台逸客嘗云人生清福獨逸民耳于是春風杖履夏日林泉霜葉溪頭雪橋驢背一以嘯咏收之然脫稿隨手散去今所存問姬偶然撚鬚諸吟及蛩音秋嘯三山樵語頗稱逸調喜種菊其嘆菊一詞尤爲蕭散又好竹因名翠雨爲明季士寇起親友助鑑買瑩曰穴在心頭不在山乃修三台山殿宇壯麗後避亂者依此全活萬人胞弟我錫爲昌黎令卒于官迎柩歸葬間關數千里因失繳勘合力爲周旋篤摯如此可見其爲人矣

胡銳淄川人雅宜恬曠築圃豐水之陽長溪靜碧遠墅凝青迥深  
一水屋背萬竿日徙倚其中蕭然世外尤精岐黃術藥白自隨  
以沈疴造者輒一匕起之四十餘稔跡不至籬外九十八齡無  
疾而逝

張思仁淄川人天性醇篤耕鑿樂真四世同居家庭雍睦人望其  
廬爲葛天之境

趙國興淄川人性倣儻有義氣好施予喜建橋梁行人德之

張冠卿淄川人樸野不慝博聞而辭給潛身山塢中清行自勵尤  
善金元詞曲每一調出輒溢淄人之口性溫溫與人善年七十  
餘而終

劉維歷號川陽淄川諸生居傅家莊莊爲通衢晨起於衢旁廁中

濟南府志

卷五十

人物六  
明 淄川

罕

得遣金懷之坐候至次日有人倉皇入廁卽出仰天長嘆詰之  
曰家甚窘奔走貿易小有所積竟失去詢金數皆符卽出授之  
其人以半酬之不受里人義之爲立石書劉川陽還金處萬歷  
己亥事也

明 長山

王璉長山人器局沈雄學問淵博少師事宋濂中洪武甲子省元  
召見試詩授史館編修入文華堂肄業尋攝御史按河南回奏  
稱旨上悅謂近臣曰文華堂諸生如王璉輩皆將相才也祀鄉  
賢

許譽長山人洪武丁巳年以貢除儀封知縣秩滿遷鄭州知州儀  
封民詣闕請留詔賜襲衣鈔錠者三後賜金帶尋擢衡州知府

聶震長山人登洪武乙丑進士除戶部員外郎爲政多持大體端謹有守凡諸司事不決者悉爲裁定終戶部左侍郎

徐誼長山人成化壬寅年以貢授猗氏知縣邑苦旱誼禱于終南山雨大降有村婦採薪爲狼嚙死誼禱于城隍神狼忽自入城卽令其夫自殺之治行稱最擢靈州知州開渠利民招軍六百人以備邊警上嘉其功錄其子大貞爲正千戶

徐以貞字本良長山人美姿容性穎異登成化戊戌進士除宣晉知縣發奸摘伏邑內肅然獄有經年未決者立爲剖決民大服尋丁內艱服闋奏乞再授宣晉以自効上可其請至則政事益勵而邑以大治擢福建道御史奏事不稱旨出知松溪縣遷霸州知州擢工部郎中監修河南藩府劾中官周永冒費物料改

濟南府志

卷五十一

人物六  
明長山

聖

知懷慶府累遷至右僉都御史巡撫延綏督師斬寇甚多勅旨有曰近年以來未見此捷特賜金幣以旌中官劉瑾罷歸尋以西寇復起以貞贊畫軍事巡撫順天瑾復中傷之謫鳳陽同知七年乞骸骨歸里以原官都御史致仕所著有文集詩詞行于世崇禎間祀鄉賢祠

李士翱字如翰號長白長山人嘉靖癸未進士授潛山知縣改娶

源知縣政最擢山西道御史巡兩淮鹽課奏發隱匿羨餘銀八

十萬上嘉之特賜金幣再按蘇松出知荊州府舊例沙市稅錢

皆官自沒入翱請以補宗室祿米之費築公安監利長隄百里

以禦水患世宗幸承天部卽改翱知之扈從餼給取辦裕如累

遷右副都御史巡撫宣夏三年無烽火之警入爲少司徒提督

西苑屢產嘉禾歷陞大司徒適寇興需餉調度有方以忤權相嚴嵩落職家居十載杜門著書戒子弟勿擾公府後穆宗登基復翺原官致仕仍贈資善大夫太子少保諡祭全葬著有長白集行于世祀鄉賢子廷茂沂州學訓導

李邦演字元派號繩白士翺孫廷茂長子也未冠補諸生食餼萬歷丙子舉於鄉謁選授鳳陽府壽州知州壽瀕河河淮每交梗虞薄鳳陵邦演設法濬築賞罰率作竣役蒙疏優敘且賜金幣勞之歲大旱虔禱輒應久雨泚水爲災城幾沒復虔禱獲無恙學宮圯捐俸鼎新之建石梁入公山下民利涉課士首拔劉君繼吳已未登甲科嘗語人曰李師賢牧也開水田熾惡黨清徭役調收受之法種種興革未易僕數以不善媚人卒蒙妻非旣濟南府志

卷五十

人物六  
明長山

三

致政日招二三知己露葵脫粟以基酒相娛暇日搜長白先生遺稿付梨棗卒年六十九

曲遷喬號帶溪長山人萬歷丁丑進士除沁水知縣均徭賦清冤獄擒劇盜劉瀛等御史臺交章薦之拜工科給事中歷戶禮刑三科前後二十餘疏上皆嘉納見之施行其奏條編事宜民尤稱便會上以調鷹破面不視朝喬輒奏請戒佚遊以保聖躬疏入不報上密逐鷹豎尋出叅淮揚藩政時河水爲患分黃導淮河工底績復獲海寇陳忠等晉按察使遷廣西右布政使平苗亂撫土司改左布政使擢順天府尹貂璫勦滅一切按治以法畿輔肅然會安南國納貢以喬前調兵食有功晉通政使司通政使正色立朝出納惟允尋乞骸骨歸無疾卒喬守清而才雄

爲粵藩時諸道缺以一身擲之案無留滯府庫羨金買穀備賑  
京兆堂災張片葦視事畧不爲意歸田後讀書務耕將卒猶課  
子作文自撰銘曰姓雖曲心則直事親竭力事君盡職一夫一  
婦始終靡忒有光裕堂文集祀鄉賢

劉一相字惟衡號頊陽長山人萬歷丁丑進士授高平知縣豪子  
弟恣橫里中前令不能詰相一切按治以法縣以大服兩校鄉  
試省元皆出其門擢南京吏科給事中力排張居正黨人封事  
十數上左遷陝西按察司僉事分巡隴西再謫茂山衛知事稍  
遷稷山知縣多惠政擢南京兵部車駕司主事前駕司倪涑立  
雇役法人皆稱便貂璫貪弁欲更之相堅持不可一時有倪翁  
劉父之歌會播酋反兵部侍郎邢玠奉詔督師疏請相隨軍贊

濟南府志

卷五

人物六  
明長山

聖

晝相力主勘議身入賊巢諭以禍福賊感悟自擒首惡以獻播  
酋平遷刑部員外郎轉郎中久之復叛詔相爲四川布政司叅  
議備兵敘瀘捐金募兵百萬自合江進討屢著戰功再敘播功  
賜金改貴陽叅議移守商洛晉陝西按察司副使清理軍屯以  
母老致仕歸相爲政勤敏在隴右時凡有不便輒裁去之秦人  
賴焉在稷山人爲立祠以祀在駕部理船政著船政要覽一書  
惟以剛直不容於時有燕喜堂文集子鴻訓

劉鴻訓字默承號青岳一相子萬歷四十一年登第由庶吉士授  
編修神光二宗相繼崩頒詔朝鮮甫入境遼陽陷朝鮮爲造二  
洋船從海道還沿途收難民船重而壞跳淺沙入小舟飄泊三  
日夜僅得達登州報命遭母喪服闋進石中允轉左諭德父喪

歸天啟六年冬起少詹事忤魏忠賢斥爲民莊烈帝卽位拜禮部尙書兼東閣大學士叅預機務遣行人召之三辭不允崇禎元年四月還朝當是時忠賢雖敗其黨猶盛言路新進者羣起抨擊之諸執政嘗與忠賢共事不敢顯爲別白鴻訓至毅然主持斥楊維垣李恒茂楊所修田景新孫之懈阮大鍼徐紹吉張訥李蕃賈繼春霍維華等人情大快而御史袁宏勛史堇高捷本由維垣輩進思合謀攻去鴻訓則黨人可安也宏勛乃言所修繼春維垣夾攻表裏之奸有功無罪而誅鋤自三臣始又詆鴻訓使朝鮮滿載貂參而歸錦衣僉事張道濬亦訐攻鴻訓鴻訓奏辯給事中顏繼祖言鴻訓先朝削奪朝鮮一役舟敗僅以身免乞諭鴻訓入直共籌安攘之策至宏勛之借題傾人道濬

濟南府志

卷五十一

人物六  
明長山

署

之出位亂政非重創未有已也帝是之給事中鄧英乃盡發宏勛賊私且言宏勛以千金贖維垣得御史帝怒落宏勛職候勘已而高捷上疏言鴻訓斥擊奸之維垣所修繼春大鍼而不納孫之懈流涕忠言謬主焚燬要典以便私黨孫慎行進用帝責以妄言停其俸史堇復佐捷攻之言路多不直兩人兩人遂罷去七月以四川賊平加鴻訓太子太保進文淵閣帝數召見廷臣鴻訓應對獨敏謂民困由吏失職請帝久任責成以尙書畢自嚴善治賦王在晉善治兵請帝加倚信帝初甚向之關門兵以缺餉鼓譟帝意責戶部而鴻訓請發帑三十萬示不測恩由是失帝指至九月而有改救書之事舊例督京營者不轄巡捕軍惠安伯張慶臻總督京營敕有兼轄捕營語提督鄭其心以

侵職論之命覈中書賄改之故下舍人田佳璧獄給事中李覺斯言藁具兵部送輔臣裁定乃令中書繕寫寫訖復審視進呈兵部及輔臣皆當問十月帝御便殿問閣臣皆謝不知帝怒令廷臣劾奏尙書自嚴等亦謝不知帝益怒給事中張鼎延御史王道直咸言慶臻行賄有跡不知誰主使御史劉玉言主使者鴻訓也慶臻曰改敕乃中書事臣實不預知且增轄補卒取利幾何乃行重賄帝叱之閱兵部揭有鴻訓批西司房語佳璧亦供受鴻訓指事遂不可解而侍郎張鳳翔詆之尤力閣臣李標錢龍錫言鴻訓不宜有此請更察訪帝曰事已大著何更訪爲促令擬旨標等逡巡未上禮部尙書何如寵爲鴻訓力辯帝意卒不可回乃擬旨鴻訓慶臻並革職候勘無何御史田時震劾

濟南府志

卷五十

人物六  
明長山

聖

鴻訓用田仰巡撫四川納賄二千金給事中閻可陞劾副都御史賈毓祥由賂鴻訓擢用鴻訓數被劾連章力辯因言都中神奸狄姓者詭誣慶臻千金致臣無辜受禍帝不聽下廷臣議罪明年正月吏部尙書王永光等言鴻訓慶臻罪無可辭而律有議貴條請寬貸兵部尙書王在晉職方郎中苗思順賊證未確難懸坐帝不許鴻訓謫戍代州在晉思順竝削籍慶臻以世臣停祿三年覺斯鼎延道直玉時震以直言增秩一級鴻訓居政府銳意任事帝有所不可退而曰王上畢竟是冲主帝聞深銜之欲寘之死賴諸大臣力救乃得稍寬七年五月卒戍所福王時復官著有四素山房集皇華集玉海纂圖學紀聞鈔諸書行

世子孔中孔和孔武

劉孔和字節之鴻訓仲子邑諸生少儻好談兵文章豪邁洞達  
詩尤奇恣崇禎閒流寇蠡起散財結客聚眾數千起兵長白山  
傳檄秀縣執禽偽令數人率眾抵淮駐軍黃河有同鄉某以東  
平伯開藩淮上憚其強陰圖之竟遇害年三十一所著日損堂  
詩集練要堂文集嗣孫大轂成進士官翰林院檢討

李春開字泰寰長山人萬歷癸未進士授揚州府推官條議鹺政  
八事奸猾斂迹一郡肅然課爲天下第一擢吏科給事遇事敢  
言以母老乞歸卒

安曦字元旭長山人萬歷丁未進士授大同知縣以祗候失御史  
意有勸其出金請罪者不聽卒爲所劾謫均州判官分校楚省  
壬子鄉試遷蘇州府推官丁艱服闋補鎮江府推官攝丹徒縣

濟南府志

卷五

人物六  
明長山

吳

裁抑水陸郵費攝常州府革織造局羨金歲省民金錢數萬擢  
工部主事督神廟陵工奏發冒破諸弊遷本部員外郎督惠王  
府工病卒曦敦孝友邑人賢之祀鄉賢爲政持大體不附權貴  
訊獄明允祀蘇州名宦

徐子肅字德寅長山人性至孝端方嚴潔不愧古人萬歷閒由廩  
貢任渠邱訓導愷悌慈和周給寒士一廩生菴而貧歲次當貢  
豪富欲奪之不爲動遷聊城教諭值歲祲條上救荒諸政民賴  
全活王生文教家徒四壁捐俸衣食之勉其力學後竟發解陞  
西安府教授聊人請祠名宦尋陞威海衛教授歸卒子日升  
徐日升字孟明子肅子自童子試至萬歷壬子科皆第一人除秦  
州知州有任姓者殺人借其戶以誣一士升力出之又豪黠張

姓者橫行里中前牧不能制升按治伏其罪擢戶部員外郎奉  
草場與火藥比隣恐罹火患請移他所未幾被火人服其先見  
遷郎中出爲通州道僉事有善政尋罷歸故例歲輸漕糧各里  
舉富民輦運每致破產請於郡令里民自運永著爲令天津運  
米尤爲民累上其事於臺司特疏奏免又有購馬入驛之累請  
於部歸入正賦其爲文削盡浮靡獨標理解與新城王康宇爲  
道義交尤工草隸與米萬鍾邢侗齊名年八十卒於家有卷石  
草堂文集祀鄉賢

王席正字子輿號參寰長山人生而慧補諸生爲人訥讐多義氣  
能急人嘗曰吾儕家室稍溫宜慕義而輕利古人不以鍾庾傷  
烈士之心非苟爲脫擲也任北城兵馬司副指揮時百吏廢弛

濟南府志

卷五十

人物六  
明長山

七

內豎戚畹輩玩弄司城于股掌席正獨抗執不阿一闈宦斃人  
杖下將鞠聽其寢以數千金請解峻謝之竟伏法司禮校尉某  
倚勢請託曾不一徇秋靈都城民舍壞捐俸補葺民尸祝之又  
侍御某授意追奪某玉帶堅不聽侍御怒坐以他故復唆豪璫  
凌之遂抽簪歸

孫登雲長山人性孝友領萬歷戊午鄉薦由日照諭陞武邑知縣  
裁冗役剔庫弊嚴禁包封代賠俵馬鞠獄允當編審公平忤上  
官致仕家無贏資而周急不怠歲禋時族人客戶存活甚衆

孫治國長山人天啟中由儒士任元城縣丞陞懷慶經歷恪守清  
規一塵不染委丈沙灘例獲千金固卻不受申詳飛沙殺禾之  
害准豁稅糧繼復委解餉草餘銀一千三百兩帶回存庫值歲

饑出銀賑饑生活者不下萬家

李三畏字翼銘長山人萬歷甲午舉人任成安知縣清廉愛民按臺獎者三撫臺薦者七合邑建專祠奉之

樊世益字子泰長山人萬歷朝中三科武舉乙未成進士除濟南衛鎮撫改中平衛鎮撫擢湖廣操捕都司會播酋楊應龍苗賊皮林作亂制府檄定皮林單騎至賊所諭以朝廷威福解衣衣之賊皆羅拜服罪皮林平以功遷都指揮僉事管本司屯局僉事甲辰又以平楚藩功晉湖廣軍政都指揮使益沈凝好學少習舉子業雖歷戎職未嘗一日去書爲文雄奇千言立就有古儒將風焉

彭修翼字凌漢長山人萬歷朝中三科武舉癸丑成進士除濟南

濟南府志

卷五十

人物六  
明長山

吳

衛鎮撫遷龍門守備築土城五百餘丈石城八百餘丈又遷大寧掌印都指揮僉事陞臨清參將會有妖賊徐鴻儒攻陷鄒滕修翼曰賊巢在梁家淺不入虎穴焉得虎子擐甲執鎗突入賊營斬殺無算前後十四戰皆以捷聞巡撫都御史趙彥奏其功詔賜金增秩以積勞病卒范縣等處各建生祠

吳文魁字龍渠長山人隆慶時歲貢官永平訓導爲人嚴介有守常以三事遺戒子孫勿結納宗藩勿任胥吏勿爲納粟士林奉爲典訓

吳三戒字裕菴文魁子以歲貢任學博居家孝友讓諸兄以厚產立身嚴潔初任房山訓導有陳効忠者寒士也每以俸金贍之後成名儒官至郡守再補吳橋訓導識范文忠公景文子諸生

學宮傍有池塘不利文風捐俸填之不募士子攝縣篆有兩家  
滯訟不結各欲行賄求勝呼兩家族長至官卽以行賄申揭示  
之兩家感泣息訟陞階州學正以病歸卒于家旣葬之後陳子  
効忠以拔貢司理登州范少傅景文以進士司理東昌以公委  
至濟南公具誄文拜哭其墓子凱

吳凱字獻明三戒子邑廩生以孝友稱善詩古文詞精鍾王書法  
爲人正直不阿天啟間家貧甚有進退闕門者薦爲闔人幕客  
且許酬以科名凱正色叱之時王吏部象春聞而嗟賞贈以詩  
有芝蘭生谷中幽隱自含芳菟絲附蒿蘿蔓延結高岡之句學  
宮傍有空地胥吏輩欲改爲馬廐時邑令剛懷自用無敢攖其  
鋒者凱立爭之得免已卯土寇陷長山城與邑令言戰守以不

### 濟南府志

### 卷五

人物六  
明長山

吳

屈遇害子瑄登進士任縣令

許九官字尚欽長山人萬歷中由訓導陞嶧縣教諭時歲饑直指  
委之賑濟設法公布令嚴奸吏無敢乾沒直指移文褒之曰學  
裕師資才通世務後家居邑令旌其門曰高風可仰

王化遠長山人萬歷壬午舉人處州府推官戢豪黠捕獮盜清隱  
賦一郡肅然臺司薦其材以母固求終養居家好義焚借券助  
族糶遠近德之

孫國棟字柱巖長山人博學嗜古凡遇金石遺文及名畫古器不  
惜傾囊購之日以校讐異同爲快少所同學多名流鉅公晚由  
貢士授曹州訓導曹牡丹名天下每當花時與諸生遊賞備極  
歡娛非以道者凜然不可犯也居二載卒於官

王邦禮長山人隆慶丁卯舉人溧縣知縣有廉名比歸垂橐如故  
通邑謂之醇儒曾孫侯後第進士

王孝長山人嘉靖中官內庫使出納無私遷靈壁簿折獄催科歷  
著惠政當路深器之致仕歸周恤里黨嚴訓子孫

王重明長山人崇禎庚辰縣大饑煮粥賑貧全活者眾官沁州同  
知代攝州篆養士息訟革弊懲奸後致仕歸歿祀鄉賢子楨及  
曾孫應統皆名臣

安思字日睿長山人嗜學工詩文著蕭麓山房集掇古一映四書  
宗朱等書萬歷中以歲貢官岳陽知縣多善政擢衡王府審理  
不就歸里有三年遊宦餘空橐數世傳經有做廬之句

王錫字純嘏長山人成化甲午舉人長沙通判署府印值歲饑捐

濟南府志

卷五

人物六  
明長山

辛

俸煮粥全活甚眾剖晰是非疲商戴德時當入朝闔屬紳民贈  
朝覲圖後告養歸爲立生祠居鄉設義學束金供給皆出己財  
隆冬施棉衣百身貧不能葬者輒施棺木丁艱哀毀泣血遠近  
有孝子之稱從姪王家榿早失怙恃撫育入泮復分產給之

李篤之字元根長山人崇禎丙子以第三人中式少做儻好賤窮  
周急居恒請謝賓客如恐不稱邑姚徐兩姓鬪訟十餘年又牛  
某侵官帑株蔓親族甚眾張欽者以事染逮將論死者援之得  
釋俠聲流聞東武王某爲怨家所中其父兄曰必長山李孝廉  
能活汝扶服五百里及門力出之無德色年三十九卒子斯恒  
爲孟縣令

朱脈廷長山人少負氣節性忠勇好讀春秋左氏傳崇禎壬午年

甫弱冠過流賊奮勇擊賊力竭被執罵賊不屈死貢士孫起鵬  
弔之謂生前稱烈士死後著英名云

耿惟常長山城北麻寨人性慳直崇禎壬午舉家避流寇之難獨  
惟常守禦爲賊所獲罵不止賊刃其頸不殊越三日而殞

鞠鳴秋長山南史家營人甲申李自成變有自北京來者道懷宗  
殉社稷情形時鳴秋在田聞之號泣歸家縊死

王得兒長山人性至孝刲股肉啖母以療篤疾洪武二十八年詔  
旌其門曰孝子

張得成長山人母死廬於墓所不忍刻離正德十一年歲饑羣盜  
刲其衣食成竟餓死於穴

王省身長山人由吏員官省祭母死廬墓三年晨夕詣墓前跪讀

### 濟南府志

### 卷五十

人物六  
明長山

五

孝經一過且誦且哭日負簣取土築墓二年高二丈餘又復築  
祖墓亦如之因梓孝經集註以遺親友隆慶中臺司表其門曰  
孝行

許嗣聰長山人母死哭泣過哀父昌止之曰留哭母者侍我可也  
哭少節父死哀慟亦如之廬墓三年有雙鶴來繞有司上其事  
詔旌其門爲孝子

聶三畏字敬齋長山人歸德府經歷以親老不能同赴任思慕告  
歸依子舍晨昏定省曲盡其孝性好施予凡建橋修路及貧不  
能婚葬遠不能歸鄉者樂賜之張令匾其門曰孝義遠聞且勒  
名於善人碑以旌之

郭雲長山人家甚貧爲人佃種事親至孝親死廬墓三年邑人公

舉孝行

李敏長山人兄弟四人敏居長餘尚幼父臨死獨遺敏黃金十兩  
囑敏均分三子敏藏之洎後家道消索敏惟勤勤經營前金無  
分毫費俟諸弟成立可授乃出前金而告之曰此父遺也吾不  
敢違父命敬以分諸弟時人以爲難年八十無疾而終

趙印光字九隴長山人父珣天啟甲子舉人印光性孝友清介田  
產讓美於弟自取其陋而饒者有妹適王姓王罹事母子繫獄  
青州者五人印光破產盡贖之其父曾借淄川韓氏三十金韓  
沒父亦沒往償之其子不知也子四人長日新內務府教習季  
日躋孫于泃皆舉人咸稱其厚德之報云

李夢鳳字見山長山庠生性純孝父逐春病不解帶者八閱月迨

濟南府志

卷五十

人物六  
明長山

三

疾革哀毀幾至滅性多隱德好施與仲子化熙初任湖州司李  
手書諄復惟以清白相誨勉明季避兵長白山中受創卒贈光  
祿大夫祀鄉賢

許三行字體乾長山人由庠入監幼失怙事母至孝撫孤姪如子  
性寬和好施予葺學賑饑傾囊不惜通國皆推重之

許進字可昇長山人讀書好義正統五年出粟千石賑饑賜勅獎  
諭旌其門爲義民天順二年再出麥千斛賑饑詔賜冠帶成化  
六年仍出粟一千二百石賑饑詔復褒嘉凡邑中祠宇公廨不  
惜捐重貲倡始修建子晟臬咸有父風季子昌孫嗣慶嗣榮皆

登科第

夏春茂字松軒長山人好善樂施歲饑施粥賑濟平居喜排解息

爭訟修築橋道以濟往來趙令旌爲一鄉善士

李耕字凝方長山庠生事孀母以孝著輕財好義庚辰歲稔出粟二百石以賑民死不能備棺者具棺與之修文廟東廡西關關帝廟并兩廡復築廟前河堤一百尺九龍灣河岸一百三十五尺兩舉德行

劉孔修字永載長山諸生爲學務求實踐有友因其無子爲置一妾卽治奩具令適士人性好施予慕范文正公爲人立義田以贍族崇禎庚辰大饑出粟千斛以賑貧者全活甚衆事聞詔授以官

劉實印字玉璽長山人樂義好施凡戚黨靡不用濟橋梁道路修築甚多制行端方不輕然諾至其接人則謙抑溫和終身無與

濟南府志

卷五十

人物六  
明長山

垂

人拂戾者年六十三以壽終

史朝佐字君輔先世武定州人自其父松徙居長山之周村朝佐甫十齡習爲買既長游吳越資以饒裕性坦率喜施所易不問良楛不驚先不避折閱且急人急買江南時同舍郎病疫諸賈去之朝佐獨留爲日調食餌俟平始解纜焉性不喜機械然居行斂出之節往往而中故諸賈戒途惟史翁是視一日渡湖值風濤客艘多溺俄聞空中呼無逆風者再乃釋柁任所之得蘆淺風息登岸有關帝祠宇在焉遂歸事親不復出里中婚葬徵輸之迫有求輒應待以舉火者十餘室有力不治一廬者爲庀材代築歲饑平糶全活甚衆有董翁者襁二子扶杖詣門謝曰吾且作不祀鬼賴公金置妾獲二子公之賜也太母家被仇不

支合室來食指數百毅然館之牽擾數歲竟白其兔疾革焚人負券而罄橐以償負人者妻董氏亦好行其德子永安

史永安字磐石朝佐子萬歷己酉鄉薦癸丑進士授翰林院庶吉士擢御史條奏卜相納言二疏上皆嘉納熹宗卽位宮府憂危安言閣臣宜擔當國是不宜首鼠摸稜又言宮闈近侍宜清不宜容縱奸蠹後逆璫果橫人服其識出按貴州會土司安邦彥反圍城三月援兵不至食盡至嚙草根皮革召諸營將士殺馬定盟以酒貯杯曰此邦彥血也與諸將共飲拔劍起舞作飲血歌將士益勵無懈援至圍解論功擢太僕寺少卿遷太常寺少卿以右副都御史巡撫宣夏時諸番寇興武鐵柱安發兵大破之詔以兵部右侍郎總督三邊軍事諸番陷波羅堡安設伏出

濟南府志

卷五十

人物六  
明長山

善

奇兵斬首二百級捷聞晉右都御史已而長沙保寧洮州各告警安皆指授方畧斬獲平定松盤諸部落復寇甘肅率師親破之斬首四百級自是諸番不敢東顧乞骸骨歸越六年復起爲兵部左侍郎佐兵部尙書張鳳翼視師宣大籌畫悉中肯綮尋以病歸卒於家贈兵部尙書錄其子柱爲錦衣衛指揮僉事安歷事三朝有古大臣風所著館閣試草翠飛巖集長川詩西臺按黔撫朔督秦諸疏稿行於世

李夢龍字滄海長山人秉性朴直好賓客廣交遊多隱德不令人知以子明熙貴贈懷遠將軍

張鳴大字東白長山人個儻好義事親孝父希曾年五十病幾殆醫皆不治禱以身代病遂瘳家貧悉以產業讓其兄後稍裕更

爲兄益田產設義學延名師以教親族入庠序者與地十畝資其誦讀族中有靈有典等皆成名其無恒產者出腴田與之凡五百畝廣墾域爲族人殯葬地歲饑戚里賴以全活者甚衆又治田千畝分給諸姓爲長久計明末練義兵鄉黨賴以無虞卒後衆爲立張公祠春秋設祭享至今不絕

夏時泰長山人性慈善姪徵祀亡妻呂氏無依泰周恤之使存孤完節好解鄉里爭訟修築道路橋梁王令旌爲善蓋一鄉

許嗣慶長山人成化辛卯舉人屏絕世事不求仕進人高其志

趙文德字緒川長山人寬和識大體邑中大小事悉賴以平三舉鄉飲賓壽八十六子太學琦亦能佐之

孟陽春字萬輝長山人亞聖六十五代孫爲人側儻慷慨有求必

## 濟南府志

### 卷五十一

人物六  
明長山

五

應晚歲喜善凡寺宇橋梁修建不一嘗遊歷下屠夫牽一牛將就鼎午遇陽春作晚狀醺值而釋之

李孝字樂陽長山人嘉靖中官郟城知縣人稱其逼夷之清

王化字愛山長山人嘉靖癸卯舉人官南京國子助教人稱其逼惠之和

于思紳字魯園長山廩生性廉介嘗于故園掘得一釜中有藏金密以土埋之爲學宗程朱精闡易理訓生徒以彛倫爲首相國劉鴻訓出其門

李恂字和臯長山人萬歷丙午舉人事親以孝聞邑令吳某恂父三畏作令成安時所拔士也遺以俸金堅卻之後邑令王猷聞其賢敦請不出曾秉燭造訪辭以臥病終不見其孤介如此

王袞字素含長山人父東郊柴河縣丞幼失怙事母盡孝好讀書重義輕財不問生產爲諸生四十餘年足迹不入公府深爲當事所推重兩舉行優三邀鄉飲皆力辭子叫生曉生岱生孫桐伯相繼登科通仕籍

王叫生字子涼袞之子崇禎庚辰進士除如臯知縣性簡靜飼鹿調鶴積書數萬卷坐臥其下乞休歸杜門著書有怪石集二十

二卷

李第長山人居黃山前里幼嗜學精形家言嘗遇異人得黃白術子孫求其道輒拒之曰人富則侈侈則忘其性之所有恐爾等禍及身也卒不得抱道自重劉相國安岳陽曾貽以多金堅辭不受年八十餘終於家子萬祚爲諸生亦藝園隱居壽九十六

濟甯府志

卷五十一

人物六  
開長山

五

徐處闇字見區原名之邈字遠公長山人郡庠生以李自成變去頭上巾着道人服杖懸一瓢刻杖上曰懸瓢非爲避齋飯時挹寒泉潑熱腸有衣巾諸三十六首其催考詩云一瓢一衲野雲閒遶屋流泉睡正齋欲向此中尋意趣夢魂不到鐵牛山濟甯府學有鐵牛山故云

按長山志載鄉賢祠祀明代鄉賢七人聶震王璉李士翱曲遷喬安曦劉一相李春開又有忠義祠祀明名臣徐日昇一

人忠臣劉鴻訓一人義士徐處闇吳凱鞠鳴秋三人義民許進一人孝子王得兒張得成許嗣聰三人合計兩祠前明入

祀典者十有六人而人物志載祀鄉賢者又有徐以貞一人

前後不符宜考訂詳明以昭覈實焉

